

開抄本齋乘



校增續刻齊乘序

于思容氏齊乘凡六卷曰沿革曰郡邑曰古蹟曰亭館曰風土
曰人物繫全齊者蓋略備矣青州故齊郡也二百年来顧獨無
志歲在甲子蒐羅圖籍期勒成編而乘出敝篋中郡志之作大
都本此余竊唐世御史燼於兵燹劉煦繼脩遂成一代之典歐
宋更之號稱新史而煦史遂廢論者謂新舊二史互有得失煦
史近蕪事詞稍備歐宋簡潔則削甚矣至於驪山命相問合委
備中興神采炳若丹青較之歐宋似或勝之而乃并此廢焉是
可惜也况思容氏採輯忝究上下數千餘年離合同異各有義



意其尤得者黜齊奴退少翁表轅郅韓王貢貫師範罪張宙訂
九河之末沒遠邁蔡沈謂偉說之乘虛獨宗孟氏雖其紛如孟
陽去取稍謬營丘緣陵牽合竟迷然余嘗謂其志山水似景純
述人物似靖節亦近世之良史耶余固不忍以世之廢照者廢
乘也

嘉靖歲次甲子仲冬賜進士第中憲大夫青州府知府四明杜
思子睿撰

齊乘序

齊乘六卷故兵部侍郎于公志齊之山川風土郡邑城郭亭館
丘壠人物而作也古者郡各有志中土多兵難書弗克存我
國家大德初始從集賢待制趙忭之請作大一統志蓋欲盡述
天下都邑之盛書成歲之秘府世莫得而見焉于公生於齊官
於齊考訂古今質以見聞歲久始克成編辭約而事核公在
中朝為御史憲都事左司員外郎終益都田賦總管以文雅擅
名當時既卒其家蕭然獨遺是書於其子潛余官維揚始得閱
之嗚呼齊地之彊民物之夥自古然也桓公任管仲以成霸業

聖人嘗稱其功謂一變能至於魯後世去古雖遠山川郡邑猶存革其俗以化其民獨不在夫上之人乎當漢之始兵戈甫定曹參為齊相師禮蓋公以清靜化民齊乃大治茲非其效歟今齊為山東重鎮所統郡縣五十有九宦遊於齊者獲是書觀之寧無益乎予於于公之言重有感焉謂三代兩漢人材本乎學校之教養謂風俗自漢晉以降愈變而愈下美昔人之賑饑有道歎近世之採金病民以稷下學術流於異端以海上求仙惑於神異斯以足以慨公之志矣夫公諱欽字思容益都人潛擢南行臺掾云

至元五年己卯冬十月丙戌朔嘉議大夫江北淮東道肅政廉訪使蘇天爵序

釋音

卷一

男 潜 述

沿音緣 譽音酷 析音錫 括古活切 薊實側切 虞胡典切 峴胡典切 山下而險又

莞古桓切 又胡官辟音璧 要去聲 干寶搜神記是其 分去聲 殖寔音沐

音述音縑 時音時 奚音胸 助音助 鄴道元 水音歷 註公玉帶 濟南人公

音一音瑠 閱馨激切 額音額 葷粥與獮 蚌步項 沐載 沐音木 劇巨戟切

鶩音岳 狃奴力切 髻音者 街音巷 岫音包 黃能 奈平聲 三足 壇音坦

李全之 不期音基 鞞音斤 充夜 梁音浮 蜃音慎 艘音騷 醜音才 何切 哈音 嶺



閻音合 蹲存音窪 蛙音渾 繩音害 教音灼 豹音突 突 他骨切 方言江湘謂卒
云烹 說文不順忽出也 从到子易云突如其來如不孝子突
非 駛疾使去聲 疾也 出不容於內也 或从到古文子即易突字也 今俗作瓦

卷二

龍且 子余切 項 淀旬 而音澆 水名卦切 禪 去聲 黔 陳 音鉗 洱 米音直
固 當作 滙 音漸 報 妨 崩音涑 二音搜 圮 橋音移 承 去音澄 又 般 音盤 灤 音柏
弇 掩音荏 仕之 殺 殺 殺 殺

卷三

蕤 岳力切 小 并 殺 杼 停音 颿 與帆 鄂 音員 運音 宙音 睿 音銳 費 音祕 嶧

亦音鄮 慈陵 僑 音橋 隔 音隔 鄉 音倪 糞 切 儒 錐 浞 切 仕 角 冢 音傲 瞳 切 吐 管 輓 音晚
岵 音愚 食 其 音異 基 商 音滴 今 落 音挑 縣 名 周 漂 音塔 印 音昂 盼 音分
瑗 院音 圮 音聲 壞 也 漚 切 於 候 著 音詩

卷四

立文 文立姓 髡 音坤 駢 音便 平 奭 音釋 慎 到 慎姓 環 淵 環姓 鄼
携音 斟 灌 斟姓 羿 義 澆 子 倪 弔 切 浞 之 璠 音繫 瓚 切 木 贛 音古 暗 馬 音參
邗 蒲 經 鄴 音進 郚 音午 姑 鄭 音談 虺 音也 又 毀 蝮 蛇 盜 切 連 合 鯨 音上 報 殛 音棘
焯 音桂 恹 音州 布 名 吟 音硯 礪 音低 權 音角 疊 音切 許 慎 問 音去 斲 音酢 助 音蓋
闔 音死 於 計 切 苛 音何 甫 音蒲 蠖 音蟲 子 也 蝗 顯 音史 俞 音專 皞 音吳 盾 音遁 韋 音

上祝音
聲况

卷五

楷口駭切楷書也
毅音義勣積蔞音盲蔞音輝輅音路琛音丑林搏音搏

狷音眉彌音上宜音聲巨音煩荆音切怪音釁音許慎音說唳音犬使音逢龐音湫音啾

鄭音梗頡音胡結音徒迭音切結音隗音五罪音鬻音音嵩音松閏音凱什音什徼音逄音祖音余

切音殺音羸音古烏音昔夸音誇音雋音徂音充音攷音考音漬音恣音玷音都音牒音躑音所音倚

也音輻音福音湊音千音候音賈音古音恠音同音吝音盱音他音甘音耳音

卷六

俑音勇謬音米音切音纂音作音管音切音勝音平音鞫音固音鎬音浩音頴音庾音頃音覲音去音殺音隰音習音

人音辟音避音鱸音張音連音蚺音鼈音池音盼音正音諫音鞅音上音鞞音詛音咀音與音怵音出音熾音昌

切音誣音屈音蠟音賈音假音淖音鬧音臙音去音賓音穰音常音苴音七音余音敷音皎音衷音音音中音又

音音塞音紕音出音蹙音沮音阻音倩音七音性音芻音樞音撲音普音木音榘音遂音緝音緝音絨音域音纒音

七音竅音詰音吊音緹音提音縈音切音舍音上音鞞音眭音緩音僧音僧音櫓音衷音邴音丙音嘏音假音旄音

音音弘音與音曇音潭音矚音祝音璩音渠音駟音協音贊音紆音倫音絞音上音聲音爨音爨音不音蒲音候

襃音搏音豎音聚音贅音綴音種音蟲音讞音上音聲音當音報音諛音萱音綦音宓音崇音其音倉音鈕音庫音

琪音其音

後序

冶音野音調音聲音搏音上音報音奉音與音俸音稟音同音與音廩音鏤音漏音

齊乘目錄

沿革

分野

山川

山

水

郡邑

古蹟

城郭

亭館

丘壠

風土



人物

目錄終

齊乘卷之一

沿革

郡人于欽思容纂

帝嚳九州之制青州初履海岱禹貢九州曰海岱惟青州謂
東北跨海西南距岱少陽之方其色為青故以名也舜肇十
二州以青越海析遼東為營商制九有以青為徐周官職方
以徐為青其東北為幽州齊則囊括青州襟帶徐兗幽營非
所兼也古之國於此者少昊之世有爽鳩氏虞夏有季荝商
有逢公栢陵薄姑氏皆為諸侯周武王克商封太公呂尚於



齊未得薄姑之地成王時薄姑與四國作亂成王滅之益封
太公遂有全齊漢志曰齊所以為齊以天齊也蓋臨淄有天
齊淵以此建國命名耳管仲曰昔召康公命我先君太公曰
五侯九伯汝實征之以夾輔周室賜我先君履東至於海西
至於河南至於穆陵北至於無棣穆陵即大岷山或以為泰
山南龜山北至穆陵山非
也或又以為光州固始縣南之穆陵關不應如是之遠元和
志云齊陳二境置此關以為防禁隋平陳始廢然則南北朝
之關塞耳以為蘇秦曰齊南有秦山東有琅邪西有清河北
古齊履可乎
有渤海四塞之國地方二千里此其疆域也太公後二十九
世彊臣田和篡齊自立五世為秦所滅始皇郡縣天下始置

齊郡又析置琅邪

沂

秦亡齊分為三齊王田都據臨淄濟北

王安據博陽膠東王市據即墨故號三齊

劉貢父云益都為
天齊濟南為中齊

沂海為南
齊非是

漢高初假韓信繼封子肥為齊王有齊七十餘城

後置青州刺史部領齊郡北海千乘濟南平原東萊膠東高

密淄川郡國凡九而不常所理琅邪東海則為徐州之郡遼

東邊郡嘗來屬焉

光武十三年以遼東屬青
州二十四年還屬幽州

三國時齊為魏

有晉置青州刺史領齊國濟南樂安城陽東萊五郡而理臨

淄琅邪東莞亦為徐郡永嘉之亂青及徐州之半陷於劉曜

石勒厥後慕容燕苻秦迭據其地秦敗苻朗以青州降晉改

置幽州以辟閭渾為刺史鎮廣固隆安四年為慕容德為陷
德稱南燕定都廣固二世為劉裕所滅西濟東海復為晉土
而祚移于劉氏矣劉宋置青冀二州青理臨淄冀理歷城至
明帝時二州及琅邪之地並沒于元魏魏置青濟膠光北徐
州宇文周置齊郡樂安北海郡隋開皇初郡廢復為州大業
初州廢復為北海高密齊郡琅邪東萊五郡唐武德初郡廢
為青齊淄濰年密登萊沂等州青齊置二總管府後罷總管
為都督府貞觀初罷都督天寶初復為北海高密濟南淄川
東牟東萊琅邪郡屬河南道青州又升平盧節度石晉青州

仍為平盧節度齊密二州則為防禦宋置青密齊沂登萊濰
淄八州屬京東東踞升青州為鎮海軍密州安化軍齊州興
德軍元祐三年安化改臨海軍政和元年鎮海軍復為齊郡
六年以齊州為英宗賜履之地升為濟南府建炎元年京東
路青州為帥府濟南為要郡登萊沂密為次要郡從李綱所請京輔之
外建十六帥府時天下之勢已去于寶所謂非命世雄才不能復取經策雖善豈高宗能辨哉金人初入中
原詭立宋濟南知府劉豫為齊帝兼八州之地八年廢之置

益都濟南二府立山東東踞統軍司于益都轄十三州焉淄濰

密莒寧海登萊
沂海濱棣清滄

國初以濟南益都立二帥府益都仍行省事後並廢置益都濟
南般陽三路總管府割德州寧海為隸省之州四分齊境立
宣慰司于益都以鎮之廉訪司于濟南以按治之屬山東東
西道皆古全齊之地也其詳則各隨郡縣以載焉其舊屬齊
邑今割入他郡者亦別附見云

分野

地志曰虛危為齊分星曰立枵宮曰寶璣時日子州曰青魏
陳卓分郡國所入宿度齊國入虛六度北海入虛九度濟南
入危一度樂安入危四危東萊入危九度平原入危十一度
淄川入危十四度魯分徐州屬齊者東海入奎一度琅邪入
奎六度高密入婁一度城陽入婁九度膠東入胃一度又唐
一行山河兩界圖曰河為北河江為南河自北河下流南距
岱山為三齊自南河下流北距岱山為鄒魯皆負海之國貨
殖之所阜也觀兩河之象與雲漢之所終始而分野可知矣

春秋運斗樞曰虛危之精流為青州分為齊國立為萊山其
川淮泗其浸沂沐音述又其利蒲魚究之浸曰盧維幽之浸
曰蓄游數曰獫狁



山川

禹貢青州曰嶠夷既略濰淄其道徐州曰淮沂其乂蒙羽其
藝嶧陽孤桐皆今齊境山川也取法于經則沂山見周禮為
青州之鎮故冠諸山濰淄二水青之大川故為衆水之長次
則經傳圖志所載與夫古志或遺而高大可稱者皆在所書
其餘則略祠宇古迹之類因山川而互見者不復重出云

益都山

沂山 臨朐縣南百里周禮職方氏青州其山鎮曰沂山註曰
沂水所出乃取名也漢志朱虛縣東泰山汶水所出酈道元

水經曰大弁山與東泰山連麓泅水出焉以二水證之即公

玉帶

公玉帶濟南人公玉姓帶名玉一音肅見史記武帝紀註

請漢武所封之東泰山也

然漢志謂卑小不稱其毅者蓋沂山遠望之則高壓群山緣坡巖曷衍八九十里以漸而升逮至其顛則失其峻極耳又左思齊都賦云神嶽造天惟此山可以當之疑亦因東泰山而得嶽名山頂有二冢相傳周穆王葬宮嬪於此故大峴關因號穆陵云按周初封太公已有南至穆陵之履豈曰穆妃而得名乎蓋二冢不知誰氏之葬反因穆陵而附會也山半有東鎮東安王廟石刻神像俗傳趙太祖微時閱韓通于此

棄衣而石翁媪收之神像猶作臂衣之形故又云翁婆廟本即沂山之神歷代封祀有典碑志具存而俚俗誕妄如此不經甚矣

大峴山 即穆陵關也沂山東南曰大弁山大弁今人訛作夫

屏字相類而誤唐沈亞之沂水雜記又訛作太平山因頂平八九十里故云當從水經作大弁者是大弁東南即大峴也其山峻狹僅容一軌故為齊南天險劉裕伐南燕兵過大峴指天而喜曰虜已入吾掌中即此山也山北數里有裕祭天五壇

仰天山 臨朐南七十里。有黑龍洞。縣邑禱雨輒應。宋碑云。元符三年。敕額靈澤廟。崇寧五年。封濟侯。

逢山 臨朐西十里。按路史。逢伯陵姜姓。炎帝後太姜所出。始封于逢。在開封。逢澤後改封于齊。猶稱逢公。山因名焉。有逢公祠。漢志云。祠逢山石社。石鼓於臨朐山。舊有石鼓。或擊而有聲。則齊亂。今不存矣。其山四面斗絕。惟一徑可登。且有泉。金末避兵于此者多獲免。

靈山 臨朐東北廿里。晏子春秋云。齊大旱。景公曰。卜崇在高山。廣澤寡人欲祀靈山可乎。晏子曰。靈山以石為身。草木為

毛髮。天久不雨。髮將焦。枯身將蕪。獨不欲雨乎。祀之何益。蓋此山也。

丸山 臨朐東北三十里。大紀云。軒轅踐位。天下有不道者。從而征之。凡五十三征。而奄有中區。東至于海。登丸山及岱宗。西至崆峒。登鷄頭。南至于江。登熊湘。北逐葷粥。合符釜山。竹書云。堯放丹朱於丹水。朱虛縣有丹山。一名丸山。黃帝所禪。又名堯山下。帶長阪曰破車峴。東西二丹水出焉。此山西接靈山。東連方山。遙見穹崇。近則卑小。豈上古之時為瀕海之山。後漸去海。遠耳。俗名凡山。蓋丸字訛也。

雲門山 府城南五里上方號大雲頂有通穴如門可容百餘人遠望如懸鏡泉極甘冽崖壁上銜蚌殼結石相傳海田所變如沈存中筆談載太行山崖螺蚌石子橫亘如帶之類齊地尤多又有碎石子或間瓦礫凝結作石殆不可曉蓋蚌石雜沙土凝者水所漬也石子自凝成石者氣所化也豈天地之終萬物皆碎為塵及其開闢漸復凝聚元氣查滓中融化未盡者猶有其質邪以理逆之無足怪者雲門之東曰劈山山峰分裂如劈古名劈頭山西則駝山三山聯翠障城如畫宋熙寧間知青州盧士宗山路記云營丘東秦舊服周環衆

山雲門為之冠然此山實不聞于天下其磨崖題刻有宋慶曆八年富文忠公題名七人熙寧二年歐陽文忠公六人四年趙清獻公二人吳文肅公奎十一人政和五年安撫使梁子美十七人金泰和間亦有益都少尹夾谷璋十一人然則雲門絕景前賢題品尚矣圖經散逸之後乃不得與龍山虎丘角雄天下為可惜也故特表而出之云

堯山 三齊略云在廣固城西十里堯巡狩所登遂以為名山頂有祠祠邊有柏樹枯而復生不知年代此山正臨廣固廢城才二三里去今府城乃十里耳唐開元三年青州刺史王

昕碑亦云堯山者齊記謂堯巡狩所登大曆八年平盧淄青
節度使李正己碑云魏神龜三年青州牧臣沐載建祠及李
乾暉碑陰疏棟字甚盛今皆不存中統初益都同知劉仁傑
始立廟設像紀石又有宋熙寧小碣凡五碑余按堯狩此山
殊不經見府東角崩山與方山相連伏琛齊記亦名堯山水
名堯水地名堯溝以堯名者不一鄭康成云堯遊城陽而死
葬焉大紀云堯葬城陽丘壠小葬具微前志謂濟陰成陽有
堯冢然齊有丹山朱虛丹朱所封而齊之城陽比濟陰尤顯
豈堯老而遊者齊莒之城陽歟丘壠微小不存而山川猶表

其稱歟

嶼山 府城東五十里水經云康浪水出嶼山堯水逕嶼山東
山在劇縣西南無事樹木圓峭孤特左思賦嶼鎮其左是也
按齊城山勢俱帶西南東郊平原百餘里有香山者童然孤
峙康浪發其南堯水逕其東即嶼山也元和志作箕山紀侯
冢在山陰宋書云焦恭祭冢得玉磬焉金見巨洋水條下山
西南十里有龍女泉辛酉夏旱欽禱此泉投文水中即日雨
霑足明年復禱亦如之嘗率村氓欲碑其事忙諾而不集因
附此以垂不朽云

牛山 臨淄南十里孟子曰牛山之木嘗美矣齊景公登牛山北顧其國而流涕為晏子所笑即此山也又白淵之齊道記曰黃丘北十里有鸞鷲峴下帶長澗東北流經牛山山去此水八十餘里號曰牛頭水是齊景公所登而歎處蓋言為山濁水耳

狃山 臨淄南十五里齊風曰子之還兮遭我乎狃之間兮即此山也漢書作嶼亦作巖與狃通

稷山 臨淄西南十三里隨志曰臨淄有稷山齊記補曰山舊有后稷祠故名又齊宣王嘗立孔子廟亦名孔父山也

愚山 臨淄西二十里桑欽云山東有愚公冢山北有愚公谷按韓非子云桓公逐鹿入谷問一老父此何名愚公谷對曰臣畜犢牛生犢賣之而買駒少年謂牛不能生馬遂持駒去傍鄰聞之以臣為愚故名愚公谷後人因為立廟宋元豐間禱澍有感封隱利侯南曰杜山與愚山連阜水經云時水屈而西南有杜山高士傳齊宣王獵於杜山問丘先生長老十三人相與勞王王賜父老不租父老皆謝先生獨不拜復賜無徃役又不拜曰望得壽富貴於王王曰死生有命非寡人也倉廩備災無以富先生大官無關無以貴先生問丘曰非

也選良吏平法度臣得壽矣賑乏以時臣得富矣今少敬長
臣得貴矣山有白龍灣神祠宋政和賜額顯貺

商山 臨淄西三十里今隸高苑齊記補云南燕建平三年立
治建今鼓鑄不絕崔琰述征賦云涉淄水過相都登鐵山望
齊密即此山也寰宇記以為密州之鐵山者非是

孤山 濰州西四十里有穴曰龍洞禱焉雲出即雨宋封山神
曰廣靈侯又以孟子言伯夸避紂居此北海之濱因立廟封
伯夷清惠侯并齊仁惠侯崇寧大觀碑刻存焉

國朝至元十八年加封山神曰孚澤廣靈侯伯夷昭義清惠公

叔齊崇讓仁惠公

路史伯夷名允字公信叔齊名致字公遠夷齊謚也此說恐未必然

山東曰

麓臺俗傳公孫弘讀書處元和志以為弘墓

陸山 昌邑縣南四十里濰水東岸漢封霍光為博陸侯食邑
北海河東師古曰蓋鄉聚之名非縣也此博陸聚之山耳故
名陸山天寶六年敕改霍侯山南有岵山又南峽山皆瀕濰
水

浮來山 莒州西三十里春秋公及莒人盟于浮來即此也俗
訛作浮丘山山半有莒子陵又東南馬著山又東屋漏山浮
來之北則洛山黃華水發源于此合浮來衆水瀦為莒之西

湖湖西復有定林山山有定林寺亦名刹也

焦原山 莒州南四十里記云莒有焦原臨百仞之溪人莫敢
近莒勇士登焉莊子伯昏瞽人射臨百仞之淵即此漢志謂
之崢嶸谷俗曰青泥街兩峽峻立如街故云

電山 沂水縣西北三十里寰宇記山出紫石英好者映徹如
電故名亦作岫山今日岫突固又東北螳螂山與大小二魯
山相連有穴如門直入二十里真仙境也縣西四十里有磨
石峴長二十餘里極險峻峴下即堂阜鮑叔解管仲囚處俗
訛作憚阜

高柘山 沂水東北百里漢志靈門有高柘山浯水所出東入
濰又名巨平山俗曰臺頭山

望仙山 沂水西南百里縣中有望仙橋以為王喬飛鳥之地
未詳按列仙傳仙人王喬同姓名者有三人吹笙王子晉一
名王喬在周飛鳥王喬在葉縣食肉芝王喬在益州北
平山在齊地琅琊
者無之俗附會耳

蒙陰山 蒙陰縣南八里今名仙洞山琅琊承宮避亂此山立
性好仁不與物競人有認其禾者舍之而去

龜蒙二山 魯頌閟宮曰奄有龜蒙遂荒大東傳曰龜蒙魯國
二山也龜山近魯在今費縣西北七十里後人指為蒙山者

山頂宛如龜形名不虛得夫子龜山操曰余欲望魯兮龜山
蔽之韓退之擬曰龜之大兮祗以奄魯則龜為魯之大山明
矣蒙山者在龜山東二山連屬長八十里禹貢之蒙羽論語
之東蒙此正蒙山也邢昺曰先王封顓臾為附庸之君使主
祭蒙山蒙山在東故曰東蒙後人疑於東蒙之說遂誤以龜
山當蒙山蒙山為東蒙而隱沒龜山之本名夫魯人頌其本
國之山川辯必審矣故今定蒙山為龜山東蒙為蒙山以復
古焉帝王世紀少昊自窮桑都曲阜註謂窮桑在東蒙山屬魯地然未知果是否龜山下有古顓
臾城山前玉虛宮唐仙人賈神翁所建有英烈照濟惠民王

祠即顓臾也山西南十餘里有漏澤澤有五穴春夏積水秋
冬漏竭將漏之時先有聲居人扈穴取魚隨種麥比水至麥
已收矣費縣廨有唐大中間校書郎李潛漏澤賦并序石刻宋至和間出於泥中今断裂為二在醉翁亭記碑旁醉翁碑者歐公同時人蘇唐卿為費縣宰篆記文刻石立於此并刻歐公往復手帖皆精蒙山前陽口村
有玉皇廟相傳老萊子故宅也陽口亦山名後魏費縣理此
高士傳老萊子隱蒙山著書十五篇言道家用楚王嘗至
其門其妻挾薪而至怪車馬跡之多曰可食以酒肉者可加
以鞭捶可受以官祿者可隨以鈇鉞先生受人官祿為人所
制妾不能為人所制也夫婦遂相與逃去路史又云老萊子即老子邑于苦之

賴賴乃菜也。孔子至楚，見老萊子時已二百餘歲，斑衣戲母，側所問答皆禮事，知非二人，未知是否。

羽山 地記舊在朐山縣西北九十里，今屬沂州東南百二十里。殭絲山也，前有羽潭，一名羽池。左傳：鯀化為黃熊，入于羽淵，即此淵。旁生細柳，野獸不敢踐。郡國志又云：鍾離昧城南有羽泉，亦殭絲處，其水恒清，牛羊不飲。

艾山 左傳：隱六年公會齊侯，盟于艾。杜註：泰山牟縣東南有艾山，在今沂州城西三十里，與大小鳳凰山相近。官溝水自小沂分流經艾山，西注山前。靈鎮侯廟，山東漢厚丘縣古城，城西有酺神廟，詳見祠宇。

君山 一名抱犢山。嶧州北六十里。述征記曰：承縣君山有抱犢，固壁立千仞，去海三百里，天氣澄明，宛然在目。山上有池，深纔數尺，水旱不增減，平田數頃。昔有隱者王老，抱一犢於上，耕種後遇異人仙去，故以名焉。漢曰樓山，魏號仙臺，其高九里，周四十五里。然今嶧州城北三里，別有仙壇山，亦奇秀，豈即仙臺而誤為君山所掩邪？

魯卿山 嶧州東北七十里。國語：季文子相，宣成二君，妾不衣帛，馬不食粟，魯人思其遺惠，為之立廟，亦名季山，俗作神峯山。

夾山 嶧州北七十里通典東海懷仁縣有夾山春秋之夾谷也左傳定十年公會齊侯于祝其寔夾谷孔子相漢有祝其縣

禹貢別州以山川定經界秦漢以降建置雖不常亦不敢失山川之限焉按抱犢魯卿諸山古圖經皆屬嶧州今則並屬沂州訪之耆舊云李壇據齊以其姻親胡某者知沂州實張威福嶧州畏其逼盡割州東二十里外境與之逮今不改嗚呼壇賊據彈丸之地為政不平如此固不足責職方氏因之豈矇不知邪

尼丘山 滕州鄒縣東北六十里有坤靈洞宣聖廟其東顏母山水經謂之防山防墓崩即此有顏母廟南有昌平山夫子所生之鄉又南馬鞍山有孟母墓又南唐口山有孟子墓
鳧山 鄒縣西南五十里閔宮曰保有鳧嶧逐荒徐宅傳曰鳧嶧二山名也古有伏羲廟今云有伏羲墓按左傳顓臾風姓伏羲之後寔司太昊之祀鄒魯有廟是也伏羲都陳有墓非也今訛作爺娘山

嶧山 鄒縣東南二十里京相璠曰嶧山在鄒縣繹邑之所依山東西二十里高秀獨出積石相臨殆無土壤石間孔穴洞

達相通有如數間屋者俗謂之嶧孔避亂入嶧外寇雖衆無
所施害永嘉之亂太尉郗鑒將鄉曲千餘家逃此今山南有
大嶧名郗公嶧亦有古城遺跡史記始皇二十八年東行郡
縣上鄒嶧山刻石頌德三代地理書曰始皇乘羊車登嶧山
刻石處名曰書門

桃山 滕州南五十里御覽云即華采山也又名義珠山山上
有井不可窺窺者不盈歲輒死有鳥巢井上金啄黑色見則
大水今訛作陶山謂有陶朱墓西微山謂有微子墓皆謬惟
奚公山奚仲造車處上山軌轍猶存見地記云

牟婁山 密州安丘南二十里路史云古有巢氏治石樓山即
牟婁也本年夷國密之諸城有婁鄉隋因置牟山縣今訛作
朦朧按字書云牟婁微視也義或緣此

常山 密州南二十里東坡雩泉記曰禱雨未嘗不應蓋有常
德者故謂之常山廟西南十餘步有泉古者謂吁嗟而求雨
曰雩名之曰雩泉宣和間封山神靈濟昭應王

廬山 密州東南四十五里東坡詩註廬敖秦博士避難此山
遂得道有廬敖洞飲酒臺聖燈巖障日峯三泉

馬耳山 密州西南六十里東坡詩試掃北臺看馬耳未隨埋

没有雙尖北臺謂超然臺也

九仙山 密州東南百二十里坡云九仙在東武奇秀不減廬

蕩所謂九仙今已壓京東是也漢琅邪郡有太一仙人祠九所豈以此得名邪

琅邪山 密州東南百五十里齊景公放於琅邪即此吳越春

秋越王句踐徙琅邪立觀臺以望東海秦始皇廿八年南登

琅邪大樂之留三月徙黔首三萬戶于臺下立石頌德御覽

云碑有六百字可讀臺側有四時祠臺上有神泉人或汚之

即竭漢于此置琅邪縣武帝亦嘗登焉隋開皇十六年于此

置豐泉縣大業初復為琅邪唐省之今山下井邑遺跡猶存

登山石道如故土人名曰御路

大朱山 膠州西南百二十里岸海名山也通典高密諸城縣

有古齊長城自大朱山起蓋古齊長城起自齊西防門東逾

泰山穆陵至大朱山海濱而絕非起自大朱也大朱山有石

室晉永嘉中陳仲舉隱此得道仙去旁有小朱山錯水所出

又東徐山方士徐福將童男女二千人會此入海采藥不返

又東白貌山風水所出錯水風水俱東入海

大小二勞山 即墨東南六十里岸海名山也又名勞威山四

極明科云軒皇一登勞威山是也齊記云泰山自言高不如

東海勞吳王夫差登之得靈實度人經神仙傳樂子長遇仙人授以巨勝赤散方曰蛇服此藥化為龍人服此藥老成童子長服之年百八十歲顏如少女登勞山仙去山高十五里周八十里此大勞也與小勞山華樓山疑即鼎足相聯大勞山有上清宮五代末華蓋仙人識趙太祖于側微宋人為建此宮近世有劉使臣者棄金符遯此山其徒建碧落宮

陰山 即墨東南八十里上有小池深不盈尺水旱不增減池旁有石人并石馬蹄迹寰宇記云秦始皇至牢威山望蓬萊立馬此山遣石人驅牢山不動因立于此石人今海濱山上

往往有之

蓋勞山之高以其登陟之難則名勞驅之不動又名牢也

不期山 即墨東南四十里又名訓虎山後漢童恢為不期令有虎食人恢檻獲二虎訓之曰王法殺人者死虎敢食人一虎垂頭服罪一虎吼躍不服服者殺之躍者縱之三齊記云鄭玄教授此山草生如齧長尺餘堅韌異常號康成書帶余按勞山不期皆康成講學之地文澤涵濡草木為之秀異千載之下第茅塞焉深可歎已

天井山 即墨東十餘里上有一井極甘因號天井北二十餘里平地三穴湯泉出焉若有風從西北來則湯極熱不可入

女姑山 即墨西南三十里山北舊有基漢志不期太一仙人
祠九所及明堂武帝所起不期城西南有七神號曰女姑即
此又東有中祠山亦九祠之一又天室山亦祠所並見寰宇
記

田橫島 即墨東北百里橫衆五百人死此四面環海去岸二
十五里可居千餘處蓋有竹島塔沙福島穀積車牛皆海中
島名然登州蓬萊閣西復有田橫島在岸不在水非是

寧海山

大崑崙山 州東南四十里岬夷岸海名山也秀拔為羣山之

冠仙經云姑餘山麻姑于此修道上昇餘趾猶存因名姑餘
後世以姑餘崑崙聲相類而訛為崑崙然今東夷人止名崑
崙又有小崑崙與之相連宋政和六年封仙姑虛妙真人重
和元年賜號顯異觀元遺山續夷堅志崑崙山石落村劉氏
嘗於海濱得百丈巨魚取骨為梁構屋曰鯉堂堂前一槐蔭
蔽數畝忽夢女冠自稱麻姑乞此樹修廟劉漫許之後數日
風雷大作昏晦如夜失槐所在相與求之麻姑廟中樹已卧
廟前矣山有東牟侯神祠又金大定間關西王祖師訪山前
大姓于氏曰我前生修煉此山山有烟霞洞盡往登焉于氏

以為我世居此未聞有洞相與登山求之果見洞口有烟霞
字跡大為神異建祠紀石焉

廬山 州東二十里與大峴山東牟山相連北至海百里上有
望海臺峴山有東牟侯祠又東繫馬山始皇于此繫馬草生
猶作繫結之狀俗云繫馬砮州西南六十里兩欹山兩峯欹
側相倚並見寰宇記

文登山 文登縣東二里寰宇記始皇東巡召集文人登此山
論功頌德故名又東有鶴鷗山常有鶴鷗栖其上

斥山 文登東南六十里爾雅云東北之美有斥山之文皮焉

蓋以海濱廣斥得名高門之族居此有千餘家東齊于氏皆
斥山望也欽之曾大父端叔府君自斥山徙昌陽大父君瑞
府君其仲子也又自昌陽徙益都先考禮部公嘗命欽攷斥
山于氏所出欽對曰按氏族略于氏本周武王子邗叔所封
之國在河內邗城子孫以國為氏去邑為于後魏時有自東
海隨拓拔徙代改為萬紐于孝文復為于氏又有淳于姜姓
之後唐避憲宗嫌名亦為于氏此鄭氏之說也然史記文王
伐邗在野主書大傳正作于于蓋古諸侯之國非始於邗叔
也又夏相時于夷來賓子欲居九夷于夷其一也或即嶋夷

之轉或于國之裔有奔海濱而君長東夷者何其族之蕃而世之行也斥山之于祖此為的先君領之

之梁山 州西北五十里海濱史記秦始皇廿九年登之梁刊石紀功三十七年又自琅邪使徐福采藥福言苦大魚為患於是連舟下海登之梁射巨魚郊祀志齊有八祠之梁為陽主山有陽主廟武帝太始三年幸琅邪禮日成山登之梁稱萬歲子虛賦又云射乎之梁其山入海中有壘石相傳武帝造橋兩石銘猶存山高九里周五十里西南至福山縣長三十餘里

召石山 文登之東三齊略云始皇造石橋渡海觀日出處有神人召石下城陽一十山岌岌相隨而行石云不駛神人鞭之見血今召石山石色皆赤伏琛齊記曰始皇造橋觀日海神為之驅石豎柱始皇感其惠求與相見神曰我醜莫圖我形當與帝會始皇從橋入海四十里與神相見左右有巧者潛以足畫神形神怒曰帝負約可速去始皇轉馬前脚纔立後脚隨崩僅得登岸今驗成山東入海道水中有豎石往往相望似橋柱之狀又有柱石二乍出乍沒琛云始皇渡海立此石標之以為記山下有海神廟望海臺始皇廟

成山 文登東北百五十里古不夜城側漢志亦作盛山主祠
日盛山斗入海最居齊東北陽以迎日出武帝太始三年幸
東海作朱鴈之歌禮日此山還而下邳鯨寘今按石與成
山相近因始皇會海神故後世遂呼成山曰神山山斗入海
旁多樹島海艘經此失風多覆海道極險處也

鐵官山 文登西百四十里去年平城百里漢置鐵官冶鑄遺
跡尚存

五壘山 文登南五十里南北成行入海如壘又南石門山兩
石聳立如門今按文登正南有鐵查山東連斥山甚奇秀圖

經弗載豈古與斥山為一或即五壘石門之異稱歟

白鹿山 文登北四十里唐神龍三年刺史畢元愷於此獲白
鹿進之故名又東北海邊有雞鳴島北海中有海牛島郡國
志云海牛無角長丈餘紫色足似龜尾若鮎魚性捷疾見人
則飛赴水皮堪弓韃脂可燃燈與海驢島相近海驢常以八
九月上島產乳其皮水不能潤可以禦雨並見寰宇記海驢
皮今有獲之者淺毛灰白作鱸斑魚又有海狸亦上牛島產乳

見齊記

昌山 文登西南四十里有巨神龍龍祠昌水出此山因氏焉

南合黑水北納昌陽湯通名昌水西南過萊陽會五龍水南
入于海昌陽湯極清溫在文登西七里名如意湯圖記文登
有溫泉七所此為最

九目山 登州東南七十里齊記云山有九竅故名北二十里
有龍山又北羽山之梁水所出東北流合石門水入海寰宇
記亦謂此為殛鯀之山非也東海既有羽山鯀廟矣此偶同
名耳又有朱高密神隱丘歷堂等山圖志弗載不可備述

沙門島海市附 登州北海中九十里上置巡檢司海艘南來轉帆
入渤海者皆望此島以為表誌其相聯屬則有鼉磯島牽牛

島大竹島小竹島歷歷海中蒼秀如畫海市現滅常在五島
之上海市之名始見江鄰幾雜誌東坡詩序或謂類南海蜃
樓蛟蜃噓氣所成殆不然欽嘗至登州海上訪之蓋海市常
以春夏晴和之時杲日初升東風微作雲脚齊敷于海島之
上海市必現現則山林城闕樓觀旌幢輶車駝馬衣冠人物
凡世間所有象類萬殊或大或小或暫或久或變現終日或
際海皆滿其為靈怪赫奕豈蜃樓可擬哉蓋滄溟與元氣呼
吸神龍變化浩不可測如佛經所謂龍王能與種種雷電雲
雨居于本宮不動不搖山海幽深容有此理欽以中秋後至

海濱天已微寒知州事李述之詩人也亦相與禱于廣德王之祠越二日忽報云今晨風色雲氣海市當現同登賓日樓候之日初出大竹島上橫一巨艘長餘百尋述之指以示余余曰此海舟耳述之曰諦觀之何故不動須臾前後曳數旗劔戰紛紜忽不見惟有空舟漸變如長廊而滅述之曰風稍急而寒不然現未已也嗚呼神哉然則史漢所稱三神山蓬萊方丈瀛洲望之如雲未能至者殆此類耳且秦漢入海方士僅能往來于碣島之間偶見此異慕之為仙亦不為過非若今人航海遠泛黑水洋外或飄蕩歲月而後返果有蓬萊仙山何不聞也斯言足破千古之惑矣

金山亦名岨岬山棲霞縣東北二十里以產金得名即地記萊陽縣之黃銀坑也隋開皇十八年年州刺史辛公義于此坑冶鑄得黃銀獻之山寺有隋碑淘金者所祖然隋唐以來皆守土官采以充貢為數不多未見其害今則編戶置官歲定金額有增無減三時沙汰僅得分毫名曰淘金寔則買金鑄納戶漸逃亡官復侵剝大約金戶一家之賦當他戶三倍之多而戶不勝其苦矣又指以金苗鑿地人居宅墳壠皆所不免而民不勝擾矣其害視醜竈有加夫和羊之罪良史

已書辛公義作備此毒可無誅乎故論及之土俗訛傳隋開
皇中岨岬山出黃金九屋俗儒便紀之于石為可笑也

艾山 棲霞西北三十里山前溫泉可浴按棲霞縣本以山得

名曰百澗北曲方嶺唐山靈峯覆甌積金芝陽公山碁山磁

山哈壚山哈壚在福山縣南不能具述大抵環縣皆山耳宋李常云

吾州有重巖疊嶂不可名狀信然

萊山 黃縣西南五十里封禪書云齊八祠萊山為月主山有

月主真君祠一云萊陰山多仙聖所居

躡狗山 黃縣西南三十里上有石如狗躡伏氏云山極靈劉

寵微時途經此石犬吠之後為太尉俗名狗兒山

蘆山 黃縣南四十里山下有真君宮金縣尹陳公碑云蘆童

子晉時人九歲居此山食茯苓汁仙唐封冲禧真君

三山 萊州北二十里漢志秦祠八神四曰陰主祠三山寰宇

記云在掖縣北海之南岬顏監謂即三神山者非也漢志曰

蓬萊方丈瀛洲此三神山者其傳在渤海中則三神乃蓬萊

方丈瀛洲之總稱豈海岸之三山也詳見海市論

浮游島 萊州北海中望若浮游然俗訛曰芙蓉

福祿山 萊州西五里出温石可為器又有金山馬鞍優游雄

山土山君山皆縣境內

萬里沙 萊州北三十里夾萬歲水兩岸沙長三百里路史云
雲陽氏陽帝處于沙掖有萬里沙祠秦皇漢武皆禱于此又
北十餘里臨海有盞石方圓五步上有窪樽古老相傳始皇
鑿此盛酒以祭百神

大基山 萊州東十里金明昌間劉國樞記云大基山道士谷
後魏鄭文公得道之地流泉花竹地占高敞略無纖塵郡之
甲勝

七子山 萊陽縣東南九十里山有八峯大峯居中餘若子然

故曰七子

五龍山 萊陽南二十里四水自西北昌水自東北皆南流至
山前五水相合名曰五龍南入于海山因名焉西有荆山寰
宇記作莖山爾雅藿山莖者是也

高麗山 萊陽西南九十里司馬懿征遼東置戍於此以高麗
為名俗訛作差莪山

火山 萊陽北三十里山多赤石故以火名已上並見寰宇記
又有倉山林寺福阜三山

林寺福阜
淘金之地

又有獅子峯俗傳金人

詩俚甚今不取

大豁山 膠水縣西北二十里伏琛云虞鄉城東南有豁口曰大豁山北又有小豁山

渣岬山 膠水北三十里寰宇記云川形渣岬故名北與躄狗山相接天柱大澤皆一帶山也


明堂山 膠水東北四十餘里齊記云盧鄉城東三十里有明堂山與巨青山連出烏頭天雄又云藥石水出此合石瀆水北入于海

墨山 膠水東北六十里石色如墨故名水出茲山亦名墨水金泉山 膠水東南四十里記云出桔梗防風

鳳喙山 招遠縣北三十里本名牛心至元六年陳節齋按部過之以其名俚故易之有詩石刻在縣治縣北五里有湯泉阜泉出阜南極熱東流合冷泉入池始可浴鳳喙山東有山中空俗曰虛空山又有齊山望兒亦皆鄙俚自圖經散逸齊地山川例蒙俗惡之稱惟密州境內一山一水名存古雅蓋得坡仙手滌凡陋千載有光信賢人之澤遠矣

般陽山

梓桐山 般陽府城東十餘里後有石壘園洞古老相傳鬼谷子隱居名鬼谷洞典路鬼谷弟子蘓秦張儀輩五百餘人鬼谷為作窟深三丈曰有能在窟中說使泣



者則能分人主之地矣秦亦有鄭康成廟金末燬于兵乙卯
下說之鬼谷注下即此洞
歲淄川令張孚重修渑水燕談云處士王樵隱此山詳見人
物論梓桐東曰吉磨山出磨石有石碌井

原山 府東南七十里地志云原山淄水所出今名岳陽山淄
出其陰汶出其陽非止一水也山亦跨淄川益都兩縣界云

甲山 府西南三十里水經註萌水出般陽西南甲山東北入
瀧水今訛作夾谷山謂是齊魯會盟之地非也當從水經

黌山 府北十里三齊略云鄭玄刊註詩書棲遲此山上有古
井獨生細草葉似薤俗謂鄭公書帶即今黌堂嶺與長白山

相連元遺山濟南行記謂因范文正公學舍在焉故謂之黌
堂蓋未見古圖經耳

長白山 長山縣南三十里太平御覽云長白山者因此山雲
雨長白故名之西南又有大湖山二山並有石室敗漆船上
有記皆謂堯時物元和志云於陵城西長白山高二千九百
丈周六十里昔陳仲子夫妻隱此山阿有醴泉寺相傳志公
卓錫之地宋文正公讀書寺中日惟一粥偶見窖銀覆之而
不取後為西帥僧人求為修寺公使發之取窖中銀適周於
用此與還術者子白銀相類世或未之聞也上下二書堂在

黌堂嶺會仙峯下皆宋代所建遺跡尚存今即寺內有范公祠舊說公母嫁齊居秋口公讀書此山相去百里往來省親劬甚後知青州悲思不自勝秋口在今顏神鎮土人亦名其處為范公書堂按南岱東沂山小泰之外沂之蒙山密之九仙即墨之大小勞寧海之姑餘般陽之長白皆三齊高大名山也餘不得並列

濟南山

歷山 府南五里一名舜耕山古有舜祠魯南豐齊二堂記云舜耕歷山漁雷澤陶河濱作什器於壽丘就時於負夏鄭康

成釋歷山在河東雷澤在濟陰負夏在衛地皇甫謐釋壽丘在魯東門之北河濱在濟陰定陶西南陶立亭是也以余考之耕稼陶漁皆舜之初宜同時則其地不宜相遠孟子又謂舜東夷之人二家所釋雷澤河濱壽丘負夏皆在魯衛之間東方之地歷山不宜獨在河東在齊者是也世因河東雷首山一號歷山為水所出舜娶堯女所居遷就附益謂歷山為雷首之別號不考其寔由是言之則圖記皆謂齊之南山為歷山舜所耕處故其城名歷城為信然也或者不此之論乃備載陸魯望象耕鳥耘之辯可見其贅

龜蒙曰世謂舜田歷山象為之耕鳥為之

耘聖德感召非也蓋耕者行端而履深似象步耘者舉疾而畏晚如鳥喙通典云山有太甲冢未

詳歷山南屬泰山東連琅邪崇岡疊嶂脊脈不斷欽嘗有詩

云濟南山水天下無晴雲曉日開畫圖羣山尾岱東走音海

鵲華落星青照湖此濟南山執也

廟山 府城東南十里三齊記云因舜廟得名遺山濟南行記

作妙山非是

玉山 府南二十里按酉陽雜俎云齊郡玉山有鳥名王母使

者漢武登此山得玉函帝下山玉函化為白鳥飛去世傳山

上有王母藥玉鳥常守之因號玉山有九十谷又名卧佛山

奎山 府城西南十五里三齊記奎山公神似猪頭戴珠冠殷

時有道士隱此野火四發道士祈天即雨今人遇旱燒山禱

雨多應又北有匡山世傳太白讀書於此又北曰粟山曰藥

山山出陽起石極佳故名

華不注山 府東北十五里左傳成公二年魯季孫行父帥師

會晉卻克及齊頃公戰于鞍齊師敗績逐之三周華不注又

云從齊師至于靡笄之下逢丑父與公易位使公下如華泉

取飲則此山亦名靡笄靡與地記又名金輿道元謂單枕秀

澤不連陵以自高虎牙傑立孤峯特拔以刺天青崖翠發望

同點黛信然山前道院中有石刻太白諸賢詩院前即華泉水與小清合流

鵲山 府北二十里王繪太白詩註云扁鵲煉丹於此俗又謂每歲七八月鳥鵲翔集故名按扁鵲盧人近在今長清縣地

煉丹此山者是

古有鵲山院見陳後山詩

黃山 府西南六十里山周如城岱陰諸谷之水奔流至山西匯為池圍數畝不溢而伏山即渴馬崖也伏流至府城之西而出即趵突泉也

西龍洞山

府南六十里道元云符秦時有竺僧朗事佛圖澄

碩學淵通與隱士張巨和居此因號朗公谷今有朗公寺亦三齋名利歷代有碑谷有琨孺溪水過玉符山又名玉水至祝柯入濟今溪水東西分流山中人云西發趵突東發百脈驗之信然謂徑入濟者誤也龍洞西南有方山長清縣界疑即水經之玉符山又西隔馬山長清東南左傳襄公十八年晉伐齊齊侯禦諸平陰塹防門而特之廣里齊師懼夜遁夙沙衛連大車以塞隧而殿殖綽郭寗曰子殿國師齊之辱也子姑先乎乃代之殿衛怨二子遂殺焉於隘以塞道欲使晉師得之即此後人呼為隔馬山山東北曰神林有隔馬神君祠祠南有

一潭清澈見毫髮歲旱邑人祈聖水禱雨輒應唐宋碑刻存焉又南青崖山金亂巖侯率義兵堡此

皆古齊山今屬泰安

東龍洞山

府東南三十里山如重甌

音言甌也爾雅重甌陳此山類之

西洞

透深一里許秉火可入東洞在萬仞絕壁之上洞口釜鬲尚

存煙火之跡如墨蓋昔人避兵引絙以上中必有泉不知其

深幾許耳有翠屏巖獨秀峯三秀峯峯側龍祠郡邑禱雨極

應宋封靈虛公九域志又云禹登山謂禹治水嘗登

龍盤山

章丘縣南二十八里齊記云周初有神龍潛此山遂

名有神跡祠姜嫄所履伏琛云宋濟南太守蕭承之立祠山

上其妻亦學履而產齊帝按姜嫄炎帝後有駘氏之女高辛

世妃后稷母也駘舜封稷作郟元和志郟在京兆武功縣路

史駘在費縣南遠者去此數千里近亦五百餘里姜嫄未嫁

不應至此既嫁則高辛都亳河南偃師地豈在齊乎伏琛之

論尤覺誕妄

樂盤山 章丘南二十七里齊記云下有樂盤城即平陵王與

章丘侯餞送之地

東陵山 章丘南二十八里龍盤山相連寰宇記云盜跖死處

山南有盜跖冢

危山 章丘東北五里寰宇記云漢文帝十六年封齊悼惠王
子為齊孝王景帝三年孝王與吳楚通謀自殺葬於此墓在
山樹

女郎山 章丘東南七里又號小田山齊記云章夾有三女溺
死葬此有三陽洞俗云有子張墓即章女冢所謂章丘者耳

雞山 章丘西南四十里齊記云有神雞晨鳴於此候之獲一
石潔白如玉因以名焉巨合水出此山下俗名雙女泉

湖山 章丘正南五十里明秀鄉相傳古有仙翁仙婆修道此
山皆得壽考今有公婆廟遇旱禱雨即應

亭山 章丘西南六十里桀死處湯放桀于南巢書傳皆謂今
廬江巢縣獨尸子云放之歷山豈古有巢氏治琅邪之石婁
山齊地亦有南巢邪又桀死後其子淳維妻其衆妾遁于北
野隨畜轉徙號曰葷育若桀死南方其子豈能北遁自齊奔
漢則易矣隋唐有亭山縣峴古跡

啞婦山 鄒平縣西十三里俗呼啞婦山謂夫子去齊道此山
婦人陽瘡以滅跡蓋因孔子去魯之歌曰彼婦之口可以出
走而附會此名直野語耳

大山 無棣縣東北八十里

小山 無棣西北一百二十里二山圖經弗載然濱棣瀕海廣
斥無高峻之山故志

平原嶺 德州東南七十里有望遠臺壽公菴嶺上鹿角關



齊乘卷之一終

齊乘卷之二

益都水



郡人于欽思容纂

濰水 水經云出琅邪其縣濰山許慎吕忱云其屋山淮南子

云覆舟山廣異名耳實一山也今清風山在莒州莒縣北百里漢

其侯國地東北流逕仲固山折泉水入焉折泉出松山漢有

折泉縣又東北逕密州城西折而北涓水合扶淇水入焉涓

水出焉耳山扶淇出常山並見水經今名齊河又北盧水

入焉盧一名久台音怡水出盧山漢橫縣之故山也道元謂盧水側有不



灰木野火燒 又東北至巴山密水入焉密又有百尺有二源

一出障日山東坡所謂小峨嵋者一出五弩山今作鹵山又東北

浯水入焉浯出高柘山高柘山今名臺頭東北納荆水三齊

人堰浯入荆荆水出荆山逕平昌故城臺下合電泉入浯道

謂澠水過平昌臺下有井與荆水通有龍出入其中土人謂

其城曰城陽城台曰城陽台電泉者泉勇如電有龍祠宋封

靈需侯疑又北逕龍且冢冢在澠水淮陰囊沙處也道元謂

即古龍井高密碑產山西古人堰澠水以溉田散流入夷安潭亦此地

今高密西有古堤南起岑冢北亘蔡冢長三十餘里謂是岑

彭與蔡伯喈冢非也正古堰遺跡土人名曰趙貞女防夷安

潭今名都灤又北逕城陰故城西又北至安丘東北古淳于

古奚養澤也

城側汶水入焉又東北過昌邑又東北入于海漢志澠或作

淮淄水 書傳曰出泰山郡萊蕪縣原山之陰東至博昌入海按

地志水黑為淄元和志云俗傳禹理水功畢土石黑出今益

都縣顏神鎮東南二十五里岳陽山東麓地名泉河古萊蕪

地岳陽即原山也東北流逕萊蕪谷又北逕馬陵俗名長峪

道按此即晉卻克追齊至馬陵賈逵曰出峪東流聖水入焉

一作馬陘俗以為龐涓之馬陵非是聖水出家桑谷又曰神泉列仙傳鹿皮公所飲者見水經又

東北逕牛山折而北天齊淵水入焉又北漸平臨淄東城又

東北逕安平故城北。又東北逕樂安縣東古廣饒地。又北入巨淀水。今清又北出注馬車瀆。今高家港合時水入海。淄多伏流。俗謂上下有十八漏。按通志略曰：杜預謂淄入汶。班固謂淄入濟。桑欽謂淄入海。考其形勢，當以杜為正。豈其然乎？諸說惟桑氏為有據，不特此耳。宜其以水名家也。

時水 通志略曰：一名耐。襄三年齊晉盟于耐，是也。其源歧淺，多涸竭。又名乾時。莊九年公與齊侯戰于乾時，是也。道元曰：時水出齊城西南廿五里平地出泉，即如水也。水色黑，又名黑水。今按時水之源南近淄水，詳其地形水脈，蓋伏淄所發。

土人名曰烏河。西北逕黃山，又北逕愚山，又屈而逕杜山。澗水入焉。澗出臨淄西南十八里，所謂澗中。孟子去齊，三宿出澗，故又名宿留水。俗謂之泥河。又北逕臨淄城北，系水入焉。系出臨淄城西中門，即中池水也。門側小阜曰包山，俗又名包河。並城北流，分為二，俱入時。一支逕梧臺前，西入者曰系水。一支遠至博興東南李監橋入者曰渙水。詳見渙水條。時水又北至般陽新城縣東南索鎮口，下可通舟楫。又北至博興南地名灣頭。灤水會焉。灤即小清河又東逕利縣故城。在樂安西又東逕樂安縣北。又東北由馬車瀆入海。水經謂時水自西安

城南石羊堰分為二支津西北合黃山之德會水黃阜之南五里泉至梁鄒入濟旱則涸竭此乾時也今不通矣欽嘗自濟南護先妣喪由小清汎舟東下至博興沂時水南上至索鎮而登陸去益都僅九十里耳益都衆水惟此通舟未嘗淺涸焉

渙水 水經註渙水出臨淄縣北世謂之漢湊水逕博興縣南貝丘齊侯田見公子彭生處又西北入時水昔晉侯與齊侯宴曰有酒如渙指喻此水也即今臨淄西門申池水北流者勢極屈曲俗稱九里十八灣過梧臺北小泥河入焉泥河出

梧臺下又北至博興李監橋入時水此正渙水也魯仲連謂田單黃金橫帶騁乎淄渙之間此水與淄東西並流臨淄介其間故齊侯有酒之喻田單馳騁之地淮南子謂淄渙合流易牙嘗而別之者皆指此水也古諺謂瘦馬不渡渙南燕李宣謂渙水不冰良由逼帶京城者乃濁水耳詳見濁水條

巨洋水 水經云出朱虛縣東泰山國語謂之具水袁宏謂之巨昧王韶以為巨篴或曰朐彌或曰沫實一水也今謂之洱河出沂山西麓即東泰山也東北流至臨朐縣東南熏冶泉入焉熏冶出縣南西溪又北沙河出東阜下北來入焉又北

至臨朐城東逕覆釜山又北逕委粟山

水經云孤阜秀出形如委粟今名粟山

又東北石溝水入焉石溝出逢山東北石澗中

山即石膏山麓三成水

經名北洋蓋曰巨洋在南也又東北龍岡水出臨朐東北窰

山東來入焉又北過益都府城東北建德水合南陽水入焉

建德水出府南七里澗俗名七里河水東猶有建德村

道元云建

德出逢山邳泉出平地今按平地之邳泉

在建德水原之東北入建德非入巨洋也

東北康浪水入焉道元云康浪出劇縣西南嶼山西流西流

入巨洋即今香山南狗王河

三齊略曰康浪水在齊城西南十五里康衢側審戚扣牛角歌

于此今臨淄西南泥河澆水皆微細且歌云中有鯉魚長尺半此水豈足當之寰宇記又謂康浪水在淄州皆不可信當

從水又北逕巨昧店耿弇追張步處又東北逕辟閭渾墓俗

名釣魚臺又東北逕故益縣城古別出一支為百尺溝

道元謂西

北入巨淀者此溝也今廢

又北逕壽光縣東北水經云舊有孔子問經石

室即蒼頡墓也堯水入焉堯一名蕤又名青出府東南七十

里角崩山又東北由黑冢泊入海

黑冢泊述征記謂之烏常泛齊人名湖為泛冢即秦

皇望海臺也

余按漢志石膏山洋水所出東北至廣饒入巨淀即

此水也但因北洋而誤其原因支津別出而誤云入巨淀曾

肇南洋橋記乃以洋為南陽非也洋為齊之大川故以巨名

道原元所謂羣書盛言孟堅不應捨大而志小

南陽水 水經註長沙水出逢山北阜世謂之陽水北注濁水

通名為陽而有南陽北陽之論又云逢山即石膏山 余按南

陽水出府城西南二十五里石膏山即逢山之西麓也東北

逕廣縣故城西又東北石井水注之水出劈頭山北流注井

積石高深瀑布而下故曰石井亦謂之石子澗即今之瀑水

澗也時有通塞南陽水又北而東貫益都南北兩城間西逕

表海亭東逕故城陽王廟基古人自廟東塌斷使北注濁水

今復東流十五里合建德水入巨洋

北陽水 漢志曰為山濁水所出東北至廣饒入巨淀水經謂

之北陽亦謂之渙水出府城西南三十里九回山俗名九扈古廣

縣為山也東北逕五龍口又北逕廣固廢城行于絕澗之底

水激而岸峻古諺謂瘦馬不渡李宣謂逼帶京城皆指此也

又北逕堯山東至東陽城北又東北逕石槽城又東北逕歲

臺又北至樂安東北獾河口合女水女水後條又東北入巨淀

曾肇南洋橋記曰俗呼洋水有二曰南洋河今橋所在是也

曰北洋河距城北二里者是也北洋傳記無文今出九回山

入淄水此水不入淄在齊記謂之渙水道原則曰羣書盛言洋水

出臨朐陽水導源廣縣兩縣雖鄰川土不同於事疑焉然則

洋分南北當後魏時已不能知况後世哉今辨之曰羣書盛
言出臨朐者此巨洋也漢志失其源委耳南陽自為長沙水
北洋自為濁水導源廣縣者是也曾氏乃因漢志石膏山之
洋水而以陽為洋誤矣蓋石膏山與逢山連麓長沙水即南陽水
出其西石溝水即北洋水出其東洋水自出臨朐沂山漢志讀如
詳與蜀之洋州同音故水經稱洋水則有巨洋北洋稱陽水
則有南陽北陽稱南陽者無之俗所誤矣四水雖以音同致
疑源流可攷惜乎曾氏之不察也

天齊淵 漢志曰齊所以為齊以天齊也秦祠八神一曰天主

祠天齊天齊淵居臨淄南郊山下五泉並出南郊山即牛山
也按此淵在臨淄東南八里淄水之東女水之西平地出泉
廣可半畝土人名曰龍池西南流入淄水牛山在淄水南遙
以為志耳蘇林註曰當天中央齊也顏監曰謂其衆神異如
天之腹齊齊記補引晏子曰吾聞江深五里海深十里此淵
與天齊淵中浮出瓦有天齊字魏永平中水潰出木五北齊
天保中又出木四皆五采類松柏而香構亭水上臨淄俗上
已被禱于此有神祠曰休應之廟余按六書故齊本作𠄎亦作
𠄎象禾穀之秀齊也引之為整齊齊一又為國名借為人之

腹齊莊子達生篇曰與齊俱入與汨俱出齊者水之旋紋今人謂之旋窠狀類腹齊豈淵泉並出旋流如齊以其祠天稱曰天齊邪抑天然淵水猶曰齊之天淵云耳且臨淄非天地之中何謂天之腹齊深與天齊尤覺誕妄

女水 水經云出東安平縣地頭山又名鼎足山今臨淄東南十五里俗呼二王家者因山兩墳謂是桓公與其女之冢水出冢側因以名焉然此水通塞不常出則逕石槽城東北入北陽水水經云女水至安平城南伏流十五里然後更注陽水今石槽城古安平東北平地出泉俗名馬臺河至樂安東北

獲河口合北陽水入巨淀土人云此即二王家水伏流者未知是否齊記補引黃石公記云東海龍女隱于此石室尚存將還作此水甚有神焉化降則水生政薄則津竭述征記亦有此說恐未必然通鑑作汝水南燕汝水竭即此水也

汶水 水經出朱虛縣小泰山今沂山絕頂穆妃陵側有瀑布

泉懸百丈崖而下即汶水也東流循鳳凰嶺折而北經大峴

山陰峴水入焉穆陵關北之水又北逕蔣峪口有水出峪中西來入

焉水經有崕山水以又北逕龜山陰山形如龜臨水乃折而東逕柴

阜水經注阜南管寧又東北逕安丘南阜山水經注山又東

冢阜北邠原冢

西孫嵩冢

北逕安丘城西又東北入于濰水經註古淳于縣濰汶交會處是也顏監曰前

言汶水出萊蕪入濟今此又言出朱虛入濰將桑欽所說有

異或者有二汶乎余按入濟之汶見禹貢論語之汶上書傳

謂之北汶即今大清河入濰之汶見漢書入沂之汶見水經

齊有三汶清河為大述征記泰山郡水皆名汶有北汶贏汶柴汶牟汶皆源別流同又在三汶之外

丹水 竹書云堯放丹朱於丹水朱虛縣有丹山一名凡山黃

帝所禪又名堯山下帶長阪曰破車峴東西二丹水出焉記

謂丹朱弄兵之所今按西丹出丹山在臨朐縣東北三十里

東丹出方山在丹山東北寰宇記丹山角崩方山遠望正方二水皆北流至

昌樂廢城西北乃相合通名為丹河北入于海寰宇記丹水入昌樂縣界

引以溉田今按齊地泉水可引溉者極多古人陂渠遺迹猶有存者自金人入中原民俗偷惰為政者何慮及此然則史

令所譏豈特西門豹也哉

白狼水 水經註出丹山逕北海郡城東入別畫湖亦曰朕懷

湖東北入海余按白狼有二源一出丹山隋志作白狼山一出北海

縣南小王莊平地泉湧如輪上源合此始大逕濰州東門外

古有石梁金泰和間僧普濟所修遺迹尚存又東北過寒亭

合溉水入湖由湖入海溉水出塔山寰宇記云山形如塔又名溉源山即今

東虞河以州西有西虞河故此云東西虞出黃山又有朱流

河出方山七里河出蒙姑山三水皆在州西北流入海

巨淀馬車瀆 漢志曰為山濁水所出東北至廣饒入鉅定又

曰馬車瀆首受鉅定東北至琅槐入海定作淀水澤名縣因

氏焉即今樂安東北清水汨也北出為馬車瀆今高家港也

淄水濁水入巨淀時水入馬車瀆同歸于海南洋橋記乃以

鉅淀為巨洱河今巨洱自壽光東北入黑冢泊巨淀馬車在

壽光西北相去六十餘里不合漢書首受鉅定之文濁水亦

無入巨洱之理會子開誤矣溝洫志東海引鉅定溉田鉅定

南定者渠即漢武所耕處非東海地

膠水 水經云出黔陬膠山今膠州膠西縣西南鐵楸山也北

逕密州東北鹵山古名五弩山鹵水入焉寰宇記膠水出密州諸城縣東崦山

或亦曰膠水出鹵山皆非是又北逕高密縣東北入都樂都樂者水經謂

之夷安潭秦地圖謂之劇清池即古獫狁澤也張奴水出高

密東阜下亦注此澤自澤北出注新河張奴水一名墨水由

河北入于海其東北入海者膠水之故道差淺而新河為經

流新河者至元初萊人姚演建言首起膠西縣東陳村海口

自東南趨西北鑿陸地數百里欲通漕直固海口數年而罷

余嘗乘傳過之詢土人云此河為海沙所壅又水潦積淤終

不能通徒殘人耳演真鄭國之罪人也

姑尤水 左傳昭二十年姑尤以西注齊東界姑水尤水皆在

城陽郡東南入海今按沽水有二曰大沽河出黃縣南躡狗

山俗名狗兒山曰小沽河出萊州南馬鞍山二水俱南流逕膠水

縣東南朱毛城東朱毛即古即墨城乃相合通名為沽河至膠州東

南入海沽水起北海至南海行三百餘里絕齊東界故曰姑

尤以西尤即小沽河耳

沂水 鄭康成云沂水出沂山水經云出蓋縣艾山寰宇記艾山一名臨

樂山在新泰縣東北三十里道元則曰沂有二源一出祚泉山一出魚窮

山余按今蒙陰縣東北地名南河川小阜之下有曰狗泉泉傍

神祠塑黑狗不知何據疑此則臨樂山也此沂源也東南逕馬頭固山有泉東流

與之合北望沂山五十里殊無別源據周禮沂山因沂水得

名康成又齊之大儒不應有誤疑沂山水源古流今竭耳沂

水過馬頭固南流逕蓋縣故城又南至沂水縣城西又南至

河陽村桑泉水西來入焉道元云桑泉出五女山南流納堂

阜水即今蒙陰東北憚阜大小二河也又南合蒙陰水通名

為汶河東注沂水經桑泉亦稱汶故今云沂水又南逕諸葛城又南逕王

祥墓孝感水入焉其水出墓西成溝湖剖冰躍鯉之地又南

至沂州城東小沂水西來入焉小沂出蒙山西東過費縣神
山納初水初出縣南關陽川至沂州西又分為涑水涑自州
城西小沂自城北俱入沂宋慶曆間沂州修城碑云大小二
沂環流外轉而小沂尤湍于西北平日波如簞紋清淺可愛
及山雨水至如百萬陣馬摩壘而來謂此水也沂水又南分
流入三十六穴湖東通沫水詳見沫水條又南逕古郟城又
南至下邳入泗下邳古城在今邳州南道元云沂水至下邳
分為二一自城北趨西南入泗一自城之東南入泗東沂水
上有橋郡國志謂徐泗間呼為圮音怡子房遇黃石公進履
之長利池

處今入泗者西沂耳

沫水 水經註大弁山與小泰山連麓沫水出焉大弁今訛漢

志謂之術水元和志云俗名連水出沂山東麓經大峴山峴

水入焉穆陵關南又南至老牛嶺嶺長二折而東逕嶼山嶼

水入焉嶼水出嶼山水經謂之箕水又南至洛山洛水西來

入焉洛水出壇頭山又南逕莒州城東又南沙河水西來入

焉沙河首受西湖水湖受黃華諸水皆莒城西北羣山泉瀦

為湖又南溫泉西來入焉泉出沂州東北陽山古名溫水阪

也非又東逕倉山道元云山上有鹽官城即漢封劉釘之利馬

城武陽溝水出此東入沫今屬贛榆縣

嶺羽山

經蘇山也元和志在臨沂縣東南百十里是也

由吾

寰宇記巨平山南有由吾廟隋文帝徵道士由

吾拜諫議大夫卒葬此山水經又云沫水經司吾山東疑即巨平山也漢有司吾縣

羣山聯絡沫東沂

西夾山而行山峽之間有山口池者俗云禹鑿沂水由三十

六穴湖貫此峽口與沫相通

道元謂辟陽水首受葛陂水又沫者蓋此水也今沂州東北有

葛溝也

又南至沭陽縣入桑堰湖

烏侯切道元謂桑堰水出桑貫東入沫湖因此名元和志

云碩蕩湖在沭陽縣東八十里與朐連水縣三分湖為界今訛作桑口湖

由湖東出入于海沫水

至此正名連水故縣氏焉道元又謂沫水下流古分為二今

南連魏正元中齊王鎮徐州立大堰過水西流西瀆之會置

城防之名曰曲沫戍其流西入淮陽山由下邳入泗余按宋

金相拒宋人亦堰此水乃防北敵遺迹在今海寧沭陽界中

泗水

音加俗作去声讀

泗水有二東泗出沂州西北其山

城內晉照寺有金僧

居山頌碑作其山

南流至卞莊站

國初立站金廢

東分一支入芙蓉湖溉田

數千頃湖在沂州東南芙蓉山下香粳鍾畝古稱琅邪之稻

即此西泗出嶧州東北抱犢山東南流至三合村與東泗合

又有漁溝水出浮丘山合於此故名三合

南貫四湖溉田倍芙蓉又南合武河入

于泗謂之泗口淮泗舟楫通焉元和志云承縣界有陂十三

所皆貞觀以來修立以溉田者今沂嶧二州仰泗承二水溉

田青徐水利莫與為匹皆十三陂之遺迹也武河者疑即漢

志冠石山之武水水經亦謂之小沂上流有故渠俗名文河
土人云浚此渠六十里使武河通沛可避吕梁徐洪之險而
徑達新濟矣徐邳人恐徙河無業每沮之

承水

音澄漢縣名

元和志云承縣以西北承水得名寰宇記云承

治水出縣西北方山王莽改承縣為承治故水有此名今又
訛為承冶本出嶧州北六十里花盤山之車梢峪源曰滄浪
淵淵旁有龍祠宋政和間賜額霖澤廟其水南流合許池泉
今滄浪淵水微細不及獨許池為正源矣承水又南逕州城
西門又南納金注河又東會武河南入于泗承水溉田千餘

頃旁多美竹人賴其利

南梁水

後漢志魯郡蕃縣

蕃音皮

有南梁水道元曰蕃縣東北

平澤泉若輪焉南隣于灑亦謂之西灑水首受蕃縣西注山

陽湖陸二水皆由沛入泗今按南梁水北滕縣荆溝村西南

流至滕州東門外折而過城北又西入山陽湖山陽俗曰刀

陽由湖南出注于泗南有萍水即古灑水出州東高山春秋

魯取邾田自灑水杜注水出東海合鄉縣西南經魯國至高

平湖陸縣入泗蓋此水也又有沙河水出鄒嶧山皆西南流

至山陽湖與南梁相合同入于泗名三河口

般陽水

籠水

水經註作籠水南出長城中寰宇記云古名孝水齊有

孝婦顏文姜事姑孝養遠道取水不以寒暑易心感得靈泉

生於室內文姜常以緝籠蓋之姑怪其須水即得值姜不在

入室祭籠觀之水即噴涌壞其居宅故俗呼為籠水今孝婦

河也出益都縣顏神鎮孝婦祠下

古齊長城踰泰山東亘于此

西逕萊蕪

山陰北注般陽城西般水入焉般亦名左阜水出淄川縣東

南龍山龍灣洞俗名頭河西北流至般陽城東分為二一支

逕城南一支環城西北俱入籠故水經云般陽縣在般水之

陽也籠水又北逕長山縣西又北逕鄒平縣東蒙河水入焉

蒙水俗名沙河出長白山葫蘆峪水經謂之魚子溝又北逕

新城縣西又北入小清河

濟南水

灤水

源曰酌突流曰灤東導曰小清

會南豐齊二堂記曰泰山北與齊東南

諸谷之水西北匯于黑水之灣又西北匯于柏崖之灣而至

于渴馬之崖則泊然而止

今黃山下

自崖以北至于歷城之西蓋

五十里有泉湧出高或致數尺名曰酌突之泉齊人謂嘗有

棄糠于黑水灣者見之于此其注而北則謂之灤水春秋桓

公十八年會齊侯于濼是也今府城西平地泉源鬱湧雪濤
數尺聲如隱雷旁合馬跑金線諸泉周可數畝北出又合蜜
脂五龍衆泉並城北流屈而東至城北水門大明湖水出而
注之東北至華不注山合華泉即齊頃公下如華泉取飲者
三齊記云歷山下有無底井
與此泉通山之西南引水溉田水經謂之歷水陂餘波西注大清
曰聽水即今之響河古濼水自華不注山東北入大清河偽
齊劉豫乃導之東行為小清河自歷城東逕章丘鄒平又東
逕般陽之長山新城又東逕高宛至博興合時水東北至馬
車瀆入海曲行幾五百里故自濟南東傳博興南源衆水古

入濟者今並入小清焉 小清為運鹽河初行高苑縣北金
皇統間縣令高通改由縣南長沙溝然此水迂曲上流歧淺
鹽舟多梗議者欲引孝婦水西注上流非計也蓋小清舟不
過欲達大清耳若自博興引渠至蒲臺立堰平原僅五十里
徑達大清矣

大明湖 水經註濼水北為大明湖西有大明寺水成淨池池
上有亭湖水引瀆東入西郭而側城北注又上承東城歷下
泉源競發北流出郭注濼水詳此則大明湖亦源于濼城西
五龍潭側古有北渚亭豈池亭遺迹邪湖今在府城內周十

餘里即歷下泉源競發北流出郭者也歷下名泉有曰金線

釣突 曰皇華曰柳絮曰卧牛東金線 曰東高曰漱玉南金線 曰無

憂曰石灣釣突南 曰酒泉曰湛露無憂西 曰滿井曰北煮糠釣突北

曰北珍珠樓前白雲 曰散水曰溪亭北珠東 曰濯纓北珠西 曰灰泉濯纓

西曰知魚灰泉東南 曰朱砂灰泉西府城內 曰望水萬竹園內

明湖之曰劉氏北珍珠 曰雲樓劉氏南 曰登州曰望水萬竹園內

洗鉢登州北 曰淺井曰馬跑洗鉢西南 曰舜泉舜祠下 曰香泉舜泉西

鑑泉舜泉南 曰杜康南舜廟 曰金虎曰黑虎李承務巷 曰東蜜脂金虎西南

曰西蜜脂東蜜脂西 曰孝感孝感坊內 曰玉環同知巷前 曰羅姑塌行街東

曰混沙曰灰池城西南角場下 曰南珍珠鐵佛巷東 曰芙蓉姜家亭前 曰滴水

又名清泉 曰灰灣曰懸清城西五龍堂東 曰雙桃城西丁字街北 曰溫泉城西

石橋北 曰汝泉神童寺內 曰龍門一名龍泉神童寺東 曰染池龍門東 曰懸泉

中宮 曰都泉中宮東南 曰柳泉曰車泉中宮東遠東莊 曰煮糟四里山南 曰爐

泉南山下 曰白虎曰甘露大佛山 曰林汲佛峪內 曰白泉王舍店北 曰金

沙曰白龍龍洞山中 曰花泉張馬泊 曰獨孤靈巖寺 曰醴泉靈巖嶺北 曰漿

水盤水鎮東南 曰南煮糠蟠山窟北 曰苦苣柳鋪東 曰熨斗黎峪門 曰鹿

泉石固寨 曰龍居長城嶺西 合釣突百脈總七十二見名泉碑然遠

至中宮靈巖諸泉具載而華不注之華泉明水鎮之淨明泉

皆失不取况其名亦未甚雅稱蓋殘金俗筆欽嘗擬會波樓
記略云濟南山水甲齊魯泉甲天下蓋他郡有泉一二數此
獨以百計濤噴珠躍金霏碧渟韻琴筑而味肪醴不殫品狀
在邑者濬市之半在郭者環城之三綦布星流走城北陬匯
于水門東流為灤並於汶過于時入于海可槩見矣

百脈水

水經出土鼓縣故城西元和志出亭山縣東北

亭山在府

城東南九十里

源方百步百泉俱發故曰百脈即繡江源也郡國志

云十二斤溝俗名麻灣出章丘縣南明水驛明水一名淨明
泉出百脈西北石橋邊其泉至潔纖塵不留土人以洗目退

昏翳與西麻灣水合流三里餘入繡江乃東北流逕東陵山
漸章丘東城又北入小清河縣東七里有揚緒水一名獺河
水經云出逢陵故城西南逕章丘城北入濟水今按獺河出
長白山之王村峪經章丘東北入小清河 會南豐齊二堂
記云太山之北與齊東南諸谷之水西北匯于黑水之灣又
西北匯于柏崖之灣而至于渴馬之厓泊然而止至歷城西
湧出趵突之泉嘗有棄糠于黑水灣者見之于此其注而北
謂之灤水齊多甘泉顯名者十數而色味皆同皆灤水之旁
出者蔡氏援此以證濟水之伏破程氏之論當矣又取沈存

中筆談謂歷下發地皆泉濟水經過其下自相矛盾何邪且古濟行清河如在井底南仰泉源遙在山麓豈能相及今黃山渴馬厓水伏而可證又龍洞山中朗公谷諸水東西伏流土人云西發趵突東發百脈驗之信然蓋歷下衆泉皆低陰伏流所發西則趵突為魁東則百脈為冠地勢使然何關於濟存中得之傳聞九峯按圖索駿容有疑誤近官濟南者遂定以灤為濟建濟瀆廟于泉上謬矣

巨合水 水經註巨合水南出雞山北逕巨里故城耿弇討費敢處又北合武原水入濟按巨里在歷城東七十里自宋為

龍山鎮巨合水出鎮南五十里曰榆科泉逕巨里西武原水出鎮南十餘里曰江水泉逕巨里東俗訛為東西巨冶河俱北流五里餘乃相合北入小清河巨合之得名以此道元云巨里三面有城西有深坑坑西即耿弇營蓋二水環遶因崖以城為險固也

大清河

古濟今汶

水經註濟枯渠注巨野澤澤北則清水巨野今

梁山泊也北出為清河古自壽張縣安民亭

亭北對安民山今日安山合

汶水汶出泰安萊蕪縣原山之陽水經謂之北汶西南逕徠山陰又西逕泰山之陽漢武明堂遺跡臨水謂之石汶又

西逕汶上縣北又西逕東平城南其西即安山開間下泥河
口有亭子店古安民亭遺趾清濟與汶合處今開清水南導
任城則清濟不入汶汶自行古清河矣汶水又北逕漁山東
即執子歌之吾山在安山東有漢隄遺跡自西而東屬之麓
山西曹子建冢山東漢黃河故渠又北逕陽穀縣西流水合
狼水入焉又東北逕東阿縣道元云縣東北有清亭春秋隱
四年遇于清以河得名也又東北逕平陰縣廣里保古齊長
城防門河道所由春秋齊侯塹防是也廣里見水經又名光
里又北逕巫山齊侯登以望晉師者俗訛作無兒山山上有

石室水經謂之孝子堂今日郭巨廟清水過此古為涓湖又

東北逕齊河縣縣南門外有梁跨水古朝陽橋遺跡耿弇渡

處齊河縣在宋為耿弇鎮沙溝水出山由茌平縣南來入焉今肥城縣東南有沙

溝鎮以水得名又北逕上灤橋北灤水分響河入焉古名聽水又東北逕

華不注山陰又東逕下灤堰灤水舊入濟處堰南即小清河

又北逕臨邑縣又東北逕陽縣又北逕齊東縣河間路屬縣古東鄒又

東北逕蒲臺縣又東北逕高苑縣北又北逕利津縣城東又

東北入于海水經云濟至古平安為淵渚謂之平州沉又東北至琅槐鄉有古黃河通濟枯渠謂之漂河又

東北入海元和志謂海浦浦旁有一沙阜高大餘俗呼鬪口淀濟水入海與海潮相關故名淀上有井極甘海潮不能沒

朱子韓文考異曰按水經河水至東阿荏平等縣東北流四瀆津灌注之河水東分濟水受河蓋滎口水斷不通始自是出與清水合昔趙殺鳴犢孔子臨河而嘆作歌曰狄之水分風揚波舟楫顛倒更相加歸來歸來胡為期按臨濟故狄也是濟所經得其通稱詳此則是濟水自滎澤之下潛流至此四瀆津口而復出河又東分一支與之合流以過臨濟而為狄水然此皆齊地在今濟鄆之間史記以為孔子自衛將西見趙簡子則其道不當出此此又不可曉者今姑闕之以俟深於地理者考焉欽按漢陳留郡平丘縣有臨濟亭故狄也

蓋濟水出陶丘北南瀆被孟豬北瀆注巨野亭臨此瀆故曰臨濟春秋時狄人據此因以名焉此水夫子所歌至王莽時枯竭水經所謂濟枯渠注巨野者也其自巨野北出至四瀆津與河合流者乃齊之清河水經所謂得其通稱者是也漢千葉別有狄縣安帝更名臨濟唐又別以漢東朝陽為臨濟今章丘縣之臨濟鎮也文公蓋疑于此云

古河 朱文公九歌註曰禹治河至兗州分為九道以殺其溢其間相去二百餘里徒駭最北鬲津最南徒駭是河之本道東出分為八枝也胡氏大記曰大陸澤北九河之地平延漫

流易淤故禹多與之地使下流通曠齊桓擅一時之利適河
行徒駭因以八河之地充樹藝立城邑下流始迫溢為患欽
按河過大陸趨海勢大土平遷徙不常自播為九禹因而疏
之非河獨行經流禹於旁近支鑿以殺其溢也禹後歷三代
至齊桓時千五百餘年矣支流漸絕經流獨行亦理勢如此
非齊桓冒曲防之禁故塞九河實九河自為平陸可樹藝耳
至定王五年河遂南徙矜磔漢世漸決而南元帝永光中決
於清河分流入博州後又決於平原乃東入青齊二州之境
遂由漯川與濟並行入海宋紹熙以後乃南連大野并泗入

淮金初又改由渦近歲復由泗入淮河濁淮泗俱清清淮勢
大可以吞伏故下流無淤塞之患惟汴宋之郊盤屈平壤潰
決如故自定王以來又千百餘年河自北而南徙千餘里
今按桑田之地講求變遷之陵谷欲盡合古書難矣漢世去

古未遠河隄都尉許商言九河故道謂徒駭在成平

金獻州
樂壽縣

景城鎮古

有成平城胡蘇在東光

今景州東光縣東連
滄州古有胡蘇亭

鬲津在鬲縣

有鬲

縣城曰太史曰馬頰曰覆釜在東光之北成平之南曰簡曰

潔曰鈎盤在東光之南鬲縣之北斯言簡而近實後世圖志
雖詳反見淆亂欽嘗往來燕齊西道河間東履清滄熟訪九

河故道蓋昔北流衡漳注之今之御河漢初猶入河漢魏時名漳水隋唐以來名御河

既東徙漳自入海安知北流之漳非古徒駭河歟宋會要神宗熙寧三年議開御河臣察奏云可于恩州武城縣開約二十餘里入

黃河北流故道下五股河詳此則御河入黃河北流故道無

也踰漳而南清滄二州之間有古河隄岸數重地皆沮如沙

鹵太史等河當在其地滄州之南有大連澱今曰大梁五龍堂宋碑作大連

疑即隋末羣盜所據之豆子甃也西踰東光東至海此非胡蘇河歟澱南至

西無棣縣百餘里間有曰大河曰沙河皆瀕古隄縣北地名

八會口土人云因河會得名縣城南枕無棣溝茲非簡潔等河歟無棣溝通

海隋末廢塞唐薛元昺問之百姓歌曰新河得通舟楫利直達滄海魚鹽至昔日徒行今騁駟羨哉薛公德滂被凡此溝

澱今皆為鹽司堰塞平時潛水不通終遇雷雨水即潰溢故

河間清滄之地常被水害無有寧歲吾友伯荅爾都水嘗言

撥丁河數場醴課與山東運司帶辦廢堰泄水則河間永無患矣執政無識竟沮之良可歎矣東無棣縣北

有陷河濶數里西通德棣東至海茲非所謂鉤盤河歟德州有盤

鎮濱州北有士傷河西踰德棣東至海茲非鬲津河歟士傷

河最南比他河差狹是為鬲津無疑也所謂士傷者土人云昔日戰場因傷賢人

故云按水經漢安帝時劇縣賊畢豪等乘船寇平原縣令劉雄門下小吏所輔浮舟追至厭次津戰敗為賊所擒輔求代

此津蓋此河也雄豪縱雄殺輔於蔡氏書傳乃曰自漢以來講求九河皆無

依據祖王橫之言引碣石為證謂九河已淪於海欽按禹貢

文北過泲水至於大陸又北播為九河同為逆河入于海大

陸在邢趙深三州之地爾雅之廣河澤也去海岸已數百里

大陸又曰鉅鹿呂氏春秋曰鉅鹿之北遂分為九河路史云九河始元城大名縣西三里有故瀆鄭夾際謂大陸非趙地之廣河澤乃没郡之吳澤也如此則又遠之矣又東至海中始叙九河則大陸與九

河相離千里如是之遠而絕無表志不合禹貢之文其不可

信一也王橫謂海溢出浸數百里而青兗營平郡邑不聞有

漂没之處而獨浸九河其不可信二也今平原迤北清滄之間

雖為樹藝城邑相望而地形河勢高隱曲折往往可尋但禹

初為九厥後或三或五遷變多寡不同必欲按名而索故致

後儒紛紛之論不得不辨

海

海岱惟青州謂東北跨海西南距岱跨小海也本名渤海

亦謂之渤海別枝名也蓋太行恒嶽北徼之山循塞東入

朝鮮麗今高麗海限塞山有此一曲北自平州碣石南至登州沙

門島是謂渤海之口濶五百里西入直沽幾千里焉漢王橫

乃謂九河之地淪為小海然則唐虞之時青州跨海者跨何

海邪且海溢出浸數百里河自秦漢以來青兗營平郡縣不

聞有漂没之者足證橫失海溢者有之橫言之過也近世蔡

氏書傳金履祥通鑑前編皆祖橫說又謂小海所淪青兗北

境悉非全壤豈二州北境有荒漠棄地為海所漸而歷代信

史不之書邪無是理也蓋因委九河於海中指碣石在海外
遂有此論今青境無缺茲不必辨古兗之地自今濟南以西
北包濱棗滄瀛帶雄鄭西襟深奠南遠曹濮東括魯鄆四至
亦不狹矣在春秋戰國其地爪分後世從而小之未詳考也
金氏又云碣石有二在高麗者曰左碣石在平州者正禹貢
之右碣石也乃今沙門島對岸之鐵山正當渤海之口果為
右碣石則唐虞之時青兗東北直岸大海無渤海矣此又可
信邪今齊境東南則日照即墨膠州正東則寧海登州皆岸
大海東北則萊濰昌邑正北則博興壽光西北則濱棗二州

皆岸渤海云

齊乘卷之三

郡邑



郡人于欽思容纂

禹貢別州以山川定經界後世地理宗之漢志主於郡國凡山川事蹟附於州縣之內世史宗之齊乘者地理之書也其於山川則法禹貢導之而未盡者依史例亦附見於郡邑之下云

益都路 禹貢青徐二州之域春秋戰國之齊及魯東楚北之境秦齊郡琅邪之地漢初子肥王齊有七十二城都於臨淄



後置青州刺史領郡國有九此為齊郡北海千乘及徐之琅邪東海郡地武帝封子闕為齊王策曰嗚呼小子闕受茲青社蓋古者以太社五色土隨方封國使立社故齊有青社之稱後漢魏晉又為齊國樂安高密城陽郡地而青州刺史並理臨淄永嘉之亂刺史苟晞棄青州漢將曹窋據之以臨淄平夷難以禦敵乃於堯山南築廣固城以居降於東晉尋為石勒所陷後為段龕所據自稱齊王慕容恪滅趙克青州符堅并燕盡有齊地堅敗符朗以州降晉改置幽州以辟閭渾為刺史鎮廣固隆安四年為慕容德所陷德都廣固稱南燕

至子超為劉裕所滅裕留羊穆之為刺史夷廣固城而歸穆之乃築東陽城為青州宋置青州初理歷城後理東陽又移理臨淄後併冀州琅邪皆沒於元魏魏置青州及北徐州高齊因之宇文周并齊置齊郡樂安北海改北徐為沂州隋並廢之大業初復為北海高密琅邪三郡之地唐武德二年置青州總管府領州八此為青密沂三州屬河南道七年改為都督府天寶元年罷都督府改為北海郡乾元元年復為青州置平盧淄青節度石晉開運初為防禦州天福十二年復為平盧節度宋為青密濰沂四州屬京東東路淳化五年改

青州為鎮海軍

按會要太宗命曹彬為青州節度使中書奏云唐乾元中侯希逸為平盧節度本平州之

地屢為賊所迫

希逸率將士破賊又為奚虜所侵乃拔其軍

二萬餘人且戰且行

達青州詔就加希逸為平盧淄青節度

使自是迄今

淄青節鎮皆帶平盧之名今青州頗為重地請

以鎮海為額

從之詔曰眷彼營丘控於東夏太公開四履之

地小白舉九合之師

忠烈猶存風流可尚宜改總開寶五年

戎之號用旌表海之邦

青州平盧軍改為鎮海軍

升密州為安化軍節度元祐三年改安化為臨海軍政和元

年以青州為齊郡金初屬偽齊後升為益都府大抵魏晉已

前青州總治金齊為方牧之寄隋唐以降止同列郡故金太

常卿范拱中和堂記云漢興田肯陳東秦形勝高祖納之大

封同姓逮至有唐分天下為十道以青隸河南止稱北海郡

舉全齊之都會委之庶僚不擇重臣以為方伯此規畫之失

也宋懲唐失升為帥藩總治八州由是益都復為重鎮然不

升府號尚處濟南東平之下亦未為得也金於是始建府名

立東路總管以十三州隸焉愚按此說非是漢祖初定天下

三齊之地與關中懸隔千里非親子弟勿王懲信布也然封

三庶孽分天下半亦足致亂漢初制度未必盡善唐之十道

先儒謂遠不畔古近不違今其後禍亂猶階藩鎮唐制豈短

於宋乎國初沿金制以東齊業李全父子遂致跋扈擇重

臣為方伯豈長策乎今益都以東傳海皆割入寧海般陽南

則益以滕嶧東西不數百里南北僅千里焉此亦犬牙之勢也元領散府一州十三縣三十六司候錄事司各四癸丑年廢各州錄事司候入倚郭縣丁巳年行長山縣廢入高苑縣至元二年割登萊二州八縣入般陽廢行淄州淄川縣入益都縣行泰安州泰安縣入沂水縣蘭陵縣入嶧州三年廢益都散府入本路昌樂縣入北海縣九年割出寧海州及牟平文登二縣延祐三年增置蒙陰縣今領州八錄事司一縣二十一隸府者六隸州者十有五東至即墨五百七十里西至般陽路一百四十里南至邳州七百八十里北至濱州利

津縣二百一十里東南到淮安路海寧州六百四十里東北到海二百一十里西南到濟寧路八百里西北到河間路六百五十里到大都驛程一千三百五十里徑九百里府城五門周二十里俗稱南陽城北城為東陽城東西長而南北狹兩城相對抱洋如偃月因洋以為隍因其崖以為壁蓋古者合為一城或皆羊穆之所築或後人增葺未可知也輿地記曰北齊移益都縣入青州以城北門外為治所唐通典曰今之青州理在益都縣歐陽公表海亭詩注曰南洋北洋河一在州中一在城外曾肇南洋橋記曰東陽城府治之北城

也由此推之明是一城古昔金盛之時初無棄地靖康兵燹之餘金人止據北城立府後徙南城遂為瓦礫之區耳齊記補曰天會中北城頽廢移州治南陽城為益都府愚按南陽酈道元通為水名北齊嘗為龍興寺名其為城名不知所據天會金太宗之年齊記補謂是章宗時臨淄李餘慶之輩餘慶爵至開國編書如此則女直之文獻可知已或云後人託名以傳未必然也

錄事司 司府城內戶役初本路及沂密二州皆設錄事司濰膠莒滕四州皆設司候司癸丑年並廢入倚郭縣惟隨路置焉

益都縣中

倚郭本漢侯國武帝封菑川王子胡為益都侯故

城在壽光縣南今縣境乃西漢廣縣地屬齊郡晉廢廣縣曹寢築廣固羊穆之築東陽皆其地元魏於壽光益城置益都縣高齊移入青州城北門外為治所隋之北海郡唐宋之青州並理此宋以前止為縣名金因升為府雖仍置縣屬焉國朝因之至元二年廢臨淄臨朐二縣并顏神鎮之行淄川縣入此縣後復置臨淄臨朐二縣顏神鎮止設巡檢而來縣焉初以北門外為治所後移府城

臨淄縣下

府北五十里古營丘齊都也晏子曰先君太公築

營之丘謂築邑此地漢初齊悼惠王都此後置齊郡後漢魏
晉為齊國青州理此元魏為齊郡高齊廢入益都縣隋開皇
十六年移高陽縣理此改為臨淄縣屬北海郡唐宋並屬青
州金屬益都府 國朝至元三年廢入益都縣十五年復置
元和志云縣理即臨淄古城然則唐縣在古城今縣理小城相去僅十里疑亦金亂所徙

臨朐縣

下

府南四十五里古伯氏駢邑縣北七里有伯氏冢

通典云古東陽城一名几城左傳晏弱城東陽者是也漢置
臨朐縣屬齊郡以縣東朐山取名晉省入昌國縣隋開皇六
年改為逢山縣大業初改曰臨朐屬北海郡唐宋並屬青州

金屬益都府

國朝至元二年廢入益都縣十五年復

高苑縣

下

府西北百六十里漢初封丙猜為高苑侯後為縣

屬千乘郡後漢晉屬樂安國高齊改曰長樂隋開皇十八年
改曰會城大業初復曰高苑屬齊郡取高苑故城為名唐宋
並屬淄州宋景德三年以縣置宣化軍熙寧三年軍廢縣復
來隸即縣置宣化軍使金亦屬淄州 國初屬行淄州至元
二年行淄州廢始來隸通典有漢被陽城又為狄縣地田儼
兄弟殺狄令起此安帝永初二年改狄為臨濟其後省入高
苑故城在縣南

樂安縣下 府北九十里漢千乘郡樂安縣元帝封丞相匡衡

樂安侯後漢屬樂安國晉屬樂安郡隋省入千乘縣開皇三

年移於廣饒城屬青州今縣理也唐武德二年於此置乘州

八年廢之縣仍屬青州宋因之金改曰樂安屬益都

壽光縣下 府東北七十里應劭曰古斟灌國禹後也古城在縣東詳

見古漢為壽光縣屬北海郡文帝十八年置菑川國後漢併

入北海菑川故城在縣西隋開皇六年於縣北十里博昌故

城置壽光縣唐初屬乘州後屬青州宋因之金屬益都

博興州下 府西北百四十里古薄姑地東南有薄姑城與漢

博昌城相近十三州記云昌水其勢平博漢置博昌縣屬樂

安國高齊省之移樂陵縣理此寰宇記樂陵故城在縣東十二里隋開皇十

六年後為博昌屬北海唐屬青州五代唐避李國昌諱改曰

博興宋金因之歷代止為縣 國朝升為州

濰州下 府東百三十里春秋戰國皆屬齊秦屬齊郡漢平壽

縣及下密桑犢地屬北海郡後漢省桑犢餘屬北海國晉為

濟南郡輿地記曰晉濟南郡領平壽下密膠東即墨祝柯五縣而以平壽為郡治考其屬邑乃漢北海平原膠東

地非濟南地也元魏復北海郡高齊改高陽郡隋開皇十六年置濰

州大業末年因賊陷俱廢唐武德三年復置濰州領北海連

水平壽華池成都下密東陽寒亭濰水文陽膠東營丘華苑
昌安都昌城平十七縣後六年唯存北海營丘下密三縣餘
並廢八年州與營丘下密二縣亦廢惟以北海縣屬青州宋
建隆三年置北海軍乾德三年升為濰州政和元年又改為
北海軍金復置濰州屬益都元領縣三昌樂廢領縣二曰北
海曰昌邑以北海為治所

北海縣下 倚郭應劭曰古斟尋國禹後也漢為平壽縣屬北
海郡又有斟縣後漢屬北海國晉以平壽置濟南郡元魏復
以為北海郡高齊改曰高陽隋初罷郡置下密縣於廢郡城

開皇十六年於縣置濰州大業末州廢移下密於此置北海
縣唐武德二年以縣置濰州八年州廢省下密入北海屬青
州宋初屬北海軍後屬濰州金因之 國朝至元三年廢昌
樂縣入焉按昌樂即漢之營陵縣廢城在縣東元魏時嘗曰
營丘非臨淄之營丘也

昌邑縣下 州東七十五里古鄆城左傳莊公元年齊遷紀之

鄆城漢志云在都昌西此漢都昌縣屬北海郡高祖六年封

宋軫為都昌侯後漢屬北海國古城在縣南寰宇記曰都昌

漢魏晉為縣後廢今為昌邑縣又云都昌漢史立昌邑縣魏
晉因之按漢志武帝天漢四年更山陽為昌邑國楊震傳昌

邑故城在兗州金鄉縣西北不應在此何故自相
矛盾故俚俗因此誤以為昌邑令王審懷金之地
隋曰昌都
唐廢入北海縣宋乾德間即唐安鄉建昌邑縣屬濰州金皇
統題

名碑縣邑拒海五十里濰水之下流也韓信傳又曰臺昌漢
末孔北海為黃巾賊管亥所圍太史慈約昭烈救之於此

密州下 府東南二百八十里戰國齊地秦為琅邪郡漢為琅

邪高密城陽三郡地後漢屬琅邪北海國晉屬城陽郡元魏

屬高密永安二年改置膠州隋開皇五年改為密州大業初

州廢復為高密郡五代漢為防禦州宋因之開寶五年升安

化軍節度元祐三年改臨海軍領縣五金割莒縣置莒州領

縣四 國朝以膠州高密二縣置膠州領縣二曰諸城曰安

丘以諸城為治所州理有中外二城外城漢東武城也其中

諸城縣下 倚郭左傳莊公廿九年城諸古城在縣西漢為東

武琅邪之郡治後漢屬琅邪國晉屬東莞郡元魏屬高密郡

隋開皇三年罷郡屬膠州五年改膠州為密州縣仍屬焉十

八年改東武為諸城縣大業初復屬高密郡唐屬密州宋金

皆因之

安丘縣下 州西百二十里古根牟國漢高初封張說為安丘

侯後置縣有兩安丘一在北海一在琅邪後漢止在北海曰

古渠丘今縣鄰北海非琅邪之安丘矣元魏屬東莞郡宋屬南平昌元魏屬膠州高齊天保七年省隋開皇十六年分昌安縣於年鄉城置年山縣年鄉古根年國也大業二年省昌安改年山為安丘縣三年移於漢平昌城唐武德六年移今理乾元二年以安祿山亂改名輔唐五代梁開平二年復為復為安丘後唐又名輔唐石晉避諱改曰膠西宋開寶四年復曰安丘金因之並屬密州

膠州下

府東三百五十里本漢琅邪郡黔陬高密不其縣地後漢屬北海國晉屬城陽元魏置膠州於高密郡隋開皇初

改膠州為密州並理諸城十六年置膠西縣屬高密郡唐武德元年省膠西入高密以其地為板橋鎮宋元祐三年復置膠西縣移臨海軍理此金亦為膠西縣屬密州 國朝至元廿四年以縣置膠州以高密即墨來隸

膠西縣中

倚郭古介葛盧國左傳襄公廿四年齊崔杼伐莒

侵介根杜注云黔陬東北討基城號介國漢文帝分齊立膠西國封悼惠子卬為膠西王都高密此漢黔陬縣地晉屬城陽元魏屬高密後屬平昌郡隋置膠西縣大業初省黔陬入焉唐省入高密以其地為板橋鎮宋元祐三年復置屬密州

又移臨海軍理此金因之大德年間東嶽廟碑云臨海軍治膠西為東武劇邑蓋控東南海道風飄信宿可至吳楚

高密縣下 州西北五十里禹初封國春秋萊之夷維邑也漢即

夷安漢文帝十六年置膠西國宣帝本始元年更名高密光武封鄧禹為高密侯地屬北海宋孝武併北海後屬高密高

齊省之隋復置屬密州大業初罷州復屬高密郡唐武德六

年移高密治夷安城亦屬密州宋金因之漢淳于縣本春秋之州國高齊省入高密曹參傳又為假密濰水所經信參擊

龍且地

即墨縣 州東北百二十里戰國田單所守城臨墨水故名

漢即墨縣屬膠東國後漢即墨國屬北海郡晉屬濟北郡高

齊省之隋開皇十六年於古不期城東北二十里置今縣屬

萊州 古即墨城在今唐宋金因之

莒州下 府東南三百二十里本漢琅邪東莞東安地晉改東

安為沂水縣又為南青州宇文周改曰莒州皆在沂水縣隋

大業初廢之唐武德五年置莒州貞觀八年廢以莒縣屬密

州沂水屬沂州宋因之金升莒縣為莒州屬益都府改日照

鎮為縣併沂水來隸 國朝因之又析沂水置蒙陰領縣四

曰莒曰沂水曰日照曰蒙陰以莒為治所

莒縣下

倚郭古莒國地志曰周武王封少昊之裔茲興於莒

始都計

膠州南計斤城

春秋隱二年莒人入向向莒縣也傳三十世

至子朱號渠丘公為楚簡王所滅地入于齊燕樂毅破齊惟

聊即墨莒三城不下漢莒縣屬城陽國文帝封朱虛侯章為

城陽王都莒光武併入琅邪魏城陽郡徙治東武莒仍屬焉

晉太康十年割莒縣屬東莞惠帝徙東莞郡理莒城南燕桓

遵為徐州刺史鎮莒劉裕北伐遵舉城降元魏亦以莒屬東

莞高齊罷東莞郡以莒東莞二縣屬東安隋開皇初屬莒州

大業初屬琅邪郡唐武德五年屬莒州貞觀八年屬密州宋

因之至金置莒州以縣屬

沂水縣下

本春秋莒魯所爭之鄆邑十三州記曰魯昭公所

居為西鄆在東平莒魯所爭為東鄆在此杜預亦云城陽姑

幕縣南有員亭俗變其字即鄆也漢為東莞縣即今縣城南

燕於此置縣元魏孝文改為新泰隋開皇四年改曰東安十

六年於古蓋城別置東安以此為沂水縣屬琅邪郡唐宋並

屬沂州金屬莒州國朝至元二年廢行新泰縣入此延祐

三年復析置蒙陰

州西北七十里

日照縣下 州東南百五十里海濱十里蓋漢海曲之地宋元
祐二年置日照鎮屬密州金升為縣屬莒州南接淮安贛榆
縣界有孤奎石駝山

蒙陰縣下 州西北二百二十里蒙山北二十五里漢屬泰山
郡後漢省之晉復置屬琅邪高齊省入新泰縣唐初置泰山
後亦廢入新泰宋金因之 國朝至元二年廢行新泰縣延
祐三年析沂水之新寨鎮置此縣

沂州下 府南五百里春秋齊魯二國之境秦漢琅邪東海郡
地初呂后封劉澤為琅邪王文帝徙澤王燕以琅邪為郡領

縣五十一後漢後為國封皇子京為琅邪王自諸城徙都開
陽故城是也晉武咸寧三年改封東莞王佃王琅邪薨子覲
嗣薨子睿嗣是為東晉元帝即位于江東於琅邪郡城東北
置發干戍以南軍鎮之後為石勒所陷乃於丹陽江乘縣別
立南琅邪郡元魏莊帝置北徐州即今州理城也宇文周改
為沂州隋改為琅邪郡大業末為徐圓朗所據唐武德四年
平圓朗置沂州天寶元年復為琅邪郡宋金並為沂州沂水
經其東南淮泗舟楫通焉領縣二曰臨沂曰費以臨沂為治
所

臨沂縣中 倚郭本魯地春秋城中丘在縣東北漢屬東海郡

後漢及晉屬琅邪國元魏改屬郟郡高齊省隋開皇十六年

置臨沂縣於古后城在今縣東二十六里大業二年移縣於州理唐屬

沂州宋金因之

費縣下 州西北九十里魯季氏之邑漢為縣屬東海後漢為

國屬泰山晉屬琅邪國自宋至隋並屬琅邪郡大業末為賊

所破唐武德四年重置屬沂州寰宇記曰漢費縣理祊城元

魏太和間自祊城移縣理陽口山隋開皇三年復移入祊城

今縣理是也

嶧州下

府西南七百五十里古鄆國通志曰鄆亦作繪如姓

子爵夏少康封其少子曲烈於鄆傳國至春秋襄公五年莒

滅之鄆太子巫仕魯去邑為會曾哲曾參其後也古鄆城在

州東八十里此漢承縣地也胡氏大紀曰莒女為鄆夫人取

莒公子為後與黃歇進李園之妹於楚王呂不韋獻邯鄲之姬於秦公子其事雖

殊其欲滅人之祀而有其國則一也故書莒滅鄆漢承縣屬

東海郡承時晉惠帝分東海郡之蘭陵承戚合鄉昌慮五縣

置蘭陵郡理承縣隋開皇三年罷郡以承縣屬徐州十六年

以縣置鄆州大業二年省鄆州及承縣移蘭陵置於廢鄆州

城屬徐州後為山賊左君衡所破唐武德四年復置鄆州又

改蘭陵為承縣貞觀六年廢鄆州以縣屬沂州宋因之唐承
理鄆州城至今改曰蘭陵屬邳州國朝升嶧州初以蘭陵
宋移理今縣為倚郭縣至元二年省

滕州下 府西南八百里漢晉蕃音鄆二縣地屬魯國唐宋則

徐兗二州之縣金始置滕州屬東平府元領縣三至元初割
沛縣入濟寧路領縣二曰滕曰鄆以滕為治所


滕縣下 倚郭古滕國小邾左傳曰邾雍曹滕文之昭也文王
子錯叔繡所封三十二世為齊所滅漢初夏侯嬰為滕令號
滕公因秦縣也後置蕃縣屬魯國至武帝移置公丘屬沛郡

晉廢公丘入蕃還屬魯國又置蕃郡高齊廢之隋以其為滕
舊都故改蕃為滕縣屬彭城唐屬徐州宋屬鄆州金以縣置
滕州

鄆縣下 州北百里古邾國通志云顯帝玄孫陸終氏第五子

晏安賜姓曹封於邾子孫以邾為姓周武王封晏安之裔邾
挾為附庸自挾至儀父十二世始見春秋儀父附從齊桓定
霸有功進爵稱子十四世邾文公遷於繹改稱鄆趙臺卿曰
至孟子時改曰鄆矣此說非也按六書故邾鄆同聲之轉也
春秋時邾莒用夷故邾謂之邾婁婁有二音合閏音為邾合

樓音為郟此本邾國耳後為楚宣王所滅遷之江夏故黃州
黃岡縣有邾城古鄒國則別見濟南此縣兩漢屬魯國晉廢
南平陽入此縣屬魯郡隋因之唐屬兗州宋屬龍慶府金屬
東平府



般陽府路 禹貢青州之域萊夷作牧之地周禮職方之幽州
春秋戰國之齊秦屬齊郡漢晉則為濟南樂安東萊郡地元
魏高齊為東清河郡及光州東牟之境隋屬齊郡及淄萊二
州大業初淄州併入齊郡萊州為東萊郡唐武德元年置淄
州四年置萊登二州天寶元年廢淄州為淄川縣改萊州為
東萊郡登州為東牟郡並屬河南道宋置淄萊登三州屬京
東東路金屬益都 國初淄州屬濟南登萊屬益都中統五
年置淄州路登萊二州來繇至元二年改為淄萊路廿四年
改為般陽府路元領縣六至元初割鄒平屬濟南高苑屬益

都二州帶入八縣合領州二錄事司一縣十二縣府者四縣
州者八 東到益都路百四十里西到濟南路二百二十里
南到萊蕪縣百六十里北到高苑縣百三十里東北到臨淄
縣九十里東南到沂水縣二百五十里西南到泰安州二百
六十里西北到青城縣百五十五里到大都驛程千二百一
十里

錄事司 沿革與益都路同

淄川縣 中 倚郭本漢般陽縣在般水之陽屬濟南郡後漢屬

齊國晉省之宋元嘉五年改貝丘縣於縣置清河郡高齊廢

郡以貝丘屬齊州隋開皇十六年以縣置淄州十八年改貝
丘為淄川縣大業初州廢縣屬齊州唐武德元年復置淄州
縣屬焉又析置長白縣六年省宋金竝因之

長山縣 中 府北六十五里古於陵地 按史記索隱曰孟子云

以為不義乃適楚居於陵楚王聘以為相仲子兄為齊卿仲子
子逃去為人灌園然則於陵又在楚地何也漢置於陵縣屬

濟南郡故城在縣南魏晉因之宋武于此僑立廣川郡改為

武彊縣高齊改廣川為平原郡隋開皇三年廢平原郡移武

彊縣入廢城屬冀州十六年分置淄州縣仍屬焉十八年改

武彊為長山縣以縣南長白山名大業初廢淄州以縣隸齊

州唐武德元年置鄆州縣又屬焉八年鄆州廢仍屬淄州宋
金竝因之

蒲臺縣

中

府東北二百里古有馮氏國羿弑夏王相其臣靡

奔有鬲後與鬲君滅浞立少康漢千乘郡濕沃縣後漢為鬲
侯國屬平原三齊記曰秦始皇東游於臺下繫蒲繫馬今蒲
生猶有繫者臺在濱州東去此四十里名曰秦臺隋開皇十
六年置蒲臺縣屬渤海唐屬淄州景龍元年屬棣州五代周
世宗復屬濱州宋太中祥符五年省入渤海以其地為蒲臺
鎮金復置縣屬濱州 國初因之中統五年來隸

新城縣

中

府北八十里本長山縣之驛臺鎮 國朝戊子年

以人民蕃聚置為縣以田索二鎮隸之

萊州

中

府東北五百里禹貢萊夷之地周職方幽州之域史

記周武王封太公于營丘萊侯聞之與太公爭營丘則萊為

殷時侯國也春秋時齊侯伐萊萊共公浮柔奔棠晏弱圍棠

滅之遷萊於郕

棠在即墨
郕在昌慮

秦屬齊郡漢高四年以韓信虜齊

王廣分齊置東萊郡屬青州萊在齊之東垂也初理掖後理

黃魏因之晉武太康四年徙遼東王粲王東萊復理掖至宋

改理曲城元魏皇興四年分青州置光州

取界內
光水名

仍領東萊

郡州與郡同理在掖縣高齊宇文周並因之隋開皇初罷郡
改光州為萊州大業初復為東萊郡唐武德初改為萊州天
寶元年曰東萊郡乾元元年曰萊州僦河南道宋為防禦州
屬京東東路金升州為定海軍節度屬山東東路國初屬
益都中統五年來僦至元廿四年割即墨縣入膠州領縣四
曰掖曰膠水曰招遠曰萊陽以掖為治所

掖縣中

倚郭古過國

平聲

寒浞封子豸之地漢志夜侯國有過

御春秋類傳亦以有過在掖縣戰國策又云田單封掖邑即
掖省文未知是否掖水出縣東南寒同山故以氏焉自漢以

來屬東萊唐宋並屬萊州

膠水縣下

州南百三千里本漢膠東國漢以即墨置膠東國古

城在縣南後漢省為縣屬北海國晉屬長廣郡元魏屬北海
郡隋仁壽元年改曰膠水屬萊州唐宋金並因之

招遠縣下

州東北百二十里本掖縣地有羅山金人初置羅

峯鎮後升招遠縣屬萊州西北至海五十里海道東山河口
至朱王海口倉百三十里

萊陽縣下

州東北百八十里漢縣屬東萊郡在昌水之陽故

名古城在文登縣西南三十里晉初無此縣元康八年復立

昌陽縣屬長廣郡今理是也高齊天保七年廢長廣以昌陽屬東萊郡隋開皇三年罷郡以縣屬萊州唐因之五代唐莊宗避國諱改為萊陽宋金因之

登州下 府東北七百五十里北至海三里禹貢岨夷之地春

秋萊子國戰國屬齊秦屬齊郡漢屬東萊郡元魏屬東牟郡高齊屬長廣郡隋開皇初屬牟州大業三年廢唐武德四年復置牟州後因文登縣人不從賊黨遂於縣理置登州貞觀元年登二州俱廢如意元年又於牟平縣置登州神龍三年自牟平徙登州於蓬萊鎮析黃縣置蓬萊縣今州理是也

天寶元年為東牟郡乾元元年復為登州宋因之屬京東東路領縣四金初析牟平文登兩縣置寧海軍以兩水鎮為福山縣楊疇鎮為棲霞縣還登州 國初屬益都中統五年來隸領縣四曰蓬萊曰黃曰福山曰棲霞以蓬萊為治所

蓬萊縣下 倚郭本黃縣地漢武于此望海中蓬萊山因築城以為名唐貞觀八年于此置蓬萊鎮神龍三年析黃縣置蓬萊縣宋金因之

黃縣下 州西南百三十里古萊子都此故城在縣東南二十五里漢黃縣屬東萊郡高齊天保七年移今理唐初屬牟州

神龍三年屬登州宋金因之漢志秦欲伐匈奴使天下飛帛
輓粟起於黃腫直瑞切琅邪負海之郡腫即文登黃即此縣

福山縣下州東南二百八十五里本漢腫縣地舊為兩水鎮

屬登州金偽齊阜昌二年置福山縣屬登州

棲霞縣下州南百五十四里腫縣地舊為楊疇鎮亦偽齊所置

寧海州下禹貢嵎夷周禮幽州域春秋萊國秦齊郡之東魏

漢東牟不夜縣地後漢為牟平侯國並屬東萊郡魏晉止為

縣高齊天統四年分置文登縣屬長廣郡隋開皇三年改長

廣為牟州以文登縣屬萊州大業二年亦廢牟州入萊州唐

武德四年又於黃縣東中郎城置牟州文登縣置登州領文

登觀音陽二縣六年以觀陽屬牟州又置清陽廓定二縣屬

登州貞觀元年二州三縣俱廢入文登如意元年復登州神

龍三年登州徙置蓬萊鎮麟德二年復置牟平屬登州宋因

之金初偽齊劉豫以兩縣置寧海軍大定二十二年升為州

屬山東東路國初屬益都至元九年直隸省部領

縣二曰牟平曰文登以牟平為治所東到海二百六十里

西到福山縣七十五里南至乳山海口百六十里北到營島

海口十里東北到雙島海口六十里東南到遠島海口百八

十里西南到萊陽縣二百四十里西北到清泉海口六十里
到大都二千三百里由海道千九百里

年平縣中 倚郭古年子國祝融後漢年平縣在年山陽其地屬坦夷故名年平

東萊郡武帝元朔三年封齊孝王子濞先列為年平侯傳七

世至莽篡國除故城在縣西北百里高齊天保七年自年故

城移黃縣東北改屬長廣郡隋開皇三年改長廣為年州縣

屬焉大業二年年州廢縣屬萊州唐武德四年又屬年州貞

觀二年廢入文登麟德二年復置屬登州宋因之金屬寧海州

文登縣下州東百十五里本漢年平不夜縣地高齊天統四

年分年平置文登縣屬長廣以地有文山始皇召集文人登

之號曰文登隋開皇三年屬萊州唐武德四年於縣置登州

貞觀元年廢登州併廢清陽廓定二縣入此縣神龍三年徙

置登州于蓬萊鎮縣仍屬焉宋因之金屬寧海州

濟南路上禹貢青西兗北之地齊履岱陰無棣之境春秋戰

國皆屬齊秦屬齊郡漢為濟南郡兼千乘平原地文帝又分

濟南國封齊悼王子敕侯辟光為濟南王景帝二年國除後

漢復為濟南國並屬青州魏建安中分置樂陵郡晉為濟岷

郡及樂陵國輿地記曰晉濟南郡領下密膠東即墨祝柯平壽五縣以平壽為郡治考其屬邑乃漢北海平

壽膠東地作濟南平地也或云魏平蜀將徙其家于濟
河北改為濟岷郡而太康地志無此郡名豈永嘉喪亂簡編
散落故失其傳乎寰宇記乃永嘉末濟南郡自東平陵移理
歷城後為石勒所據非濟南屬邑當從輿地記改曰濟岷
永嘉亂陷沒東晉義熙五年劉裕滅南燕復有其地宋元嘉

九年割青州西部於此僑立冀州元魏改為齊州置黃濟南

樂陵二郡隋開皇三年廢郡復為齊州十七年又于陽信縣

置棣州大業初州廢又改為齊郡唐武德元年復為齊州二

年置總管府管齊鄒東泰譚淄濟六州四年於厭次置棣州

七年改總管為都督府貞觀元年廢之七年復置督府管齊

青淄萊密五州天寶元年齊州改臨淄郡棣州改樂安郡五

載臨淄郡改濟南郡乾元元年復為齊州樂安郡復為棣州

並屬河南道五代周顯德三年又分棣置濱州宋治平二年

升齊州為興德軍節度政和六年以齊州為英宗賜履之地

升為濟南府金人初入中原知府劉豫以城叛降立豫為齊

帝改元阜昌兼八州之地都于汴梁以于麟知濟南府八年

廢之仍為散府按察置司焉 國朝置濟南路總管府屬山

東東路元領淄陵二州至元二年淄州自為淄萊路陵州并

臨邑縣入河間路長清縣入泰安州禹城縣入曹州齊河縣

入德州以濱棣二州及鄒平縣來隸今領州二錄事司一縣

十一縣府者四縣州者七長官司一東到般陽路二百二十里西到齊河縣五十里南到泰安州百八十里北到無棣縣三百二十里東南到萊蕪縣二百五十里東北到濱州海口四百七十里西南到長清縣七十里西北到禹城縣百二十里到大都千里

錄事司沿革同前

歷城縣中倚郭古齊歷下城在歷山之陰史記晉平公伐齊戰于歷下酈食其說齊王廣罷歷下兵守韓信罷破之皆其地自漢為歷城縣屬濟南郡晉屬濟岷郡劉宋嘗於此僑立

冀州隋開皇三年屬齊州大業初屬齊郡唐武德三年屬齊州隋唐州郡並理東平陵後改全節縣元和後省全節入歷城始為郡治焉宋初屬興德軍政和六年屬濟南府金因之按述征記歷城到營城三十里自城已東水弥漫數十里間南則迫山寔為險固逮金亂土人因阻水立邑號曰水寨歸附後始移置今縣

章丘縣上府東北百一十里本漢陽丘縣屬濟南郡高齊天

保七年以廢禹城縣西有古高唐城移置高唐縣於此即古黃巾城也隋開皇十八年以博州亦有高唐改此為章丘取

縣南章丘為名爾雅上平曰章丘亦章亥葬女之山名女即
山者唐武德二年屬譚州貞觀元年屬齊州宋景德三年移
縣北置清平軍以縣屬焉熙寧三年復移軍使於縣城金廢
軍縣屬濟南

鄒平縣上

府東北百八十里漢濟南郡有鄒縣

古鄒侯國

有梁

鄒後漢以鄒為鄒平屬濟南國晉省梁鄒入鄒縣屬樂安國
永嘉後鄒亦廢高齊天保七年移平原縣置梁鄒城隋開皇
三年移入鄒平縣十八年復為鄒平縣屬淄州大業三年屬
齊州唐武德元年於臨濟縣置鄒州以縣屬八年鄒州廢屬

譚州貞觀元年譚州廢屬淄州宋因之景德初徙治廣陽城
金屬淄州

濟陽縣中

府東北九十里唐景龍元年析高宛置濟陽縣屬

淄州元和郡國志云濟水在縣南又南有八會津水陸所湊
其路有八故名八會縣廢城在淄州北今縣本漢朝陽唐宋
之臨邑章丘地金初劉豫割章丘之標竿鎮及臨邑之封圻
之半置濟陽縣屬濟南大定六年避金主允濟諱改曰清陽
允濟遇弒復舊名新市鎮舊屬臨邑至元二年併入濟陽
撥戶千二百四十六置長官司管投下差稅直隸濟南路

棣州上

府東北二百四十里禹貢青州之文周封齊履之

北境秦屬齊郡漢魚平原渤海千乘郡邑魏建安中分為樂

陵郡元魏又析樂陵為二隋開皇十年以郡置獸次縣屬北

海十七年以陽信縣置棣州大業二年廢棣州自饒安縣徙

滄州於陽信唐武德四年析滄州之陽信滴河樂陵獸次置

棣州八年又廢入滄州貞觀十七年復於樂陵置棣州其後

以樂陵還滄州割淄州之蒲臺來隸徙州治獸次故城在州

餘里土人名曰北舊城天寶元年改為樂安郡屬河南道乾元元年復

為棣州五代梁刺史華溫琪以河水為患徙州于獸次東南

州東南五十三里土人名曰南旧城宋建隆二年為團練乾德三年升為防禦

州大中祥符四年清河水溢壞州城以獸次與陽信互異易

其地徙州治獸次金因之國初濱棣自為一道中統元年

置濱棣路安撫司至元二年隸濟南路領縣四曰獸次曰陽

信曰商河曰無棣以獸次為治所

獸次縣中

倚郭漢高祖初封爰類為獸次侯至文帝國除明

帝永平五年更富平為獸次縣屬平原郡相傳秦始皇東游

厭氣次舍于此故名魏晉屬樂陵元魏時徙縣治馬陵城今

信縣東馬嶺城是高齊省之隋開皇十三年復置于樂陵屬北海十

七年屬滄州大業初屬渤海郡唐武德四年屬棣州貞觀後

徙州治此邑五代梁徙州東南縣隨之宋大中祥符間與陽

信縣互易仍為州理水經關駟注曰歐次縣富平侯張安世

平侯堯子延壽嗣國在陳留別邑在魏郡租入歲千餘萬延

壽自以身無功德何能久堪先人大國上書讓減戶邑天子

以為有讓徙封平原并一國戶邑如故而稅減半然則陳留

之富平乃安世始封平原之富平延壽之徙封也漢功臣之

世保國長久未有若富平者豈非安

世父子謙抑所致可為後世法也

陽信縣中州東北四十五里本漢縣屬渤海郡高祖初封呂

青為陽信侯文帝復以封劉揭王莽省之後漢延光元年復

置魏晉皆屬樂陵元魏因之至高齊廢隋開皇初復置屬滄

州十七年屬棣州大業初又屬滄州唐武德四年以縣置棣

州六年州廢縣屬滄州貞觀十七年還屬棣州宋因之大中

祥符間與歐次縣互易其地今因之大統志晉東海王越斬

破汲桑桑奔馬牧為人所殺何用錄此

商河縣中州西南九十里本漢平原勅音縣地武帝封城陽

王子讓為侯晉置潔沃縣音它隋開皇初於漢勅縣故城置

置滴河縣取縣南商河漢河隄都尉許商疏鑿後人加水為

滴以為名初屬滄州後屬棣州大業初屬渤海唐貞觀元年

割屬德州十七年還屬棣州宋因之前此皆稱滴河至宋去

偏傍為高河豈以紹聖間河決壞城大觀修復之後字從改
邪然不可考矣金因之

無棣縣下

齊履北境漢陽信地

陽信故城在縣東南三十里

隋開皇六年

置縣取縣南無棣溝為名唐貞觀初省入陽信八年復置屬

滄州太和二年屬棣州尋屬滄州五代周顯德五年改為保

順軍宋復為無棣縣屬滄州金因之 國朝割無棣縣半入

滄州以縣領三鄉來屬而滄州亦有無棣故此又稱東無棣云

濱州

中

府東北三百五十里漢渤海郡地沿革同棣州五代

之際置榷鹽務於海濱因立贍國軍周顯德三年始割棣州

之渤海蒲臺兩縣置濱州宋因之初省蒲臺入渤海慶曆六

年又析置招安縣金復置蒲臺縣大定十三年於此立鹽使

司後又析置利津縣改招安曰霑化 國初濱棣自為一道

中統三年置濱棣路宣撫司中統五年割蒲臺縣入淄州至

元二年絳濟南路領縣三曰渤海曰利津曰霑化以渤海為

治所

渤海縣

中

倚郭唐垂拱四年析蒲臺置渤海縣天寶五年以

地斥鹵西徙四十里李丘村縣焉周顯德三年以縣置濱州

宋金並因之

利津縣下 州東六十里本渤海縣之永利鎮金明昌三年置

為縣

雷化縣下 州北六十里宋慶曆三年招撫海寇得安即其地

置招安縣熙寧六年省為鎮元豐二年復為縣金明昌四年

改曰雷化取龔遂為渤海太守海濱之民復雷聖化立名

德州 禹貢兗州之域春秋戰國齊之北境秦屬齊郡漢高祖

分齊置平原郡後漢及魏晉以為宗王封國元魏復為郡孝

文太和中移郡于安德故城改為安德郡隋開皇元年廢郡

入冀州九年以郡置德州大業三年州廢復為平原郡唐武

德四年平壤建德復置德州又置總管府領博德棣觀四州

七年改屬都督府貞觀二年廢督府割滄州之滴河馱次二

縣來屬十七年二縣還屬棣州以廢觀州之蓀縣安陵來隸

天寶元年改為平原郡十四年安祿山反平原太守顏真卿

據郡討賊初明皇聞河北郡縣皆從賊歎曰二十四郡曾無

作何狀乃能如是欽按三代之後天下承平富庶莫如明皇

始禍致亂毒流後代亦莫如明皇蓋其初政識姚宋晚年識

李揚斯二人者天下皆識其心附明皇但識其形狀故能敗

亂天下至于真卿兄弟巡遠諸賢皆所不識而竭忠許國乃

能如是自古識者不賢賢者不識信者不忠忠
者不信豈特明皇而已哉此禍亂所以相尋也
乾元元年復
為德州屬河北道五代晉天福間移州理長河縣宋復還安

德展其城

景德三年刺史江日新展築

亦屬河北金屬山東東路

國初

屬東平路至元五年直隸

省部仍割大名之清平濟南之齊河兩縣來隸領縣五曰安

德曰平原曰齊河曰清平曰德平以安德為治所東到商

河縣百八十里西到陵州七十里南到高唐州百四十里北

到吳橋縣七十里到大都八百里東北到寧津縣百里東南

到禹城縣百一十里西南到恩州百一十里西北到景州二

百里

安德縣

中

倚郭漢為縣後漢為國皆屬平原元魏以縣置安

德郡隋開皇初復為縣屬冀州九年于縣置德州五代石晉

徙州理長河以縣為屬邑宋嘉祐中復為州理金因之

平原縣

中

州西南五十里漢平原郡平原縣有焉馬河東北

入海五百餘里

今枯河猶存

韓信夜渡平原罷齊歷下軍渡此河

也高齊併鄒縣入此

古城在縣西光武封馬武此邑

元魏置東青州尋廢屬

安德郡隋開皇初郡廢屬冀州九年改屬德州唐太和二年

屬齊州尋復屬德州宋金因之

齊河縣

中

本宋濟南之耿濟鎮漢耿弇討張步自朝陽濟河

即此地金劉豫家此鎮僭位後置為縣屬濟南大定八年始

城之 國朝至元二年來隸

清平縣

中

州東百八十里本漢清河郡之清陽縣隋開皇初

徙貝丘縣置此十六年改曰清平屬博州大業二年屬貝州

唐武德四年屬博州宋屬大名府舊邑在縣西四十里清平

鎮元豐間漯河決壞城徙置博平縣之明靈寨今理是也金

因之 國朝至元二年來隸

德平縣

下

州東八十五里本漢平原郡平昌縣漢文四年封

齊悼王子印為平昌侯故城在縣西南或云西平昌以琅邪

亦有平昌故稱西元魏永熙二年移縣理古城高齊天保七

年復移今理隋開皇十三年屬滄州十六年還屬德州唐因

之五代唐避諱改曰德平宋熙寧六年省為鎮元符二年復

置屬德州金因之

齊邑外屬

高唐州之高唐縣 本漢平原郡之高唐縣非古齊高唐也杜
征南云高唐在祝柯西北古齊邑齊威王使盼子所治漢書
地理志平原郡有高唐則漢縣也今人皆以此為齊邑故略
具同異云

曹州之禹城縣 濟南西五十里古祝國黃帝之後杜征南釋
地曰濟南祝柯縣西北有援城有高唐城春秋時齊邑漢祝
柯縣屬平原郡隋屬齊州唐天寶元年改曰禹城取縣南禹
息古城為名安史之亂義營防遏將軍李銑決河水以限賊



縣為水壞乃北徙八十里移縣置遷善村為今理故禹城在豐齊之北

宋金並屬濟南

國初乙未年屬曹州

有阿陽城漢縣也在廢禹城西北隋開皇初此城側得古塚石銘云阿縣令李君墓

龍額城亦漢縣在廢禹城東南古高唐城在南五十里瑗城在南百里春秋晉趙鞅伐齊取犁及鞮杜云犁一名隰鞮即瑗也原陽城唐縣亦在南百里廢禹城在南八十里

泰安州之長清縣

濟南西南七十里本盧地齊公子侯食采

於盧漢為縣屬泰山郡元魏孝昌二年自山荏故城移東太原郡置此後廢隋開皇五年置長清鎮取清水為名十四年改為縣屬濟州唐貞觀十七年屬齊州宋因之至道二年徙

治刺榆店今縣理金亦屬濟南

國初乙未年屬泰安

東昌路之聊城縣

濟南西三百里齊西鄙之邑水經注云聊

城縣東北三十里有故攝城左傳所謂聊攝以東是也戰國

時燕將保聊城田單攻之不下魯仲連為書約之矢射城中

燕將見書自殺兩漢屬東郡魏晉屬平原因為郡治焉隋初

屬博州大業中屬武陽郡唐宋並屬博州

國朝屬東昌路倚郭按漢志千乘郡別有蓼城縣後漢為蓼侯

國注云東北有攝城此古齊聊攝也今人皆以東昌之聊城

當之故略具同異云 荏平縣聊城縣東北七十里左傳哀
八年齊取闡杜注云漢東郡荏平縣北有闡鄉荏平至晉末
圯於河後魏廢入聊城唐武德初以聊城之興利鎮復置貞
觀八年又廢至金劉豫始復屬博州

國初撥屬東昌石勒賣為師灌奴耕田聞鼓鞞之聲縣西南地
名牛業塊相傳是其舊耕之地李陽爭漚麻池今有大李莊
陽謹之裔猶存未知是否淳于髡墓在縣西又唐馬周五代
葛從周皆有墓土人名曰葛塊

東平路之東阿縣 濟南西百二十里齊之柯邑春秋莊公十

三年會齊侯盟於柯曹沫劫盟於此漢為東阿縣 西漢有阿陽無東阿

記魏封曹植地晉屬濟北國隋屬濟北郡唐初屬濟州天寶

十三載屬鄆州金宋並屬東平 有阿井貢膠井今在開河之西 陽穀縣東

阿西南百里春秋僖三年齊侯宋公江人黃人會於陽穀隋

開皇十六年始置陽穀縣屬濟北郡唐初屬濟州天寶十三

載屬鄆州宋開寶六年縣城圯於河太平興國四年徙置上

巡鎮金因之

國朝屬東平阿井在縣東北金天眷間重修有碑存今復廢縣
東北安樂鎮相傳周世宗養疾於此

河間路屬之臨邑縣

濟南北百里漢臨邑縣屬東郡宋孝武

孝建二年立東魏郡理臺城以臨邑縣屬焉隋開皇三年罷

郡屬齊州唐初屬譚州後屬齊州宋因之建隆初以河決壞

城徙治耿鎮此亦漢濟南著縣平原陞陰縣地隰陰齊桓封

公子廖之地漢為縣古城近在縣西十里又名黎丘著城在

縣東南五十里古相傳地貢神著

按師古曰著音竹庶韋昭誤以為著龜之著失之遠

矣後人緣此有貢著之論

齊東縣舊趙巖口金為齊東鎮見金須知劉豫置

夾河巡檢司

以瀕大清河故名夾河

金亂

天兵南下城之壬子年因置齊東縣屬河間路癸丑年割屬濟

南至元二年還屬河間

縣管寫戶郭外皆章丘鄆平地屬濟南故附見云

齊乘卷之三



齊察卷之四

古蹟

類例有四各以類書近而相證者則聯書不拘以類一曰城郭記古井邑二曰亭館該乎棟宇三曰丘隴丘陵墳衍系焉四曰志聞碑銘詩說終焉凡此皆古人之蹟也蹟於書者人存其政舉蹟於地者人亡其處在過黍離而興悲臨廣有歎曠千載而相感者其在茲歟

城郭

郡人于欽思容纂



廣縣城 益都府南瀑水澗側漢廣縣故城元魏嘗以置青州

遺址猶存土人目為古青州

廣固城 府西北堯山下齊記云晉永嘉五年刺史曹嶷所築有大澗甚廣因之為固故曰廣固初南燕慕容德議以都潘聰曰青齊沃壤號曰東秦地方二千戶餘十萬四塞之固負海之饒可謂用武之國廣固者曹嶷所營山川阻險為帝王之都德從之及劉裕圍慕容超城側有五龍口險阻難攻兵力疲乏河間人玄文說裕曰昔趙攻曹嶷望氣者謂渾水帶城未易攻拔若塞五龍口城當破石季龍塞之嶷果請降

後五日雷雨震開之慕容恪攻敗龔亦塞五龍口龔遂降今舊跡猶存宜試修塞裕從之超城中男女皆患腳弱病者大半遂出奔為裕所擒此緣城閉日久氣鬱不通自然生病自古兵革間多有之裕不學故為玄文所誑耳其城為裕所夷無復遺跡

臨淄古城 臨淄縣北雉堞猶存齊記補謂齊古城周五十里

高四大十三門其西雍門韓娥鬻歌之地又有稷門下立學

舍所謂稷下學齊宣王聚文學游說之士鄒衍淳于髡田駢

騶奭接子慎到環淵之徒皆賜列第為上大夫

縣北有大夫店由此取名

不治而議號稷下學士荀卿嘗為稷下祭酒又鄭康成云齊
田氏時學舍所會號糅下糅音相近即稷下也亦城內地
名左傳陽虎劫公伐孟氏入自東門戰於糅下西南有申門
門外申池左太冲賦謂之照華池郡國志謂之左右池即系
水原也北曰章華門史記蘇代自燕入齊見於章華門者是
也城東北五里餘有雪宮遺址見寰宇記又西北系水之側有梧
臺水經注楚使聘齊齊王饗之梧宮臺甚層秀東西百步
亦宋愚人得燕石之處有漢熹平五年碑題云梧臺里又南
歇馬臺土人以為晏子作歌之臺或又以為簡公之檀臺皆

不可考齊城在戰國時蘇秦謂城中七萬戶漢高又溺愛外
婦子以齊言者皆封之故齊地惟此城獨大意其全盛之時
車轂擊人肩摩連社成帷舉袂成幕揮汗成雨者信不誣矣

石槽城 臨淄東十里即古安平城因城內有石槽故名魯莊

公三年紀季以鄆入於齊杜注齊城東安平縣有紀季墓北

冢土人云蔽無田單封安平君即此

西安城 臨淄西三十里耿弇討張步謂西安小而堅即此東

有畫邑城王蠋鄉也弇進軍畫中居兩城之間路史云風俗

畫氏邑孟子宿畫畫在臨淄畫在西安今即畫水號宿留水畫乃畫之訛不應有二

索頭城 臨淄東南二十里女水之南後魏慕容白曜圍沈文

秀於青州築此城因有索頭村

朱虛城 記云臨朐東六十里孔融為黃巾賊所敗曾保此城

蓋融保都昌與此相近又有東陽城亦曰丸城左氏曰晏弱

城東陽又有校音效城武帝封城陽王子雲為侯臨原城封菑

川王子始昌為侯皆在臨朐東見寰宇記

斟灌城 壽光東四十里寰宇記云斟灌城亦名東壽光自金為斟

灌店按有窮后羿拒太康代夏政仲康子相立依同姓諸侯斟

灌斟尋氏羿相寒浞殺羿使其子澆即梟也殺斟灌以伐斟尋

滅夏后相后緡方娠逃出自竇歸於有仍生少康焉杜征南

謂壽光縣東南有灌亭漢北海郡有斟縣應劭謂平壽為古

斟尋東南有斟亭京相璠曰斟尋去斟亭七里然則斟國在

齊明矣皇甫謐乃謂斟灌在衛臣瓚謂斟尋在河南引夏都

為證顏監曰應氏止云斟尋本是禹後何預夏國之都乎瓚

說非是

紀城 壽光南三十里春秋之紀國通志曰紀本在東海贛餘

後遷劇亦稱紀城內有臺高九尺俗曰紀臺城旁有劇南城

漢劇縣也爾雅云七達謂之劇驂北海劇縣有此路

王胡城 壽光北二十里古益都城也漢武元朔元年封菑川
懿王子胡為益都侯薨子廣嗣廣薨子嘉嗣元鳳三年坐非
廣子免

益城 壽光南十里漢益縣城寰宇記以為益都城云魏始於
此立縣土人稱王子胡者正益都城耳

豐城 壽光西二十里輿地記本漢菑川國城司馬懿伐公孫
淵北徙豐人住此改曰南豐城

樂望城 壽光東二十里漢宣帝封膠東戴王子先為樂望侯
今日王望店王望北十餘里又有古城土人名曰女直營金

人屯兵之所

延鄉城 水經注千乘有延鄉城世謂之從城延從字相似野
溝水出西北入時水今樂安西北有此城漢元帝封李譚延
鄉侯俗又云會城

千乘城 郡國志高宛縣北二十五里古千乘縣以齊景公有
馬千駟敗於青丘得名縣北有青丘灤即今清水泊也又子
虛賦注曰青丘山名出九尾狐在海外蓋瀕海耳漢高置為
郡和帝更名樂安國千乘縣並屬焉至隋開皇初移縣置廣
饒此城遂廢其東復有漢利縣古城云

被陽城 寰宇記高苑縣西南漢武封齊孝王子燕為被陽侯
廢濟陽城 唐景龍元年析高苑置在濟水之北尋廢故城在
縣北九十餘里

薄姑城 元和志在博昌東北六十里即殷末薄姑氏舊都今

博興東北俗呼為嫌城者是又書序成王伐奄遷奄君於薄

姑奄在魯不知薄姑又是何地

博昌古城 博興南二十里漢博昌縣城金須知博昌鎮或亦呼為薄

姑城非是西對古城即延鄉也

利城 樂安西北二十里漢齊郡利縣

平壽城 濰州西南三十里漢縣古城又有廢下密城在州西

三里隋開皇中於北海縣置濰州移下密縣於此大業二年

併入北海此謂西下密東四十五里有東下密隋開皇中分

下密東界為膠東縣唐武德初廢此城今在昌邑東南俗呼

密城距州不止四十五里又東南有後魏皇興初所置膠東

縣城州東南三十里有漢桑犢城並見寰宇記白狼水出小

王莊正桑犢地

廢昌樂城 濰州西五十里古緣陵春秋淮夸病杞諸侯城緣

陵而遷杞齊侯與之車百乘甲一千此城東南十餘里有營

陵城又南安丘北海界上有起城營陵即緣陵見漢書注起即杞

耳在漢曰營陵縣元魏又曰營丘謂即太丘所封者非是唐初權置杞

州後為縣宋改曰安仁尋又改曰昌樂

國朝至元三年廢入北海今又廢城內右玉華宮舊名神游觀

宋宗室淄王瑞華堂碑刻在焉

訾城 昌邑縣西北海濱春秋齊師遷紀邢鄆部杜注北海都

昌西有訾城則鄆地俗呼為瓦城半為水漸城南有孫武廟

營城 昌邑南五里有大營城北五里有小營城南城即古都

昌不知何故謂之營城豈孔北海與黃巾相拒屯兵遺跡邪

古諸城 密州西南三十里春秋時魯邑季孫行父城諸及郛

姑幕城 高侯國漢晉為縣郡國志引博物記曰城東南五里

有公冶長墓寰宇記則謂長墓在密州西北五十里姑幕在

莒縣東北百六十里詳此則姑幕城當在密州

昌安城 安丘縣之外城漢石泉城後漢併入昌安在縣西南

十里寰宇記謂之安昌城今按張禹封安昌侯乃汝南之縣

又云西南十二里有安丘城實一城耳記皆誤

平昌故城 安丘南六十里漢平昌縣屬琅邪亦為侯國文帝

封齊悼王子卬為平昌侯後徙封膠西王

郟城 安丘西南六十里春秋齊遷紀邢郟部杜注朱虛縣東南部城漢為梧成縣後魏於此置平昌郡高齊改為琅邪縣隋改曰郟城大業末廢

淳于城 安丘東北濰汶二水交處古有此城按通志武王封

禹後東樓公於杞汴梁杞縣九世成公遷於緣陵濰州昌樂至文公又

遷居淳于號州公春秋州公淳于如曹是也後為杞所并遷江南杞東樓之孫周亦封於牟婁隱四年莒人伐杞取牟婁今諸城北有婁鄉安丘南有牟婁山俗訛作朦朧山即其地城陽城 安丘南八十里漢城陽國亦曰龍臺城城內有臺高

六丈臺下有井與荆水通失物於井或於荆水得之有神龍出入其中故曰龍臺

緝城 安丘南與郟城相近漢武封菑川靖王子成為緝侯

計斤城 膠州南五里春秋之介根漢計斤縣語音有輕重耳

莒子初都此後徙莒今有兩塔對立曰東西計斤

祓音廢城 膠州西南七十里漢祓侯國屬琅邪俗曰肥城廢音

之轉也記謂祓城無跡可考當在臨朐者非是

黔陬城 高密縣西六十里兩城夾膠水而立縣道記曰黔陬秦所置在高密郡東北古介葛盧國也後移縣於膠水西相

去三十里謂之東西二城高齊天保間廢介葛盧墓在東城側

龍且城 高密西南四十里濰水之東楚將龍且所築水西即

且冢冢南曰梁臺韓信囊沙壅水之地亦曰城陰城

夸安城 路史云夷安古維國有維水寰宇記謂今高密縣理

東南外城即夷安城晏子萊之夷維人漢為縣屬高密國詳

此則今縣理正古夷安城西北舊城乃宋縣耳

高陽城 高密西北三十里漢成帝封淮陽王孫並為侯一名

膠陽亭大業末廢今有高陽村

稻城 高密西南濰水堰側土人呼堰為趙貞女防南有高堤

謂是彭岑冢皆謬此即稻城遺跡春秋稱琅邪之稻自漢有

塘堰蓄濰水以溉稻因名其城武帝封齊孝王子定為稻侯

郡國志亦謂之鄭城康成故宅在此旁有稻田萬頃斷水造

魚梁歲收億萬號萬足梁今其遺跡鞠為榛莽矣

拒城 高密南三十里漢縣相艾水出此東入海今日拒城河

古膠西城 高密東南二十五里膠墨二水之間隋置膠西縣

在此大業末廢於賊土人呼為諸晏城以前有晏子冢故也

不期城 即墨西南二十七里漢琅邪郡不其縣有太乙仙人

祠及明堂武帝所起寰宇記云古城約周十餘里後漢改屬東萊晉於此置長廣郡高齊廢之隋開皇十六年於此城東北二十七里置即墨縣今故城在縣西南

臯虞城 即墨東五十里漢武帝封膠東康王子建為侯以旁

有王吉廟亦曰琅邪縣城又西有祝茲城漢初徐厲及康王子延年皆封祝茲侯而兩漢無此縣蓋是鄉聚之名取為國號耳公孫弘封平津霍光封博陸之類是也

壯武城 地記即墨西六十里古夸國漢壯武縣屬膠東國晉封張華為壯武侯今華廟在膠州西南即壯武地

莒城 莒州治外郭周四十餘里內城周二十里子城周十二

里寰宇記曰縣理在故城城三重皆崇峻惟南開一門無知

之難小白奔焉樂毅攻齊守嶮全國列女傳齊人杞梁殖襲

莒戰死其妻哭於城下七日而城崩琴操一說殖死妻援琴

知悲莫悲兮生別離哀哉皇天城為之崩一說妻泣曰上則無中則無夫下則無子人生之苦至矣乃放聲長號杞城為之頽遂投水而死其妹朝日悲之為作是歌皆後來追述後說近是

海曲城 莒州東百六十里地有東呂鄉太公望所出後漢紀

琅邪呂母結衆為子報仇殺縣長起此赤眉皆其黨今有呂

母固

曹公城 莒州南二十里魏武征陶謙所築今日五花營

高鄉城 莒州東南七十餘里漢侯國宣帝封城陽惠王子一

休為侯晉永嘉後城廢疑即今十字路城 又有高廣新山昆
崑山皆漢侯國並

並在州南
無迹可攷

箕城 莒州東北百里箕屋山下濰水出此漢宣封城陽荒王

子文為侯

析泉侯 漢侯國記附密州亦云失其所在然水經析泉水出

松山今日分流山在馬耳山西城當屬此地

團城 沂水東北三十里城正圓因名團城隋開皇十六年嘗

於此置沂水縣後廢為鎮

蓋城 沂水西八十里蓋公先國陳仲子兄戴蓋祿萬鍾即此

漢為縣景帝封皇后兄信為侯隋開皇中於此城置東安縣

後廢入沂水

向城 沂水西南春秋隱二年莒人入向通志云沂州有古向

城寰宇記云夜頭水一名向水經漢禪城南入海向城在莒

縣南今沂州之向城鎮是也

郟城 沂州東三十六里左傳定公十年叔孫州仇帥師圍郟

隋開皇十六年於此置臨沂縣大業二年移縣於今州理此

城遂廢通志郟邑又在鄆州須城非是

即丘城 沂州南五十里路史云祝丘祝融氏之後臨沂東南五十里即丘城是也桓五年城祝丘齊魯之音祝即相近漢為即丘縣至高齊廢今州西三十里乃漢厚丘城土人以為即丘州南即丘為新城皆誤

開陽城

今日鄆城

沂州北十五里古鄆國祝融之後風姓又云夏

禹之後昭公十八年邾人入鄆杜注謂琅邪開陽開本作啟叔孫州仇城啟陽是也漢避景帝諱改為開漢官儀曰洛陽城南東第一門始成夜有一柱止樓上開陽縣上言南門一

柱飛去即洛城門柱也光武建武四年封子京為琅邪王初都莒莒有城陽景王祠神數下言宮中多不利京上書願徙開陽肅宗許之今城側有京冢廟

郟城 沂州東南百廿里通志曰郟祈姓子爵或曰嬴姓少昊之後春秋時郟子朝魯能辨古官仲尼師之城內郟子宣聖共廟後漢志郟有勇士亭古勇士萬丘欣也

王僧辯城 沂州東北四十里梁將王僧辯所築土人目為諸葛城不知所據又州城東北有小營城晉元帝之發于戍營也

鐘離城

沂州西南百餘里路史云鐘離徐之別封今沂之鐘

離城乃晉吳會處後徙九江吳滅之郡國志謂此城楚將鐘

離昧所築按韓信傳昧家在伊盧東海戚胸有此邑城或於

其鄉邑耳昧素與信善羽敗昧亡歸信信時為楚王及高祖

偽游雲夢信恐見禽或說信斬昧謁上必喜亡患曰漢所不

取楚以昧在公若捕我以自媚吾死公隨手矣乃罵信曰公

非長者卒自剄信持其首謁陳為高祖所擒先儒謂李廣之

不侯以斬灞陵尉欽亦謂信之不終以負鍾離昧且樊於期

以窮歸燕太子丹猶不忍負况昧楚之忠臣已之良友以窮

來歸乃始容而後負之可乎以信之智獨不能如魯朱家為

季布地乎信罪大矣

襄賁城

鍾離城相對漢末劉虞初封容丘侯進封襄賁侯

虞鄆人也故封鄉國俗訛作鑿城

古費城

費縣西北二十里古費伯國姬姓懿公之孫後為季

氏邑顯史城在北所謂固而近於費

古武城

費西滕東兩縣之間子游弦歌舊邑

南成城

費縣南百餘里齊檀子所守漢侯國屬東海因南成

山而名漢末黃巾之亂鄭康成避難此山有註經石室

枋城

本陽口城

左傳隱公年鄭伯請釋泰山之祀而祀周公以泰

山之枋易許田許在鄭地枋即此城寰宇記云自漢費縣移
理枋城後魏大和間自枋城移縣於陽口山隋開皇三年復
自陽口移入枋城即今縣理也土人乃以陽口城為枋城又
呼為許田城皆誤

古承縣城

嶧州城西北小城寰宇記曰前承縣理今縣西一

里漢承縣古城也晉已後蘭陵郡或理今州城或理鄆此城
自為承縣宋始移焉

古鄆城

嶧州東八十里夏少康封少子曲烈於鄆傳國至春

秋襄公六年莒滅之後屬楚漢晉並為繒縣其後省入蘭陵
隋初鄆州理承縣城大業二年始移蘭陵郡理此後為山賊
左君衡所據唐武德初平賊復置鄆州理此城

郛城

鄆城南邾夷父顏有功於周次子友父別封小邾為魯

附庸居於郛樂史云郛城在承縣土人曰小灰城小邾之訛
也

蘭陵城

州東南六十里古魯之次室邑列女傳魯次室女倚

柱而歎曰君老太子幼諸女笑之次室女曰君老必愚太子
幼必悖愚悖之間其亂必生竟如其言次室邑後為楚地改

曰蘭陵春申君封荀卿為蘭陵令城南有荀卿墓城北有蕭望之墓欽按君老子幼不得伊周之付託必亂然未亂而先見者少矣以荀卿之智尚不鑑黃歇之敗次室女其賢乎

偏福陽城 州南五十里古妘姓之國祝融之孫陸終第四子

求言封於偏陽後為晉所滅後漢為傳陽縣屬彭城

古薛城 滕州東南五十里薛任姓顓頊少子陽封於任十二

世孫奚仲為夏車正禹封為薛侯遷於邳至孫仲虺為湯佐

相復居薛六十四世至愍侯洪為齊所滅奚仲廟在城中墓在城南齊封

靖郭君田嬰於此郡國志孟嘗君時薛城中六萬家其城高

厚無比以抗楚魏也至今多英傑子弟蓋有文之遺風文父

子墓並在焉水經註云冢結石為郭作制嚴固瑩麗可尋今

墓已開發內如宮室以銅鐵鑄辟扣之有聲堅不可動

仲虺城 俗曰斗城薛城西三十里晉太康地記曰奚正遷于邳其

後仲虺復居此漵水經城北西入於泗

滕城 州西南十五里古滕國城秦縣之漢初夏侯嬰初為滕

令號滕公因秦舊孝武改為公丘故地志以為公丘城

濫城 州東南六十里左傳邾里肱以濫來奔又名昌慮城後

漢建安中曾於此立昌慮縣有藍香鄉即此邑或又名戚城漢

戚胸縣亦屬東海

古邾城 鄒縣南周武王封祝融安期之裔挾於邾為魯附庸

十二世至儀父始見春秋齊桓興霸儀父附從進爵稱子又十四世至邾文公乃遷於繹繹本鄒山故亦稱鄒此城蓋其始封之邑也漢嘗以為南平陽

鄒城 嶧山南二里邾遷於繹依繹山以為邑漢志曰城東門外有常賢墓今此山前古城猶在石表大刻曰漢丞相常賢之墓此亦漢縣也

逢陵城 般陽府東北四十里逢伯陵商之諸侯封於齊薄姑

氏代之後太公又代之逢蒙逢丑父皆其後或曰即丑父之邑也

反蹤城 般陽北記謂齊景公失馬尋蹤遂得於此輿地記云魏明帝景初二年以遼東新沓民渡海來歸於此置新沓縣以居之

萊蕪城 般陽東南六十里齊靈公滅萊萊人播遷於此邑落荒蕪故稱萊蕪後漢范史雲為萊蕪長清儉守節百姓敬之曰甌生塵范史雲釜生魚范萊蕪即此邑城西有韶山出鐵

代置鐵官 范史雲名丹

於陵城 長山縣南二十五里風俗通曰陳仲子齊世家辭爵

灌園居於於陵史記謂於陵在楚路史謂於陵商世侯國在

淄之長山者是余按仲子亦高潔矣孟子但譏其避兄離母

或至敗倫亂俗後世亦曷常有斯人哉正足以勵衰俗耳

高苑故城 長山北二十里苑城店因此名

古濟南郡城 長山西北蓋漢濟南郡理也

曲成城 萊州東北六十里海邊漢曲成縣三山萬里沙皆在

此晉改為曲城隋末廢唐武德四年復六年又廢

當利城 萊州西南四十里漢當利縣至高齊廢又有陽樂城

在當利北陽石城陵石侯國在當利南皆漢縣也見十三洲

記

臨胸城 萊州北二十餘里漢縣顏監曰齊郡已有臨胸而東

萊又有此縣各以所近為名縣道記城在海水祠北約五六

里去海二十里然今海廟宋初所建去海總二三里與古不

同矣

沙丘城 萊州北相傳商紂所築始皇崩處按史漢皆云沙丘

在鉅縣此後人附會

挺城 徒鬲 萊陽縣南七里漢挺縣屬膠東國

廢昌陽城 萊陽東南二十餘里隋大業間築唐永徽初為水
壞

長廣城 萊陽東五十里獫狁養澤在西漢縣屬琅邪後漢屬東
萊高齊置長廣郡於中即城後移郡於膠東此城遂廢此即中

即故城耳郡國志石勒遣中即將石同築此以防海故名中
即城

古即墨城 膠水縣東南六十里正田單火牛城也漢膠東國
領八縣理此俗曰朱毛城北數里有樂毅城毅園即墨時所
築

平度城 膠水縣西北六十里漢縣膠水經此城北入海又盧
鄉亦漢縣高齊併入膠東故城在平度南十餘里

鯨城 登州南十五里此亦有羽山相傳是魏將田預所築城
近羽山取殛鯨為名

烏湖戍 登州北海中二百六十五里

大謝戍 北海中三十里二戍皆唐太宗征高麗所置後遂為
鎮永徽始廢

故牟平城 州東南九十里漢縣城高齊天保七年移縣置馬
嶺山此遂廢

古萊子城 黃縣東南二十五里古萊子國都地名龍門山峽

之間鑿石通道極為險隘土人曰萊子關路史謂即萊宋國

大人城 黃縣東北二十里司馬懿伐公孫淵築此城以運軍

儲

徐鄉城 漢縣蓋以徐福求仙為名成帝封膠東恭王子炆為

侯

士鄉城 鄭康成謂越有君子軍齊有士鄉城圖記皆云在黃

縣按管仲制國為二十一鄉工商之鄉六士鄉十五豈一城

邪

邰城 黃縣西南二十五里漢縣有百支萊王祠高齊天保間

廢

腫音城 寧海州東三十里秦漢負海縣後併入牟平唐初置

清陽縣後廢入文登城對之累山臨清陽水故名清陽城清

陽漢志作穀洋丹水所出東北入海

育犁城 寧海州西北八十里漢縣後漢省入牟平在瀕港水

側其地良沃故名育犁

東牟城 寧海州文登縣西北十里漢縣高后封齊悼王子興

居為東牟侯

不夜城 文登東北八十里海濱漢志云古有日夜出見於東

萊萊子立此城有成山日祠鷄鳴島解道虎云不夜在陽庭

城東南陽庭有青城山始皇射魚處今按青城山即之罘山也因腫名清陽城之罘號青城山陽庭即腫城是

東平陵城 濟南東七十五里春秋譚國齊桓滅之古城在西

南龍山鎮相對

史記齊世家作郊杜征南謂譚在濟南平陵郊乃東海郊縣從春秋則當作譚以桓公奔

莒過郊郊莒相近則當作郊

漢為東平陵縣右扶風有平陵故此加東文

帝封齊悼王子辟光為濟南侯都此東晉時此城北石虎一夕移於城南有狼狐十餘隨之迹皆成蹊趙王石虎遂起南

寇之計歷代皆為縣宇文周始廢隋亂土豪李蒲據城歸唐武德二年置譚州平陵縣以蒲為總管貞觀中州縣相繼俱廢都督齊王祐反土人李君求房繼伯等據縣不從抗表以聞太宗嘉之敕曰齊州平陵百姓自隋末至今常懷忠誠不從寇亂宜加優獎以旌義烈縣依舊置改名全節其後廢入歷城此城漢為王都唐為州治故周二十餘里雉堞高峻三齊記以為殷帝乙之都按書序自契至湯八遷自湯至盤庚五遷並無都齊者况帝乙乃武乙之子紂之父也武乙帝乙皆居朝歌逮紂而亡豈在此地城西北有陰地數畝天色澄

霽亦若雲陰。迨視則無記。謂青州有地鏡水影。蓋亦此類。平

西北十五里有
廢秦先縣城

鮑城 濟南東三十里。鮑山下有禹裔有鮑叔仕齊。食采於鮑。

因以為民。鮑叔生叔牙。進管仲於齊桓。其後世為齊卿。鮑城

見三齊記。山因城名。遺山濟南行記作岫山。誤也。

臺城 濟南東北十三里。漢高初封戴野為臺侯。又有平臺城。

漢縣也。在臺城北五十餘里。俗曰故軍城。

營平城 濟南東三十里。漢縣。宣帝封趙充國為營平侯。隋唐

皆置營城縣。後廢入平陵。餘見郡邑。

巨合城 濟南東七十五里。水經云。巨合水南出鷄山北。經巨

合城。耿弇討張步。進兵先賈巨里。即此。自宋為龍山鎮。

祝柯城 濟南豐齊鎮東北二里。周武王封黃帝之後于祝。春

秋祝柯齊邑。漢為祝柯縣。唐以縣南有廢禹息城。改曰禹城。

禹城移理遷善村。此即祝城也。西北有野井亭。郡國志云。即

齊唁公于野井。高唐城
見亭館

陽丘城 章丘東南十里。漢縣。文帝封齊悼王子安為陽丘侯。

後漢省。至高齊乃以黃巾城立章丘縣。

寧戚城 章丘東北三十里。水經註。楊緒水經寧戚城。亦漢孝

武封魯恭王子恬為寧陵侯之邑

朝陽城 章丘北二十五里漢初封華寄為朝陽侯高齊廢入

章丘隋復置改曰臨濟唐屬齊州宋咸平四年復省入章丘

以其地為臨濟鎮古城在鎮東杜預云西北有崔氏城丁公邑

樂安城 章丘臨濟鎮東北八十里地志以為漢千乘郡後更

為樂安國乃在高苑此蓋漢元帝封匡衡侯國耳

亭山城 章丘西南六十里宋元嘉中於此置濟南縣屬頓丘

隋開皇初改曰亭山唐元和中省入章丘

管城 章丘臨濟北鎮記引晉太康志以管叔之後封於此齊滅

管故其子孫仕齊愚按書稱致辟管叔古史謂管叔鮮罪大

無後管夷吾出自周穆王至夷吾始顯豈管叔之後邦鄭州

管城乃管叔所封魯有管邑大夫采地惟齊無管城此即漢

之管城而傳寫致誤

鄒平故城 鄒平西南二十里俗曰趙臺城唐武德初置縣於

此後移理今縣城遂廢

隋濟南城 鄒平東北十五里隋開皇中於此置濟南縣大業

初廢入長山

梁鄒城 鄒平東南三十五里漢梁鄒縣高齊天保間自長山

界內濟南故城移平原縣於此城隋開皇初自移縣入鄒平
豐齊城 濟南豐齊鎮南漢在縣唐天寶元年改為豐齊元和
十五年廢入長清地產半夏極佳

濟北城 長清縣西三十里

盧城 長清縣南五十里隱三年齊鄭盟於石門尋盧之盟杜

注云盧盟在春秋前莫知年代盧齊地濟北盧縣故城是也

舊州城 北舊州城棗州南四十里唐棗州理此城五代梁刺

史華溫琪以河水為害又南徙十餘里土人謂之南舊州城

至宋大中祥符四年清河水復犯此城乃移州北置今理

富平城 陽信東南十餘里張安世子延壽徙封之邑亦名邵

城西晉末邵續其段疋碑弟文鴛合兵攻石勒屯此城元帝以

續為平原守後為石季龍所破

陽信古城 本縣西南七里俗呼城子務


馬嶺城 陽信東十里後魏移厭次理此

大營城 濱州西二十五里金人屯兵所築故丁河口金號鉄

門関

推鹽務 州北門外五代之際所置遺跡尚存

鬲城 德州西北古有鬲國漢縣




郟城音輸

平原西南三十里漢縣屬清河後漢封馬武為郟侯

即今夏津縣

重平城 德平西北三十里漢渤海重平縣後魏大明間亦置

高齊廢入平昌



繹幕城 平原西北二十里漢縣屬清河高齊省入平原

般城 鈎般河得名郭璞曰水曲如鈎流盤桓也漢縣高齊廢

後為水毀

厭次古城 德州東北二十里本漢富平縣明帝更名厭次元

魏時縣東徙馬嶺此其古城

韓信營 平原縣相傳信渡平原襲營於此

亭館上

益都宣聖廟 府城西北隅有摹嶧山秦碑極精製旁刻云嶧

山秦刻磨滅久矣宋初惟江南徐鉉有摹本贊皇李建中傳

寫得之遺余曾祖金紫公傳子孫四世踰百年靖康建炎兵

火相尋舊藏文籍散落殆盡獨此刻僅存命善工勒於青社

郡舍阜昌甲寅河南李仲坦志下刻云盜竄文篋褫去皇帝

立國惟初六字不復敢補上下刻志五節不能備載石雖豐

校郟嶧摹本有間矣有崇寧經史閣碑州縣廟學不煩載

有古今石則書

龍興寺 府城西北隅脩身坊宋碑云寺即田文宅蓋本唐封

演見聞記云青州南城佛寺舊傳孟嘗君宅有二大鑊造食

供客大者容四十石小者容三十石李伍毀為兵器詳攷圖

志寔非孟嘗君宅乃南史劉善明宅耳碑陰金人刻曰元嘉

二年但呼佛堂北齊武平四年賜額南陽寺隋開皇元年改

曰長樂又曰道藏則天天授二年改名大雲立宗開元十八

年始號龍興今寺內有飯客鼓架寺東淘米澗南史劉善明

仕宋為北海太守元嘉中青州飢人相食善明家有積粟自

作饘粥開倉賑救鄉里皆獲全濟百姓呼其家為續命田圖

志相傳劉善明宅飯客鼓淘米澗皆當時事豈善明亦嘗事

佛故在宋止呼佛堂後因捨以為寺且青州城晉羊穆之始

築戰國時未有此城田何故宅於曠野蓋後人止慕其名謂

能飯客者必斯人而隱沒善明之高義不得不辨寺之有北

齊八分碑制刻精妙碑陰大刻四字曰龍興之寺蓋唐人續

刻者寺後天宮院古老栢院也有石刻布衣張在詩云南鄰北

舍牡丹開年少尋芳去又回惟有君家老栢樹春風來時不

魯來旁刻云青州教授畢仲愈元豐六年至洛謁太尉文公

公曰昔范諷補之好論詩嘗曰青州富庶地宜牡丹春時游

樂之盛不減洛陽古今人作詩者甚多而布衣張在一絕最為可愛補之為余誦之誠有意思皇祐中余為青守大書於西廡之壁今三十年矣子歸試往觀之仲愈還至老栢院其壁已壞因題於天宮院之石柱俾匠者刻之張生之詩既為四方所傳而詩之所自不可不知也故具書公語而刻於左

城隍廟 龍興寺東耆舊相傳金大正間益都有潘府尹者暮見城隍來謁曰公昔曲漕枉殺二人今以相付即有二鬼相隨驅之不去逾年尹死今上清宮潘尹故宅也柱上猶有斫鬼刀痕事極可怪如近歲濟南憲司有徐好古僉事由分司

歸常鬱鬱不語一夕家人熟寐好古忽起抽刀先殺其妻又殺其長子婢媵死者數人惟幼子突窻間得逸徐乃自層出腸而死竟不知其故其居宅後棄為照磨廳事愚到官始毀之而建架閣庫焉此事眾所目擊四方共聞潘尹事亦不誣矣慮刑者可不戒哉廟亦隨郡亦不煩載餘如東嶽行祠府君三陵諸祠皆然

普照寺 府東北隅美政坊古名皇化寺偽齊劉豫改名普照相傳南燕主慕容行宮金大定碑刻存焉寺後東陽陵慕容德虛葬之冢近歲始為人所夷

太虛宮 普照寺南初金季有全真道士丘長春自棲霞西入
關過益都知府事徐君館之長春相其宅曰此福地也徐即
施與之遂卜築焉井鹵不食使弟子誚茶投之即成甘泉
海岱樓 府城內其西宣慰司公署皆金統軍司衙也金人有
榮鎮中和二堂

范公亭 府西門外文正公知青州有惠政陽溪側出醴泉公
構亭泉上民感公德皆以范公目之燕談云環泉古木蒙密
塵迹不到去塵市數百步如在深山中幽人逋客往往琴詩
試茗於其間真如物外之游也最為營丘佳處歐陽文忠公
劉貢父張禹功蘇唐卿諸賢多賦詩刻石置亭中其後金人
亦有醴泉碑兵後俱亡

表海亭 府城北南洋橋北惟古臺存焉取左傳世胙太公以
表東海為名不知創於何代自歐陽文忠公知青州已有詩
近代任君謨詩有石刻兵後不存有錄之者並載於後

富相亭 府南瀑水澗側富文忠公知青州所建歐公游石子
澗詩謂富相公創亭後人又建冰簾堂皆廢微醉翁筆先賢
遺跡殆將泯焉

武成王廟 府北舊城內有宋大中祥符元年真宗御贊碑存

烏

碑亭 舊城北

世祖皇帝平李瓊後賑卹青人立

聖德碑翰林閻復子靜文

國王廟 舊城北王名木花里招降李全有德於青人故立廟

郭大夫廟 齊記補曰劉裕既夷廣固城齊人郭大夫相水土

勸羊穆之築東陽城為青州後人為大夫立廟於雲門山前

或云益都城在山陰其雲門劈山皆始城者疏鑿以宣風氣

審甬豈大夫所為乎府東五十里洱水東岸有郭朴墓碑土

人以為即大夫之塋也

三元閣 舊府城內寇萊公曲郡日所建今廢

羅漢洞 府西山中疑即齊記補所載七級禪寺

常將軍廟 臨朐穆陵關上齊記補曰將軍秦昭宣帝時為大

峴戍主建元中戰歿後人立廟此山皆石為之按通鑑晉孝

武太元九年謝玄乘秦亂遣兵攻青州降之時符堅建元二

十年也將軍蓋與玄戰死唐沈亞之沂水雜記又云沂水北

一百里有將軍峴甚靈民置祠路左將軍魯為五郡牧姓常

名玄通因築城失主將意斬之其屍數日不仆有臺曰立屍



臺臺西南曰鞍山山北有関曰穆陵関李師古不臣作鎮於此元和初罷之南有沂山山有廟即東安公也沂州刺史每春月禱於是山山有谷九十九所河分八大曰沂曰汶汶東注濰沂南流入清沂山東南有山曰太平山頂平可八九十里頃歲有寇曾居之山北十餘里有樹壇此亞之記所說常將軍事迹與齊記補不同而齊記補近是今兩存之五壇者劉裕代南燕兵過大岷而喜曰兵已過險士有必死之志餘糧棲畝人無匱乏之憂虜已入吾掌中矣遂設祭天五壇遺址尚存

治官祠 臨朐南冶原酈道元曰熏冶水出西溪溪上有治官祠廣雅云金神謂之清明蓋古治官故取稱焉水色澄清特異中有古壇邃岸凌空疎水交合先公太和中作鎮海岱余總角之年侍節東州此寔栖游勝地澠水燕談曰青之南有冶原昔歐冶子鑄劍之地山竒水清旁無人烟叢城古木氣象幽絕富韓公之鎮青也聞劉孟節先生累官不起欲隱此地乃為築室泉上為詩以贈曰先生已歸隱山東人物空古碑猶存而境物因人之勝則蕩然矣

阿育王塔

臨淄城西高僧傳石虎於臨漳脩治舊塔少承露

盤佛圖澄曰臨淄阿育王塔地中有佛像承露盤虎掘得之
齊記補云唐太和中建寺五代無棣僧道圓居之與宋太祖
有舊加號蓋國大師增塔為十二級符中祥更名廣化寺又載
黃康弼詩云齊野非吳渚支卽是子陵鈎臺千古月寶塔萬
年燈又臨淄東南天齊淵側有石佛三尊各長丈有八尺不
知年代

古天齊觀

臨淄城內金大定間道士楊善淵卜此地建三清

觀掘得古磚志云大齊丙戌二年南郭石羊巷楊道圓施花
磚三千在天齊觀因知此地高齊時天齊觀故基也今南郭

石羊猶存

呂仙翁祠

博興城內祠卽韓氏酒壚仙翁嘗飲於此書屋壁云

呂嵩獨酌洞濱宣和壬寅六月書凡十三字後盜焚民居殆
盡惟韓氏室完土人因名為辟火符靖康間邑人乃於社稷
壇碑陰模勒仙書立於祠前社壇碑亦宣和間物圖志攷訂
極為精妙可為後法愚按仙翁游人間多稱回道人如沈東
老詩類是也惟此顯書姓名賓字復加水豈以辟火而然邪

州北三十里居民張氏家亦有祠擣衣上石隱然飛劍形景

錦秋亭

博興東南城上中統間邑人所建取坡詩命名蓋齊

地蓄時般樂衆水潞以馬車瀆以入海博興宛在水中舟楫
交通魚稻成市昔常過之愛其風景絕類江南賦詩亭上云
霜風收綠錦萬頃雲水秋海氣朝成市山光晚對樓舟車通
北關圖畫入南州且食鱸魚美吾盟在白鷗其鱸雖小亦四
腮不減松江有蓴菜齊人皆不識目鱸為豸魚云

孔北海祠 濰州公署後北城上宋政和四年太守安陽韓公
建又有論古堂亦韓所構今皆廢論古堂碑略云學術如逢
紛庸譚即宗鄭康成甄宇徐房徐幹孝友如淳于恭王裒王
閻呂元簡節義如禽慶王脩杜公贇正直如羊融周澤王義

是儀韓載搯尚如公沙穆邴原王昕隱德如逢萌管寧知人
如卽顛高構高義如孫嵩劉敏^元政事如滕撫張允濟皆足以
振揚英毅扶持風教接邦人於道裒其像而繪之名其堂曰
論古掖縣簿劉杲卿文與祠堂碑金人修城記三碑並立於
城上州署扁曰靖恭亦有政和石記存焉

玉清宮 濰州城北丘長春弟子尹清和建長春在漠北還書
誠清和曰勿化小末人出家蓋道非薄質可受亦名言也書
有石刻存焉

寒亭 濰州東二十五里夏諸侯寒伯明之國寒浞者伯明之

讒子也。伯明棄之，有窮后羿收之，以為已相，浞遂殺羿。因羿室，生澆及豷，使澆殺斟灌，以伐斟尋。滅夏后相，后棼逃歸，有仍生少康，為有田一成，有衆一旅，能布德施謀，以收夏衆，卒滅寒浞，復禹之績。此寒國也。自古圖志皆載寒亭，而俚俗之談極陋，以齊無志書故也。

斟亭 通志云：濰州東南五十里，古斟尋國。滎北海郡亦有斟縣。京相璠曰：斟尋去斟亭七里。杜征南云：壽光縣東南亦有灌亭。今按：惟壽光之灌城，濰州之寒亭，在焉。餘皆廢。蓋古人圖志詳明，故國廢城，皆立亭以為表志。後世蕩析不存，為可惜也。

惜也。

信公祠 渢水燕談云：蕭柳字大珍，後梁宗室，為青州刺史，有惠愛，篤信於民。及死，民為立祠于乘縣西。謚曰信公。嘉祐中祠廢，重脩。今有信家莊。

蓋公堂 密州城內東坡建記，以醫為喻，意在介甫。比聞為勢家所奪，碑記恐不存矣。欽按：曹參百戰餘勇，宜其剛銳自視，無前及為齊相，乃能賓師蓋公，以清靜化民，稱為賢相。後世武夫健將，能若是乎？此古人所以不可及也。

超然臺 密州北城上，坡記曰：城之北，因城以為臺，舊矣。稍葺

而新之。余弟子由適在濟南，聞而賦之，且名其臺曰超然石
刻，具存。

城陽景王廟 莒州城內祀漢朱虛侯劉章。章齊悼王子，誅呂
有功，文帝封為城陽王。漢時惟高廟有神靈，王莽畏而毀之。
城陽廟亦靈異。琅邪王京遷都避去，赤眉軍中猶鼓舞之，蓋
其英烈之氣有乃祖之風。廟久廢，州署內有古槐，半體如枯
槎，而根葉敷茂，相傳是章手植。益都舊城北，南陽水上，古亦
有廟遺址尚存。

馬嶧山神祠 莒州南馬嶧山，宋政和四年，敕額惠感廟。

夷吾亭 蒙陰西北堂阜，鮑叔解管仲縛於此，今名憚阜，音轉
也。

庸生廟 膠州城西門外冢在廟旁，而地記又云庸生宅在掖
縣，非是。

石臼島龍祠 膠州海邊，宋紹興三十一年，封佑順侯，賜威濟
廟。完顏亮南侵，遣舟師由海道趨兩浙，宋將李寶遇於膠西
海口，禱於神祠，得風助順，遂殲金師，故加封。

靜治堂 沂州公署後堂，宋人建。有元祐六年新剏蓮花漏碑，
云刻漏之法，莫如燕公。潼川之制，訪求得之於營丘之白門。

蓋歐陽文忠公因燕公之舊而新之者又參取翰林藹公子
瞻所為彭門記者而制焉靜治堂後舊有香林館思賢堂雨
散軒三休亭平野亭惟靜治平野三休在焉至元初碑云宋
時郡治堂宇壯麗者舊猶能道之兵後焚燬無遺僅存而可
攷者惟金防禦使鄭景純一碑而已景純有南柯子十愛詞
石刻王黃華雨散軒碑亦存

普照寺

沂州城西金皇統四年仲汝尚碑云當子城西南有
古臺臺西有廢池耆舊相傳臺曰曬書池曰澤筆東晉王右
軍故宅也往歲得斷碑於土中謂招提復興於後魏唐賜額

開元宋崇寧初詔改為天寧萬壽禪寺逮廢齋居攝專用苛
政理國知衆不附尤狹中多忌凡浮屠老子之居一切廢革
遂易天寧為普照云按寰宇記此名永嘉臺琅邪王濬所築
與此不同記又云沂州東北三十八里故臨沂城南有王導
故宅亦無跡可攷

柳毅廟 沂州艾山宋元豐二年封靈鎮侯政和五年賜額昭
應

酺神廟 艾山東厚丘城側周禮族長祭酺酺災害神主生蠶
螟故祭之因合衆飲酒後世遂有酺賜

蒼山廟

沂州南蒼山宋元豐三年封豐德侯政和六年賜額

靈豐

昭濟王廟

費縣蒙山神宋熙寧八年賜額靈顯廟封潛應侯

元祐七年進封公大觀二年封昭濟王政和五年封昭濟惠

民王

顏魯公祠

費縣東門外宋職方員外郎曹輔碑云公有廟在

費東五十里諸滿村元祐六年楊元永為邑建新廟於此定

海主簿秘書省校對黃本書籍秦觀書丹碑陰復刻米芾書

云公之使賊也謂餞者曰吾昔江南遇道士陶八八得刀圭

碧霞餌之自此不衰嘗云七十後有大厄當會我於羅浮山

此行幾是後公死於賊歸葬偃師北山有賈人至羅浮山觀

道士夾託書至偃師北小顏家及往訪之則塋也守冢蒼頭

識公書大驚家人卜日開壙棺已空矣元祐二年九月余游

吳興適覩邦人新公之祠因得謁拜公像嘗閱洛中紀異載

公前事刻於碑陰以貽續仙傳者云又王仁王堂閑話載公

遭難後十餘年家僕於洛京見公衣白衫張蓋歸城隅菜園

有破屋數間僕隨入拜之公出懷中金十兩以寄其家戒僕

勿與人言公之子亟至但見滿目榛蕪而已時人皆云魯公

尸解得道然此或即一事而記有異同公英烈之氣在天地間非仙即神則無足疑者

二疏宅 嶧州東四十里羅滕城墓亦在焉城周五六里土人指以為宅按二疏歸鄉里顧有舊田廬娛樂終身不為子孫增益產業寧有如是之宅乎即城內古寺其故基也海州有景

疏樓

絃歌堂 滕州公署後子游之武城近在州東故取名宋人有鄒堂以

山谷鄒孫取名又有公堂見坡記今並廢

性善書院 滕州城內

伏羲廟 滕州染山愚按顧史風姓實司太皞之祀鄒魯有廟是也伏羲都陳謂州東鳧山有墓則非也

陶朱公廟 滕州陶山按陶本作挑即古之華萊山也後人因陶之訛遂以祠陶朱

趙盾祠 滕州高山唐元和志盾祠在絳州太平縣宋會要在府州府谷縣皆晉地今此有祠何也且宣子固晉之賢大夫董狐以其亡不出境還不討賊為法受惡書曰弑君孔子韙之所以戒萬世亂臣賊子之黨也後世乃廟而祀之賊黨何所憇乎盾祀當毀又寰宇記長清縣東北有盾墓亦後人附會自宋有天下普系趙孤祠墓之行蓋由

也此

子思書院 鄒縣城內

鄒國公廟 鄒縣城內地名因利溝謂即孟子故宅宋元豐五

年封政和五年詔孟子廟以樂正子配享公孫丑以下從祀

其封爵樂正子克利國侯公孫丑壽光伯萬章博興伯浩生

不害東阿伯孟仲子新泰伯陳臻萊伯克虞路樂昌伯屋廬

連奉符伯徐辟仙源伯陳代沂水伯彭更雷澤伯公都子平

陰伯咸丘蒙須城伯高子泗水伯桃應膠水伯盆成括萊陽

伯季孫豐城伯子叔承陽伯

靈貺廟 鄒縣嶧山神祠宋大中祥符元年封靈岩侯崇寧四

年賜額

齊乘卷之四



齊乘卷之五

亭館下



郡人于欽思容纂

開元寺

般陽城內通志唐李邕書開元寺碑在淄州今寺內

無邕碑而晉人小楷樂毅論石刻在焉蓋淄川東有樂毅廟

東十八里地名樂店石移寺中子昂公嘗屬余打數本每以印手不高

為恨土人亦不知為貴

懷苑樓

長山縣金人所建有泰和碑刻

范公祠

長山縣宋治平二年尚書祠部員外郎知長山縣事



韓澤建

李勣廟 般陽北廿五里

東海淵聖廣德王廟 萊州西北二十里漢以來古廟宋開寶

六年敕建叅知政事賈黃中碑

四知廟 萊州東門內祀漢東萊太守楊震

無訟堂 萊州公署後宋政和間建

劉將軍廟 萊州城內晉東萊太守有德於萊人故祀之

幸臺 萊州城內相傳漢武帝東游訪安期生所築有碑字滅不可攷

燕臺 萊州城北慕容德以掖為青州築此臺觀

六龍灣龍祠 萊州北前有輪井石口如車輪號曰天井能興

雲雨金泰和間禱澍有感碑記存焉

三山亭 萊州城北東坡有詩


僊臺 膠水縣東北五十里青山下列仙傳公沙宿飲白鶴泉

得仙嘗止此臺之上極峻絕今不可登

游仙宮 萊陽縣南馬丹陽得道之地

賓日樓 登州公署後東坡志林云東坡居士移守文登五日

而去眷戀山海之勝與同僚飲酒賓日樓酒酣作木石一紙



投筆而歎自謂比來之絕河內史全叔取而藏之樓側舊有
納川亭東有頌德堂

蓬萊閣 登州北三里海濱田橫寨相對本海神廟基宋治平
中郡守朱處約以其地太高峻移廟西置平地於此建閣寔
為山海登臨勝槩閣下有獅子洞洞前有冷然泉古稱浪井
潮生浪起則沒水退則甘冽如故舊有甘泉亭閣下碎石為
海浪淘激歲久圓滑土人謂之彈子渦黑白者可以奕坡公
嘗取數百枚養石菖蒲作詩遺聖茲堂老閣上古今題詠甚
多而宋人秦樓月一詞頗飄逸詞云烟漠漠水天搖蕩蓬萊

閣蓬萊閣朱薨碧瓦半浸寥廓三山謾有長生藥茫茫雲海
風濤惡風濤惡仙槎不見暮沙潮落登人皆歌之

濱都觀 棲霞縣北五里丘長春祖宮遺山云丘赴龍庭之召
億兆之命懸於好生惡殺之一言誠有之則雖馮瀛王之對
遼主不是過自是黃冠之人十分天下之二子有感焉清真觀記

秦宮 寧海州文登縣東北百八十里古老相傳始皇所築東
南臨海縣有七井後人因立祖龍廟

朝陽亭 文登縣宋慶曆間建

舜廟 濟南府城第二坊按圖經古舜祠在廟山舜井在此今

廟在井傍有宋碑城外古舜坊即廟山故道

娥英廟 趵突泉側祀娥皇女英今廢

宣聖廟 憲府東大明湖上有宋崇寧賜辟雍詔大觀御製政

和手詔三碑在焉

歷下亭 府城驛邸內歷山臺上面山背湖寔為勝絕少陵有

陪李北海宴歷下亭詩

鵲山亭 城北鵲山湖上少陵詩序登歷下員外新亭亭對鵲

山湖者是也今廢

北渚亭 水經注灤水北為大明湖西有大明寺水成淨池池

上有亭即北渚也池今名五龍潭潭上五龍廟亭則廢矣湖

上舊有水西亭環波亭並見南豐子由諸賢詩今廢

仁風廳 舊府治即今憲司前衙也其後靜化堂禹功堂芙蓉

堂名士軒竹齋凝香齋水香亭采香亭芍藥廳並見蘇曾諸


公詩今即後堂有宋元祐名士軒碑廳西古竹猶存芍藥尚

餘數本

歷山堂 灤源堂 舊在趵突泉上北堂曰歷山南堂曰灤源

南豐知齊州曰建此以館客有齊二堂記城內又有閱武堂

亦見公詩又有望湖樓李師中所建皆廢泉西金人建勝槩



樓亦壯麗近亦為水所壞

百花橋 今曰鵲華大明湖南岸橋南百花洲洲上百花臺環湖有七橋曰芙蓉曰水西曰湖西曰北池之類是也南豐詩云莫問臺前花遠近試看何似武陵游又云從此七橋風與月夢魂長到木蘭舟槩可想見今皆廢矣惟百花橋與灤源石橋僅存灤源橋在城西子由作記欽按濟南東藩名郡自唐李北海杜子美宋曾南豐東坡兄弟相與登臨歌詠於湖山之上當時政治風流猶可想見而亭館墮廢百無一二今人亦那復知之方且戚戚於矯飭汲汲於資級以此馳騫一世反有竊笑古人者矣

酈食其廟 府城內今廢章丘臨濟鎮南有酈商家者即食其冢也食其為田庶所烹故齊有墓弟商不應葬此


開元寺 府城內建於唐

祐德觀 府城內唐碑云瑞氣觀宋曰天慶金改祐德觀內古有扁鵲祠金人因創神農廟碑記存焉

靈巖寺 府南八十里靈巖山中其山與方山相連南接泰山北帶龍洞極為深秀疑即水經之王符山也寺乃佛圖澄卓錫之地有立鶴泉佛日巖辟支塔自麓至寺門十餘里古松

參天亦謂之十里松歷代碑志具存

天齊山廟 府城內按漢志濟南國治東平陵有天山郡南山也以其在齊因曰天齊山猶臨淄淵曰天齊淵者是也俚俗乃云山高與天齊不經其矣



高唐亭 濟南豐齊北古高唐地有此亭

謝恩臺 棣州北亡金賑饑所立有金碑

廉頗相如祠 棣州陽信縣

李牧祠 陽信縣按趙將相有祠在此豈西北界趙廉藺亦嘗

與齊戰齊人慕其賢而祀之云有墓者非是

秦臺 濱州東十三里高八丈周二百步相傳秦始皇東游繫

蒲繫馬之處亦名蒲臺般陽之蒲臺縣以此氏為

真祐廟 濱州城內祀齊客茅焦兄弟宋大觀三年賜額真祐

廟政和六年兄封允濟侯弟彊濟侯金末祠廢土人呼為茅

神臺

段子明祠 子明齊將有墓在蒲臺宋元符三年賜額善應廟

建中靖國元年封善應侯俗段干木者非是

德風堂 德州公署舊堂

高津堂 舊在德州

顏魯公廟 德州城內燬於兵至元廿三年即故基重建

管輅祠 平原城內

唐明宗廟 五代唐莊宗拔德州以李嗣源守之莊宗敗嗣源

入大梁是為明宗民號其屯兵之地為明靈寨即今清平縣也立廟

祀焉

龍泉寺 平陰東南四十里齊天統中建下寺有石刻劉豫阜

昌三年皇子皇弟符改甲乙院亦有碑又阜昌中題名最多

佛像古雅皆數百年物上方大佛與龍泉觀音非晚唐人不

能造

丘壠

蘇秦冢 益都府東二十五里秦自燕奔齊齊大夫與秦爭寵

使人刺秦不死殊而走齊王求賊不得秦謂齊王曰臣即死

車裂臣以徇於市曰蘇秦為燕作亂於齊如此賊必得矣齊

王如其言殺秦者果出王因而誅之秦死猶詐也裂其軀而

不恤哀哉般陽西又有秦冢與此為二豈葬而復詐乎嘗論

戰國之士以詐功耀天下者秦儀也秦洛陽人儀魏人乃曰

齊人多詐置二子於何地乎

營丘 臨淄西二里塔寺後爾雅云水出其左曰營丘淄紮其

東南故以名也。晏子曰：先君太公築營之丘，謂太公築邑此地。通志云：營丘即今臨淄縣，或云在濰州昌樂。其地本顓帝之墟，爽鳩始居，其後季荊伯陵因之，太公又因之。按顓帝都於濮陽，少昊時爽鳩已居營丘，又為顓帝之墟，何邪？在昌樂者，乃營陵城。元魏誤以為營丘，而縣為營丘之上。自唐長慶間立太公桓公廟，今惟宋景祐三年碑存。

桓公祠墓 臨淄東南十里。水經注云：女水西有桓公冢，甚高大。墓二墳，晏謨曰：依陵記非葬禮，如承世故，與其母同墓，而異墳。伏琛所不詳也。冢東女水原有桓公祠，侍其衡，奏魏武

帝所立。衡曰：近日路次齊郊，瞻望桓公墓，壟在南山之阿，請為立祀，為塊然之主，然則俗謂二王冢。又云：公與女之冢皆非也。唐貞觀十年，太宗詔禁樵採。

三士冢 臨淄南一里，一墓三墳，諸葛武侯梁父吟，步出齊城門，遙望蕩陰里，里中有三墳，壘正相似，借問誰家墳，田疆古冶子，力能排南山，文能絕地紀，一朝被讒言，二桃殺三士，誰能為此謀，相國齊晏子。注引晏子春秋曰：公孫捷田開疆古冶子事景公，勇而無禮，晏子言於公，餽之二桃，令三子計功而食，公孫捷曰：吾一搏特豨，再搏乳虎，功可以食，援桃而

起田開疆曰吾仗兵而卻三軍者再功可以食援桃而起古
冶子曰冶嘗從君濟河龜啣左驂冶潛行水底逆流百步順
流九里得龜而殺之左操馬尾右挈龜頭躍而出功可以食
二子曰吾勇不若子功不逮子取桃不讓是貪也然而不死
是無勇也刎頸而死冶曰二子死之冶獨不逮又刎頸而死
或曰晏嬰賢相豈有殺士之名蓋曹操既殺孔融楊脩又送
禰衡荊州假手黃祖三子者天下之望也武侯梁父吟殆為
此設然則晏子春秋反因梁父吟而附會如山海經之於天
問耳

田和冢

府北二十里普通店和為田齊之太公皇覽作太公

呂尚冢按檀弓云太公封於營丘比及五世皆反葬於周此
不應有冢皇覽最叵信如云濟南歷山上有太甲冢皆類此
東南者謂是齊胡公冢胡公獻公父亦反葬於周

五公冢

臨淄東南十里齊昭公靈公惠公頃公孝公五墳相

近

高敬仲墓

臨淄東北二十里又名白兔冢左傳莊九年鮑叔

曰管夷吾治於高僎即敬仲也

杞梁冢

臨淄東三里齊莊公襲莒杞梁死焉其妻迎其柩而

哭之詳見檀弓左傳

黔敖冢 臨淄東九里齊饑黔敖設食於路以待餓者

蒯徹墓 臨淄東二里漢書徹范陽人高祖曰徹齊辯士故卒

葬此胡氏管見曰韓信功齒三傑不可忘也迎陳之禮可贖

自王之釁拒徹之意可免失期之罪未有反計則當候以次

國逆謀既露猶當宥其子孫愚謂韓信失職怨望者有之逆

謀既露則無也以信之智料事成敗審矣背水之陣計曰信

非得素撫循士大夫也所謂驅市人而戰非置之死地則走

耳寧得用乎夫以大將握兵猶臂使指尚慮及此失職之後

乃謀詐赦諸官徒奴欲以集事此鼠竊之慮耳連百萬之衆

據三齊之勝制天下之權武涉蒯徹游說百端利害切至尚

不肯變乃與陳稀挈手步庭令稀舉兵吾徒中起天下可圖

此又臧獲之見也信謀果爾何前智而後愚哉信非蕭何不

留及其失職怨何必深何啖呂后殺信遂誣信反千載之下

尚不覺悟信其冤哉

逢萌冢 郡志在濰州營陵古城中記在益都縣云高士冢

蔡丘 臨淄西三十里古齊邑左傳莊八年齊侯使連稱管至

父戍蔡丘瓜時而往及瓜而代杜注在臨淄即此地齊桓公葵

丘之會則在陳留。

管仲墓 臨淄東南二十三里。

晏子墓

臨淄古城北三里。唐貞觀中禁十五步內不得樵採。

高密平原又各有墓。與此為三。欽按晉載記曰慕容德登營丘望晏嬰冢。顧謂左右曰禮大夫不逼城而葬。平仲古賢人達禮者也。而生居近市。死葬近城。豈有意乎。青州秀才晏謨對曰孔子稱臣先人之賢。豈不知高其梁。豐其禮。蓋政在家門。故儉以矯世。存居湫隘。卒豈擇地而葬乎。所以不遠門者。異悟平生意也。以謨考之。臨淄墓為真。

辟閭渾墓

壽光西南三十里。俗呼釣魚臺。渾。晉幽州刺史慕容

容德陷廣。毆殺之。渾子道秀詣德請與父俱死。德曰孝子特原之。

臧臺

壽光西四十里。舊有宋碑云是臧武仲之墓。愚按左傳

襄公二十三年臧紇致防而奔齊。至昭公十年平子伐莒。取

鄆。獻俘始用人于亳社。臧武仲在齊。聞之曰周公其不饗魯

祭乎。是時武仲客齊已十八年。其終不歸魯而卒葬於齊乎。

又西五里有馬陵臺。水經注云不知是誰之冢。世謂馬陵臺。

熙熙臺

壽光北城上。蓋取老子衆人熙熙如登春臺立名。不

初於何代

鳳凰臺 壽光西北三十里宋天聖間鳳凰下此因築臺有宋碑北有南皮臺前有東岳南岳行祠金永安二年碑刻在焉疑即古平望亭也平望亦漢縣見伏琛齊記

蒼頡臺 壽光西北洱水所經水經注謂孔子問經石室非也通志云蒼頡石室記二十八字在蒼頡北海墓中土人呼為藏書室周時自無人識逮秦李斯始識八字曰上天作命皇辟迭王漢叔孫識十三字豈孔子至齊亦嘗訪焉故有問經之目

過宋臺 壽光南二十五里

官臺 壽光北七十里有鹽官壽光古有灌亭豈灌轉為官亭廢為臺也俗謂縣周回有十臺九城信然如熙熙過宋官臺之類皆不可攷

任光冢 樂安城西二里俗傳任光冢按光南陽宛人更始初為信都太守從光武破王郎封阿陵侯卒子隗嗣隗仕至司空又傳三世至孫世徙封北鄉侯北鄉始為齊地自北鄉上官封無至齊者光何緣有墓在此豈北鄉侯冢也

貝丘 博興南五里左傳齊侯田于貝丘見彘射之彘人立而

啼乃公子彭生也。即此地。亦曰貝中聚。

董永墓 博興南三十五里。世說永東漢人。鬻身以葬親。般陽

長山南。又有冢廟。皆出野語。

青丘 樂安北。清水泊。蓋以青丘得名。齊景公有馬千駟。田于

青丘。與晏子游于少海。皆此地。少海謂渤海也。

伯氏冢 臨朐古駢邑。伯氏所食。後為管仲所奪。伯氏沒齒無

怨言。故城西有其冢。

路史齊遷莒郟郟郟本紀邑故城在臨朐東南

麓臺 濰州西孤山之麓。一小阜。下名麓臺村。寰宇記云。州西

二十里。高二丈三尺。是弘墓也。墓後有泉。號曰補生泉。九域

志云。公孫弘讀書處。

王褒墓 濰州南三十里。

徐幹墓 濰州東五十里。俗呼為博士冢。幹建安七子。魏志云。

北海剝人。卒葬此。

伯牛阜 昌邑西北十里。又東子騫阜。古有閔子祠。今名三阜。

南有子游池。竝見寰宇記。今日蓮花陂。三阜者。蓋亦三賢之

意。但未詳所始。

逢丑父墳 昌邑南五里。記謂丑父食邑都昌。故墳在此。然則

般陽逢陵非其邑也。

渠丘 密州安丘自漢有渠丘亭周武王封少昊之裔茲輿於
莒初都計春秋時遷莒至莒子朱居渠丘成八年晉使申公
巫臣如吳假道於莒與渠丘公立於池上

柴阜 密州安丘西五十里邴原之墓在焉

慈阜 柴阜之東齊記云營陵南今濰州昌樂四十里有慈阜

魏奉常王脩葬此俗以脩至孝故此丘以慈表稱脩母以社

設祭悲泣鄰里為之罷社

管寧墓 柴阜東十里蓋與原墓相近

王章墓 寰宇記云安丘縣西南四十里通志金石略云章碑

在密州章仕至京兆尹日蝕上封事劾大將軍王鳳為鳳所
陷下獄死初章為諸生學長安病卧牛衣中泣與妻訣妻怒
曰朝廷尊貴誰如仲卿者病困不自激昂涕泣何也後章至
京兆尹上封事妻又止之曰人當知足獨不念牛衣中涕泣
時也章不聽果死獄中妻子徙合浦鳳死始得還其妻亦賢
矣哉因表而出之然章泰山鉅平人何緣葬此惜其碑斷毀
不可攷也

孫嵩墓 安丘南四十里欽嘗寓宿太虛宮夢有趙先生者入
謁謂欽曰聞君脩齊志僕有良友葬安丘其人節義高天下



今世所無也。請載之以勵衰俗。欽覺而語梅仲昇。以為鄉人趙伯善共訪之。伯善愕然。及閱趙岐傳。始悟為孫賓石也。嗚呼。邠卿處複壁中著書以名世。固奇士。非賓石之高義。則志弗克伸矣。偉哉若人。尤奇者斯夢也。故識之。

康成祠墓

膠州高密縣西北五十里。劉宗山下。山產磨石。古

礪阜也。水經亦謂之碑產山。高士傳云。袁紹屯官渡。逼玄。隨軍。不得已。載病至元城。卒。葬於剡東。後因墓壞。歸葬礪阜。墓前有廟。廟之南有唐開元碑。縣西有鄭公鄉。孔北海告高密縣所立者。剡東舊葬地。即今益都府東五十里。鄭墓店是也。

因高密有鄭公鄉。土人訛為鄭母云。

古冢 郡國志云。即墨城北有古冢。或發之。有黃牛。從埏門出。犯之。即吼不可動。又云。縣有徐誕弟子夏侯臯墓。臯死後。有人遇臯。以手中寄信與誕。乃棺中物也。

雙女冢

膠州計斤城南者。舊相傳宋靖康間。臨海王氏姊妹

與姑避難。為虜所得。王氏謂曰。汝放姑還者。當殺汝也。虜縱姑去。王氏姊妹罵曰。我閨閣家。豈為賊汙。即投海而死。居人得其屍而葬焉。此與唐奉天竇氏二女無異。惜乎不得其家世之詳。

曹嵩墓 沂水縣南百二十里嵩操之父也避難琅邪操使迎之輜重百餘兩陶謙別將張闓襲殺嵩於華費間取其財物因奔淮南操引兵攻謙拔十餘城坑殺男女十餘萬口鷄犬亦盡吁嵩居亂負乘操復讎濫殺闓貪財煽禍一事而作戒數端此之謂也

王祥墓 沂州北廿五里墓西戚溝湖孝感泉剖水躍鯉之地傳云求忠臣於孝子之門祥至孝晚乃失節事晉郝陵川續後漢書列之篡臣惜哉余故表而出之為昏耄持祿者之戒

鯨墓 沂州東南百里羽山之下

奚公冢 滕州東南青丘村奚山下古奚邑

常賢墓 鄒縣嶧山之陽石表大刻曰漢丞相常賢墓

左丘明 嶧州東北七十里元和志東平平陰縣東南復有丘

明墓

王肅墓 嶧州東南二十五里

劉靈墓 嶧州東北二十里已上竝見寰宇記

曜村

靈墓所今名劉

淳于髡墓 般陽東六十七里史記

蔡相冢 萊州膠水西北金尚書右丞相蔡松年墓也松年自

號蕭閑老人子珪亦好學博古第進士仕至禮部郎中出守
濰州卒縣南復有蔡邕冢伯喈陳留圉人也未嘗歷齊豈亦
松年族人之墓遙祖伯喈也邪

閔子祠墓

濟南府城東門外五里宋熙寧七年濟南太守李

肅之即墓前置祠立碑蘓子由作記東坡書又濰州昌邑西

北子騫阜上古亦有廟濮州范縣又云有墓未詳

陽貨墓

章丘西北十里高丈餘貨嘗奔齊又適晉趙未知死

葬何地云此有墓未詳

房彦謙墓

章丘西南三十里唐刺史追封臨淄公立齡父也

墓有碑李百藥文歐率更書極精近聞村人以打碑之擾毀
仆之良可歎也已

鄒衍墓

章丘東十里

燕軍冢

長清縣南十五里寰宇記云謂是燕昭王者後人誤

也恐是燕軍之冢耳

班超冢

寰宇記云在長清東北二十五里定遠扶風平陵人

以和帝永元十四年八月徵還洛陽九月卒齊地曷為有墓

豈以齊有東平陵而附會之也邪

赫胥氏墓

章丘臨濟鎮東故朝陽城內

劉豫墓

濟南城西鵲山下墓中產蝸按宇文懋昭劉豫錄云

豫景州阜城人宋元符中登第累官至殿中侍御史被劾出
為兩浙察訪至真州丁父憂居烏金兵陷河南高宗過維揚
起復豫知濟南豫到郡金人利誘之百姓遮豫願以死守豫
竟出降金人徙豫知東平節制河南兵馬及張邦昌廢豫使
子麟以重賂結粘罕及其腹心高慶裔輩求僭號粘罕假以
百姓推戴請于金主立豫為帝國號大齊改元阜昌初據東
平繼遷于汴僉發鄉兵三十餘萬付子麟姪猗領之分道寇
宋大敗而歸豫猶請戰不已金主下詔廢為蜀王父子竝徙
上京豫僭位凡八年至上京改封曹王而死初豫僭立有醉
民罵豫曰你是何人要作官家大宋何負於你進士邢希載
等亦勸豫歸宋豫皆殺之豫父子嚴刑暴斂取快一時見兵
士賣陵中玉椀即置淘沙官再發河南山陵及發民間無主
墳墓行五等税法民鬻子者皆稅百錢下至倡優日有納課
臣下納女獻妻者皆得遷官貫罪去汴之日金帛糧斛山積
父子姬妾各百餘人貪淫不道有如此者金皇統間沂州普
照寺碑亦謂豫專以苛政理國知衆不附尤狹中多忌者足
證其暴云或問欽曰契丹入汴梁而民驚散女直入中原而

民不服其勢一也契丹則以南帝啗趙延壽父子而終不肯
立女直則始帝張邦昌又帝劉豫何也應之曰嘗聞蕭太后
責延壽父德鈞曰汝為人臣既負其主不能却敵又欲乘亂
徼利所為如此何面目以求生其論甚正抑知帝王大器須
英雄之人始克負荷豈叛降奴虜所能堪邪女直則不然乘
高宗之懦且協且和狙詐百出無復契丹之正矣至如劉豫
直以賂結權貴而得立其為卑猥又邦昌之所羞使高宗稍
有雄才擒之如獵狐兔元遺山取豫而點石勒不知其何說
豫嘗游平陰龍泉寺有留題來者訕笑遺山復為解嘲云河

邊殺麋尚能飛無角無鱗自一齊甲子紛紛等兒戲壁間休
笑阜昌題然則豫在當時自有定論遺山何故曲為之說黨
惡如此豈不為斷腕后所笑也邪自古經生文士學博才高而
性癖識陋害理者不少如遺山之流可不戒哉

婁敬祠墓 德州德平東南二十里祠在墓側五代周顯德間
建膠州復有奉春墓未詳

東方朔祠墓 德州東四十里古厭次城北祠在墓南宋元符
間封智辯侯顏魯公守平原書先生畫贊立碑祠下今碑移
州署內 棗州陽信縣古邵城又云有墓益都壽光縣東方村

又有廟先儒謂非高祖用子房乃子房用高祖欽亦謂曼倩
非漢武帝所得御曼倩以智御漢武耳比子房赤松之遊其
迹尤晦漢延爵祿惟此輩人不為所縻嗚呼高哉欽嘗過其
廟有詩云甲乙不焚珠壁帳百錢囊粟且婆娑殿前怒擗黃
金戟天上偷將紫玉珂班固有評真率爾子雲祿隱果如何
漢初除却椎秦手只許先生逸網羅

張騫墓

平原縣東北騫嘗窮河源平原河所經因附會耳

風土

唐虞三代風化尚矣春秋以降列國殊俗去古未遠自秦漢
以後千八百年總天下風俗五變愈下蓋自漢至西晉一變
五胡南北至陳隋一變隋唐至安史之亂一變五代一變宋
金之交又一變安史戒君臣之義未盡至五代則幾矣五胡
南北華統未斷迨金宋則絕矣是皆闕天地之大運非若春
秋戰國異政殊俗專可以人事論也故今天下四海九州特
山川所隔有聲音之殊土地所生有飲食之異小小習尚不
同謂之土俗可也其大好惡大趣向則系乎一氣之運一代
之治不得以異俗書也然自漢史以來代存列郡之俗亦不
得不攷古以驗今至於土產亦略具前式以相證云

前漢地理志曰齊地虛危之分野也東有淄川東萊琅邪高密膠東南有泰山城陽北有千乘清河以南渤海之高樂高城重合陽信西有濟南平原皆齊分也少昊之世有爽鳩氏虞夏時有季荊湯時有逢公相陵殷末有薄姑氏皆為諸侯國此地至周成王時薄姑氏與四國共作亂成王滅之封師尚父是為太公詩風齊國是也臨淄名營丘故齊詩曰子之營兮師古曰毛詩作還齊詩作營遭我乎穰之間兮又曰俟我於著乎而此亦舒緩之體也詩記曰前漢地理志載齊風俗俟我於著乎川異制民生其間異俗剛柔輕重遲速異齊皆學者所當觀也詩可以觀其此類歟余按漢世去古未遠教詩猶傳得其

教而味之則知其為舒緩之體若以訓詁詞義求之遠矣吳季札聞齊之歌曰泱泱乎大風也哉其太公乎國未可量古有分土分民太公以齊地負海舄鹵少五穀而人民寡迺勸以女工之業通魚鹽之利而人物輻湊後十四世桓公用管仲設輕重以富國合諸侯成伯功身在陪臣而取三歸故其俗彌侈織作冰紈綺繡純麗之物號為冠帶衣履天下初太公治齊脩道術尊賢智賞有功故至今其士多好經術矜功名舒緩闊達而足智其失夸奢朋黨言與行謬虛詐不情急之則離散緩之則放縱始桓公兄襄公淫亂姑姊妹不嫁於是令國中民家長女不得

嫁名曰巫兒為家主祠嫁者不利其家民至今以為俗痛乎

道民之道可不慎哉余按平陰廣里有巫兒山豈以王祠女

是已然近代齊俗歸女比之他郡容飾朴野淫風幾熄欽十

五六歲在鄉里時市井不聞猥言婦女亦簡出入三十年來

俗為大變市有葫蒧語邑襟倡妓昔太公始封周公問何以

居漸與燕鄭同風矣是誠可憂也

治齊太公曰舉賢而上功周公曰後世必有篡殺之臣其後

二十九世為強臣田和所滅而和自立為齊侯初和之先陳

公子完有罪來奔齊齊桓公以為大夫更稱田氏九世至和

而篡齊至孫成王而稱王五世為秦所滅臨淄海岱間一都

會也其中具五民云

欽按論語曰齊一變至於魯魯一變至於道說者曰夫子

之時齊強魯弱然魯猶存周公之法制齊由桓公之霸為

從簡尚功之治太公之遺法變易盡矣故齊俗急功利喜

夸詐乃霸政之餘習所謂夸詐亦霸者假仁義之稱耳漢

史直謂其失夸奢言與行謬虛詐不情此汲黯詰公孫弘

之言也弘為宰相不能面折庭爭常背公卿正議阿順上

指黯目之曰詐當矣詐者弘也齊人豈盡然歟且如婁敬

亦縱橫人也求見言事虞將欲與鮮衣敬曰臣衣帛衣帛

見衣褐衣褐見則其所守可知况過於敬者可以詐槩其

俗乎夫自戰國以來天下並爭惟齊魯之間學者弗廢漢
興言易自淄川田何言書自濟南伏生魯詩則浮丘伯齊
詩則轅固生春秋則齊胡毋生論語則琅邪王卿膠東庸
生遭秦滅學傳經淑後多是齊人故史於齊魯之俗獨曰
好經術尚禮義他國則否亦可見其俗之美也先王之化
流風善政為世移易豈能無弊齊俗之弊始於管晏較之
王政為少差耳故經秦歷漢敦經重義風俗不薄逆亂不
萌漢武帝以燕王旦上書欲圖為嗣怒曰生子當置齊魯
禮義之鄉乃置於燕果有爭心旦後欲反劉澤謀以臨淄

應之尋為雋不疑所誅先是七國作難齊亦不與唐世藩
鎮自河北淮蔡以至川蜀無不叛亂惟淄青一鎮未嘗挈
兵暨朱溫圖昭宗於鳳翔詔徵諸道兵莫有應者獨平盧
節度使王師範奉詔感泣奮兵討溫事雖魚成足表忠赤
載諸史策班班可攷由此言之忠義之風齊俗為多不幸
殘金之亂李全父子盜據此方戶編為兵人教之戰父叛
子南子叛于北衣冠之族變為卒伍忠義之俗染以惡名
全起群盜的不知何人

維揚志云濰州人齊東野語淄
州人或又云萊州人未知孰是養

子瓊本徐希稷之子又出異類

齊東野語云全養子瓊本
徐希稷之子賈涉鎮維揚

日。瓊與涉與諸子同學。其後全無子。屢託涉。祝之。涉以希稷。舊與全稔。遂命與之。詳見後論。非齊氏族。客亂山東。劫民為逆。自速誅夷。然敗俗汙善。不可不辨。或曰。然則王著何如。曰。著盜殺權臣。蓋刺客聶政之流。惡則惡矣。豈瓊叛逆之比哉。欽惟忠孝之道。禮義之俗。本諸人心。況去古未遠。流風可尋。非緣禍亂。可得而泯也。故余謂齊本詩書之國。忠義之邦。攷證史寔。非泛言者。嗚呼。司馬溫公有言。上行下効。之謂風。薰陶漸漬。之謂化。淪胥委靡。之謂流。民心安定。之謂俗。夫教化薰陶。固系于上。不淪胥于弊陋。不委靡于頽波。安乎忠孝。定乎禮義。俾俗不愧古。此亦鄉賢之責也。

隋志曰。齊郡舊曰濟南。其俗好教。飾子女。淫哇之音。能使骨騰肉飛。傾詭人目。俗云齊倡本出此也。祝柯縣俗。賓婚大會。餽饌雖豐。至於蒸膾。嘗之而已。多則謂之不敬。共相誚責。此其異也。大抵數郡風俗。與古不殊。男子多務農桑。崇尚學業。其歸於儉約。則頗變舊風。東萊人尤朴魯。故特少文藝。

愚按漢志。趙女彈弦。跕躑徧諸侯之後宮。至隋則濟南多倡。豈亦高洋之遺風歟。今齊俗比燕趙諸郡。號為朴野。東方尤甚。惟濟南水陸輻湊。商賈所通。倡優游食。頗多皆非。

土人欽佐廉察曰朔望行香三皇廟廟旁見倡家立命逐
之逮今城中無此輩上官賢牧存心風化此亦易事云

洛陽伽藍記

後魏楊衍之撰

後魏太傅李延寔者莊帝舅也永安中除

青州刺史將行奉辭帝謂寔曰懷博之俗世號難治舅宜好

用心副朝廷所委寔荅曰臣年迫桑榆氣同朝露人間稍遠

日近松丘臣已久乞閑退陛下渭陽興念寵及老臣使夜行

罪人裁錦萬里謹奉明敕不敢失墜時黃門侍郎楊寬在帝

側不曉懷博之義私問舍人溫子升子升曰吾聞至尊兄彭

城王作青州刺史聞其實客從至青州者云齊土之民風俗

淺薄虛論高談專在榮利太守初欲入境百姓皆懷博叩頭

以美其意及其代下還復以博擊之言其向背速於反掌是

以京師謠語曰獄中無繫囚舍內無青州假令家道惡腸中

不懷愁懷博之義起在於此也潁川荀濟風流名士高鑒妙

識獨出當世清河崔叔仁稱齊士大夫曰齊人者外矯庶幾

內懷鄙恠輕同毛羽利等錐刀好馳虛譽阿附成名威勢所

在促共歸之苟無所資隨即捨去言囂薄之甚也

欽按此亦五胡南北亂離之際青有此俗蓋牧守有賢否

民心有好惡上之黜陟賞罰不足以厭其心激之使然也

甚則至於孫恩之醞縣令黃巢之殺官吏豈特懷博而已
書云予視天下愚夫愚婦亦能勝予聖人之畏民如此寧
有怒上之俗哉金末內翰鄭子聃知沂州作十愛詞有云
我愛沂陽好民淳訟自稀誰言珥筆混萊夷行見離離秋
艸鞠園扉俗有登萊沂密腦後插筆之語子聃治沂民淳
訟簡可比山谷江西道院之論故云後之為牧疾民訟而
無德化專恃刑罰欲勝民者能無愧乎

王曾沂公言行錄云沂公青州人宋真宗問曰卿鄉里諺云井
深槐樹麤街闊人義疎何也曾對曰井深槐樹麤土厚水深
也街闊人義疎家給人足也真宗善其對

余按古諺鄙齊俗之薄於義也齊自孟嘗任俠過義後世
反敗其俗至於近代不惟鄉義疎薄骨肉之恩亦虧喪矣
蓋因金亂瘡痍之餘重以季瓊之困民有陸地銖產必分
膝下嬰孺亦於昆仲有彼已之辨風俗大壞且五代干戈
之際民有累世同居旌表者在在紀之豈有承平百年風
俗乃薄惡如此可勝歎哉漢志曰南陽好商賈石父富以
本業潁川好爭訟分異黃霸化以篤厚君子之德風也然
則齊俗之弊果不可變邪

齊乘卷五
終



齊乘卷之六

人物



郡人于欽思容纂

齊記補載漢少翁。晉石崇云。崇父苞為青州刺史。生崇於臨淄。小字齊奴。夫崇貪財賈禍。至死不悟。今流俗之弊。正坐此失。苟得而不顧義。務積而不務用。財之所在。骨肉以之。而離良心。由是而死。崇蓋守錢虜之作俑者。齊自太公之後。管晏諸賢。聖門高弟。與夫漢世大儒。鄭康成諸公。三國人才之冠。琅邪諸葛。高節蓋世。北海管寧。此而不書。顧彼之取。何其謬。



哉至於神仙高尚之流魯連安期豈不偉歟少翁之徒罔上
被誅何足纂也故曰人物非賢才不書此之謂也抑嘗論之
人才之多寡繫于教養之當否三代以學校養士迨乎春秋
戰國之際賢俊不可勝用皆周之遺才也漢尚經術光武明
章益崇儒學幾復三代故漢世人才之多獨不愧古前于黨
錮裂于三國名節愈厲英豪迭出皆漢之遺才也降及隋唐
始以詞章取士教養之道劣于古昔人才浸微唐初惟齊州
房玄齡宋惟益都王魯為齊士稱首較于兩漢則不及矣以
此卜之則知教養之道不可不當其餘則各訂于後云

太公 後漢志琅邪西海縣太公呂望所出有東呂鄉廟舊在
臨淄西營丘宋碑在焉冢在縣南十里與頃公冢相近余按
檀弓公曰太公封於營丘比及五世皆反葬于周註謂太公
受封留為太師死葬鎬京五世獻公以上皆從葬焉則齊無
太公之墓或曰齊人思其德葬其衣冠云

路史云名消
字子牙汲人

桓公 舊與太公同廟齊自太公為世胙之祖桓公為五霸之
宗威王亦戰國賢主然以篡立義不敢取餘無可稱者

仲山甫 太公之後為宣王冢宰兼太保王命築城於齊尹吉
甫作烝民詩以送之

管仲 本穎上人齊相墓在臨淄南牛山之阿見史記正義

晏平仲 萊之夷維人故宅在臨淄小城北門即左傳近市宅也墓亦在焉

成覲 齊人謂景公曰彼丈夫也我丈夫也吾何畏彼哉可謂志士

鮑叔 墓在滕州北十五里 甯戚 墓在膠水縣西 隰朋

東郭牙 弦寧 王子成甫 新序曰管仲請於桓公以甯戚為田官

隰朋為大行東郭牙為諫臣王子成甫為大司馬曰君欲治國強兵此五子足矣如欲霸王則夷吾在有司請吏公曰以

告仲父又請公曰以告仲父如是者三在側曰一則仲父二

則仲父易哉為君公曰未得仲父為難則已得仲父何為不易

桓公與羣臣飲酒謂鮑叔曰姑祝寡人鮑叔奉酒起而祝曰

君無忘其在莒也管仲無忘束縛從魯也甯戚無忘飯車下

也桓公避席拜曰寡人與大夫皆無忘夫子之言社稷必不

廢矣

麥丘邑人 祝桓公無得罪於群臣百姓者

郭墟野人 謂桓公善善不能用惡惡不能去所以亡者桓公

賞焉

小臣稷 桓公曰士傲爵祿者輕其主^主傲霸王者輕其士吾敢
傲霸王乎五往始得見稷

石他人 陳恒弑簡公不肯盟而自殺又有子淵棲者恒以勇
士劫之亦不從二人竝見新序

國成子高 齊大夫擇不食之地而葬見檀弓又有國昭子春
秋有國書國佐皆其族也

陳文子 名須無齊大夫

齊太史 昆弟三人書崔杼弑君者左氏逸其姓名惜哉
徒人費 死襄公之難又有石之紛如孟陽皆襄公小臣亦死

節

高柴 史記作鄭人家語曰齊人高氏之別族墓在沂州向子

城側

公冶長 家語魯人史記齊人集註兩存之

樊遲 家語魯人史記齊人

陳亢 家語作陳人愚按檀弓^亢乃齊大夫陳子車之弟疑是齊

人

梁鱸 家語齊人

步叔乘 史記齊人

公折哀 家語齊人鄙天下多仕于大夫家者故未嘗屈節其
亦汶上之亞歟墓在般陽城北

后處 史記齊人

右八人聖門弟子

公孫丑 滕州北公村有墓

萬章 乃滕州南萬村有墓

右皆齊人孟子弟子餘見鄒廟從祀

滕文公 滕州有廟

軻鼂 齊士師以孟子言諫齊王不用而去

匡章 齊人孟子禮貌之必有所取故集註云衆惡必察可見

聖賢至公至仁之心

檀子 盼子 黔夫 種首

威王臣四子將照千里見通鑑

淳于髡 齊稷下學士髡衍輩七十餘人餘不取者大學衍義

曰孔子沒異端遂作鄒衍淳于髡田駢之徒各著書以于世

主不可勝紀申不害商鞅其害尤甚孟子所深距者惟楊墨

二氏程子謂楊墨之害甚於申韓佛老之害甚於楊墨然則

衍輩亦異端之流髡獨知尊孟子稱之曰夫子又一日而見



七人於宣王差賢于諸子故取之或曰均異端也申韓則不
闢而廢楊墨距之而熄佛老則闢而愈熾何邪蓋異端至佛
老而極道至後世而晦如人元氣既衰痼疾可得療乎然闢
之而不廓者其說有二夫鬼神祭祀之禮聖人所先制緣人
情理明儀備殆戰國以降盟詛相持鬼神之理不明事鬼之
情愈切佛氏乘之怖以死生誘以禍福凡古人之敬事鬼神
齊戒禱祠報本祈福之意一歸于佛廣大包羅驅世有情信
之事之此雖麤迹而勢不可廓聖賢有不動心之學世儒多
務外馳於利害怵迫之餘見佛氏之堅定則灑心服謂道在

頓省之間不知吾道自有此理體用尤精舍已耘人徃徃皆

然此為精微其理亦不易辨麤以籠愚精以釣賢非復三代
之治而欲決此疾猶以杯水救輿薪之火也其熾宜矣

閻丘印 年十八求仕於宣王王曰士亦華髮墮顛而後可用
子年稚未可也印曰尺有短寸有所長華髮墮顛與臣何異

宣王用焉

香車居 諫宣王為大室者

王斗 皇甫士安高士傳齊隱士

黔婁子 齊隱士守道不詘威王師之

王蠋 臨淄畫邑人基在愚山西

王孫賈 齊大夫奉母訓誅淖齒者

田單 臨淄人

愚按蠋以布衣死節賈以夫討賊單之功偉矣所以勵齊人之氣未必非二子也故先之

孫武子 濰州昌邑縣北海濱有廟武孫臏齊軍師

司馬穰苴 並齊人

顏蠋 齊人晚食以當肉東坡所謂巧於貧者

子奇 齊人十八為阿邑宰出倉廩以賑貧乏邑內大化見說

苑

無鹽女 齊人姓鍾離名春宣王后

宿瘤女 齊東郭采桑女閔王后並列女傳

貫珠人 諫齊王怒田單者

太史敷 莒人君王后父敷曰女不取媒自嫁污吾世終身不

見余謂後世外戚如楊國忠之流求通房闈不遺餘力敷真有守哉

雍門司馬 諫王建者惜逸其姓名

荀卿 少游學于齊三為稷下祭酒避讒適楚春申君以為蘭

陵令

田文 齊靖郭君田嬰子

田橫 元和志海州東海縣北五十七里有田橫國即田橫島

魯仲連 齊人


安期生 東郭先生 梁石君

右三人皆齊處士見蒯通傳安期又見列仙傳云琅邪阜鄉人賣藥海邊人言千歲公始皇賜金璧棄去不受留書報曰後千歲求我蓬萊山下

欽按神仙之說六經所無原於老子玄牝抱一之論秦漢

間怪迂之士設為誇大之言以徼當世多欲之君至有封侯

尚主貴震天下如文成五利之徒終以詐誅故後世談仙者率歸誕妄至紫陽朱夫子以明理盡性之學會古今諸家而折衷之以為儒者匪難但偷生為不可見於感興之詩又隱名而校參同至取遠遊王子之言以為長生久視之要訣也何蓋仙者必有大賢明睿之資精察造化純一不雜如釋氏之慧定又得明師訣其火藥毫釐不差根氣清厚福如王者庶幾有成也成謂能長久雖與天地同弊亦不能不散也觀安期之策撼項羽魯連之輕世肆志陳希夷之不帝而隱槩乎



其人下此則山林枯槁之徒畜氣葆精差可少病以待天
年異其竊化機以出宇宙萬無一焉雖使紫陽復生亦必
道還汝具一隻眼也

秦淳于越 齊人諫始皇曰今陛下有海內而子弟為匹夫卒
有田常六卿之患何以相救事不師古而能長久者非所聞
也始皇下其議為李斯所絀

茅焦 齊人諫始皇遷母者司馬溫公有言風俗天下之大事
也於茅焦亦見之矣自三代有殺身成仁之教至於戰國習
以成風義之所在蹈死如歸秦起而力禁之誹謗者族偶語

者棄市至戮諫者二十七人而茅焦猶諫蓋由當時風俗驅
之見義而不見死故也秦能因俗以治三代可及必欲峻刑
變俗以自感亡至於後世傷一諫臣沮一言者則天下從風
而靡亦薄俗使然也

漢四皓夏黃公 留侯世家註云夏黃公姓崔名廣字少通齊
人

蓋公 膠西人

婁敬 齊人通典曰齊俗人情變詐故高帝罵婁敬曰齊虜以
舌得官夫敬料匈奴匿兵爭利智也勸帝勿擊忠也高祖不

從致有白登之困高祖失言敬何詐之有

叔孫通 薛人

伏生名勝 濟南人墓在朝陽故城東五里見水經

東方朔 平原人



鄒陽 齊人傳有王先生公孫攬皆齊之智士故陽曰鄒魯守經學齊楚多辯智韓魏時有奇節而辯智者流於詐也

轅固 齊人漢武始好儒迂仲舒疾轅固公孫達于前張禹孔光顯于後西漢風俗不美良有以夫

鄒長倩 淄川人遺弘書曰公孫弘以元光五年為國士所推

上為賢良國人鄒長倩以其家貧少自資致乃解衣裳以衣之釋所著冠履以與之又贈以芻一束素絲一襪撲滿一枚書題遺之曰夫人無幽顯道在則尊雖生鄒之賤也不能脫落君子故贈君生芻一束詩人所謂生芻一束其人如玉五絲為繡倍繡為升倍升為絨倍絨而為紀倍紀而為綾倍綾而為襪此自少至多自微至著士之立功勳効名節亦復如之勿以小善不足脩而不為也故贈君素絲一襪撲滿者以土為器以蓄錢貝其有入竅而無出竅滿則撲之土麤物也錢重貨也入而不出積而不散故撲之士有聚歛而不能散

者將有撲滿之敗可不誠歟故贈君撲滿一枚猗歟盛哉山

川阻脩加以風露次卿足下勉作功名竊在下風以俟嘉譽

欽纂齊乘凡書傳所通習如景公登牛山杞梁黔敖之類則

不詳載如此篇者蓋西漢奇文世所罕見且其積絲之喻撲

滿之戒寔古今之格言最有益於學者故備載焉弘開館延

賢卿有二奇士皆不知引之則所延者果何人哉此其有以

為詐人也撲滿吳人名曰藏瓶次卿弘字漢書弗載

公孫弘 淄川人開東閣以延賢人亦足以為百世宰相之師

故載路史淄州南四十里大薛山弘生處

兒寬 千乘人御史大夫

嚴安 臨淄人騎馬令

終軍 濟南人諫大夫墓在臨淄南牛山之西地名終村又歷

城南九十里有終軍村

王訢 濟南人代田千秋為丞相封宜春侯

淳于意女緹縈 臨淄人

䟽廣䟽受 蘭陵人

于公 字定國丞相西平侯

匡衡 東海承人御史大夫

蕭望之 蘭陵人關內侯

王吉 字子陽琅邪舉虞人貢禹同鄉史稱王陽在位貢禹彈冠言其取舍同也然吉為宣帝言曰欲治之主不世出公卿遭遇其時未有建萬世之長策舉明主於三代之隆者也其務在於期會簿書斷獄聽訟而已此非太平之基也甚欲有所匡建與賈誼仲舒之意同宣帝乃以為迂禹為元帝言曰廐馬萬匹宮女數千園陵郡國廟皆當戒毀務遵儉約元帝悉納用其言蓋圖遠大者難為功舉細務者俗易從二人所見如此惡在其為取舍同也善乎司馬溫公論曰孝元優游

不斷讒佞用權當時之大患禹不以為言恭謹節儉孝元之素志禹孜孜言之何哉使禹之智不足知惡得為賢知而不言其罪大矣余故黜禹以為人臣汎言塞責者之戒

諸葛豐 琅邪人司隸校尉孔明祖

田何 齊人以諸田徙杜故號杜田生守道不仕惠帝幸其廬以受業為易者宗見高士傳

儒林傳 易自田何後有琅邪人魯伯邴丹王橫諸縣人梁丘賀父子東萊人費直 書自伏勝後有千乘人歐陽生子孫世學兒寬師也濟南人林尊齊人周堪 魯詩自浮丘伯後

有琅邪王扶 齊詩自轅固後有琅邪人大司馬師丹皮容

韓嬰詩有淄川人長孫順三詩後世皆亡毛萇詩又得鄭康

成箋行于世大戴禮琅邪人徐良 公羊胡毋生之後有琅

邪王中公孫文東門雲筦路左咸淄川任公 穀梁有不其

人房鳳皆齊人明經而伏生諸儒已載前論不復出焉

鄭崇 高密大族哀帝擢為尚書僕射納用其言每見喜曰我

識鄭尚書履殺諫寵董賢浸疏之責崇曰君門如市何以禁

切主上崇對曰臣門如市臣心如水上怒下獄死

睦弘 蕃人以明經為議郎至符節令元鳳三年上書被殺孝

昭徵其子孟為郎

顏安樂 薛人睦孟姊子積學至齊郡丞

母將隆 蘭陵人京兆尹執金吾王莽秉政以隆少時不肯與

交誣以罪免官徙合浦

鮑宣 渤海人司隸以忠直為王莽所殺妻桓少君

栗融 禽慶 蘓章 薛方

四人皆齊隱士去官不仕王莽見鮑宣傳

逢萌 都昌人學長安王莽殺子宇萌曰三綱絕矣不去禍將

及人即解冠掛東都門隱勞山光武徵不起又有同郡徐房

王君公與萌友善亦隱遯不仕君公儂牛自晦時人語曰避世墻東王君公或曰兩漢人才首蓋公與逢萌豈有意乎應之先輩有言能令漢家重九鼎桐江波上一絲風又曰世祖功臣三十六雲臺爭似釣臺高此之謂也萌墓在北海縣西南營陵城中

伏湛 琅邪東武人伏生九世孫傳經學仕至司徒清靜無競東州號曰伏不關子隆死節兄子恭傳齊詩

王良 蘭陵人王莽時寢疾不仕光武徵拜大司徒直在位恭儉布被瓦器

衛宏 臨沂人序毛詩訓古文尚書光武拜議郎作漢舊儀載西京雜事傳于世

吳良 議郎

江革 世稱江巨孝竝臨淄人

劉寵 東萊人號一錢太守姪劉繇漢末揚州刺史

曹裒 薛人明慶氏禮博物識古為儒者宗

寒朗 薛人為明帝辯楚獄者

侯史光 掖縣人散騎常侍與皇甫陶等持節循省風俗還奏事稱旨遷少府卒家貧賜錢以葬

趙彥 琅邪人勸宗資發五陽郡兵從孤虛推遁甲破徐兗群盜

鄭康成 大司農高密人宋封高密伯

滕撫 北海劇人涿令破東南郡盜者

王望 琅邪人青州刺史擅發廩賑饑者

淳于恭 北海淳于人以孝義為郎

童恢 琅邪姑幕人循吏

周璆 樂安人陳蕃傳

公沙穆 膠東人明經舉孝廉遷鄒相

承宮 琅邪姑幕人中郎將明春秋

司馬均 東萊人隐居教授誠信行乎鄉里爭曲直者輒曰敢

祝少賓乎心不直者終不敢少賓均字祝詛也

牟融 太尉 卽顛 明經房易

周澤 甄字 二人皆博士明公羊傳

孫嵩 五人竝安丘人嵩安丘有墓

徐苗 淳于人累世相承皆以博士為郡守

諸葛武侯 琅邪人

孫乾 北海人事昭烈為秉忠將軍



祢衡 平原人文士才辯性多傲忽傲其儕輩而已衡敢罵辱

曹操有威武不挫之志文人相輕者愧衡多矣

魏徵士管幼安 北海朱虛人

邴原 幼安同郡人魏丞相徵事

王烈 亦北海人漢末三人皆適遼東依公孫度以避亂度安

其賢民化其德

國淵 任嘏 竝樂安人康成弟子俱仕魏

王脩 北海營陵人魏青州別駕母社日三悲感鄰里為罷社

任旒 樂安博昌人黃巾賊到博昌聞旒姓名曰夙聞任子旒

天下賢士那可入其鄉

王基 東萊曲城人魏征南將軍

諸葛誕 琅邪人揚州督起兵討司馬昭不克而死

吳太史慈 東萊黃人建昌都尉孫策曰聞君為太守劫周章

赴文舉詣玄德皆有義烈天下智士也

諸葛瑾 琅邪陽都人吳豫州牧孔明族弟吳志曰葛氏本諸

人徙陽都陽都先有姓葛者故時人謂之諸葛

徐盛 莒人吳安東將軍

是儀 營陵人吳尚書僕射



滕胤 劇人吳都亭侯

晉羊祜 泰山南城人南城久廢地屬費縣祜費縣人也上征

吳策唐彬乃鄒人

司徒王導

臨沂人

南史弘融曇首儉僧
虔恭志筠彬皆導族

劉毅

東萊人尚書僕射謂晉武為桓靈者

任愷

博昌人侍中

光逸

樂安人八達

鮮系

濟南人守正不阿為趙王倫所殺

伏滔

安丘人大元中拜著作郎專掌國史領本州大中正子

系之亦有文名

繆播

蘭陵人晉懷帝中書令掌詔命盡忠為國為東海王越

所害朝野憤惋曰善人國之紀也而加害焉其能終乎越死

贈衛尉

王尼

城陽人不拜東海王越越問之對曰公無宰相之能是

以不拜

劉胤

掖縣人避亂依異州刺史邵續續欲降石勒胤續歸晉

元帝以胤為丞相參軍仕至江州刺史

王羲之

司徒導從子余按晉室清談王謝不能免羲之獨不



為流俗所移。觀其止殷浩北伐之書。對謝安登冶城語。真豪傑之士哉。使其得君王謝不足多。後世徒以書札掩其器識。故朱子惜之。

劉超 琅邪人。換峻。遷帝于石頭。猶啟帝受經者。

顏含 琅邪人。

劉敏元 北海人。忠義傳。

徐邈 姑幕人。儒林傳。

左思 臨淄人。作齊都及三都賦。

石坦 劇人。無居業。不娶妻。吊喪會葬。同日共時。處處見之。姚

萇之亂。莫知所終。蓋異人也。王隱晉書。

秦王猛 劇人。孫鎮惡。宋史有傳。孫憲。後魏并州刺史。北海公。

清身率下。北史有傳。九子世號九龍。子晞曰。非不愛作熟官。

但思之爛熟耳。亦名言也。或曰。先儒謂孟子以後人物。惟有


子房。孔明。魏晉以降。張賓。崔浩。皆比子房。王景畧則謂如諸

葛。數子優劣。果何如也。愚曰。孟子王佐之才。使值炎劉之奮。

未必肩漢庭功業。諸公皆功名士也。故以才智相方。不大相

遠。就其出處進退。觀之。則有間矣。浩事暴君。以殺身。賓贊羯

勒。以傾晉。景畧視二子為優。比之諸葛。則不能無愧。嗚呼。天



下英才不遇者多矣。幸而成功，不一二數也。景畧之儔，容可棄乎。

南燕晏謨，臨淄人。撰齊記。晉載記曰：南燕主慕容德登營丘，問謨以齊之山川丘陵。賢哲舊事，謨歷對詳辨，畫地成圖，德深嘉之。拜尚書郎。德又因饗宴，乘高遠矚，顧尚書魯邃曰：齊魯固多君子，當昔接慎巴生，淳于鄒田之徒，陰脩簷，臨清沼，馳朱輪，佩長劍，恣非馬之雄辭，奮談天之逸辨，拍麈則紅紫成章，俛仰則丘陵生韻。至於今日，荒草頽墳，氣消烟滅，永千載能不依然。

元魏賈思伯，益都人。弟思同，俱好經史。思伯仕至都官尚書。

謙恭下士。人曰：公今貴重，寧能不驕。思伯曰：衰至便驕，何常之有。世以為雅言。思同仕至侍中。今壽光南有墓碑。

唐永，北海平壽人。後魏北地良將，性清廉，無蓄積。妻子不免。

饑寒，二子陵瑾皆儒雅知名。次子瑾，宇文周賜姓萬紐于氏。

王弘，臨沂人。隱會稽釣魚采藥，謝靈運頌延之，竝相欽重。沈約

宋書

王素，琅邪人。隱東陽山，山中有蚊蟲，殺清而形醜，作賦以自

況。

齊任昉 博昌人博學能文

明僧紹 平原人初隱勞山弟慶符亦青州刺史罷任隨歸隱

江東齊太祖稱為外臣

孟喜 蘭陵人父孟卿父子並傳禮易

臧榮緒 莒人撰東西晉紀與闕康之俱隱京口時號二隱

顏見遠 琅邪人南齊御史中丞蕭衍殺齊主見遠死之子協

孫之推皆知名

諸葛璩 琅邪人齊梁徵辟皆不就隱居教授妻子不見喜愠

之容

梁孫謙 東莞人循吏

劉勰 東莞人撰文心雕龍

伏曼容 密州人臨海武昌太守解易詩論語老莊

隋隱士徐則 郟人隱縉雲山絕粒養性


杜松贊 北海人大業末賊攻北海執松贊使諭城降松贊罵

賊而死

張軌 臨邑人與樂安孫樹仁為莫逆交每易衣而出以此見

稱西魏恭帝時除隴右府長史卒家無餘財唯有書數百卷

張買奴 平原人高齊太常博士北史儒林傳云買奴經義該



博門徒千餘人諸儒咸推重之尤精服氏春秋又云自晉杜
預註左氏預立孫坦坦弟驥在並為青州刺史傳其家業故
齊地多習之

孫益德 樂安人其母為人所害益德童幼復仇不避魏孝文

后特免之見北史孝行傳

又北海王閭敬世同居有百口見節義傳

苟金龍妻劉氏 平原人苟為梓潼太守疾病賊圍城劉氏代

帥將士拒戰賊奪水城中渴甚劉仰天號訴得雨以衣服懸

絞取水卒完城北史烈女傳

宋劉穆之 東莞人左僕射

臧素 莒人兄子質守盱眙拒魏太武者

徐廣 東莞人撰晉紀

顏延之 琅邪人作五君詠

段文振 北海人諫煬帝罷突厥者

唐房玄齡 齊州人墓在濟南東南采石山

秦叔寶

羅士信 並歷城人濟南府城中有羅姑井相傳士信故宅

段志玄 臨淄人房秦段皆凌烟功臣志玄孫文昌仕至太尉

文昌子成式太常少卿並有才名

在平人

杜伏威 章丘人大業末據淮南歸唐封太子太保兼行臺尚

書令

任敬臣 棣州人五歲喪母哀毀天至問父曰何以報母父曰

揚名顯親可也乃刻志從學舉孝廉虞世南器其人荐為弘

文館學士終太子舍人

負半千 齊州全節人武陟尉歲旱勸令發粟賑民令不從乃

令謁州半千悉發之下賴以濟刺史怒囚半千于獄會薛元

超持節渡河責刺史曰君有民不能恤使惠出一尉尚何罪

釋之後仕至太子諭德封平原郡公

或問先賢行蹟例多不載惟賑卹一事自子奇王望半千三

人皆詳書之何也對曰欽聞富鄭公不言使遼之功至知青

州活饑民五十餘萬自謂賢于中書二十四考此豈細務哉

延祐六年己未齊地大飢父子相食欽銜

命賑卹濟南六縣洎鹺竈飢民嘗以勸率富民出粟太多賑濟

太廣見責于憲府時官僚有幸此凶歲捐斗升以鬻子女舉

曰過房悉輦以北欽則訪鬻子者為贖還之乃怒曰是違例

激譽也欽憤鬱久矣無從發之故于三子之事不自知其筆

之瀆也。嗚呼董煟有言人微無肯信其言官小莫能行其志
微子墨卿吾誰與言歟

顏魯公 弟杲卿並琅邪人

刺史蔣欽緒 萊州人與沂州蕭至忠姻家戒至忠曰君材不
患不見用患非分而求耳至忠果附太平公主預禍

崔融 齊人鳳閣舍人諸孫多顯宦

符令奇 臨沂人田悅反死節

張允濟 北海人循吏

顏師古 臨沂人註漢書其叙例諸家名氏有琅邪伏儼北海

劉德皆漢末註班書者因附見云

王仲丘 琅邪人明禮

王希夷 滕人為人牧羊取傭以葬親隱徂徠山玄宗訪以道

義授朝散大夫聽還山

郭虔瓘 歷城人右驍尉將軍兼北庭都護戰功甚多

王無競 東萊人監察御史臨朝斥宰相宗楚客偶語在遷太

子舍人

高適 渤海人諫議大夫忤權近出刺蜀年五十始為詩即工

高沐 渤海人貞元中進士李師古辟署判官師道叛沐以誠

欵結天子為師道所殺

盧惟清妻徐氏 淄州人惟清貶播州會赦徐迎惟清至荊州

聞惟清死二奴將劫徐歸下江徐數其罪奴不敢逼徐倍道

至播州得惟清尸還葬齊澣高其節作詩頌之

崔信明 益都人秦川令吟楓落吳江冷者

五代王凝妻李氏 青州人斷臂者

石昂 臨淄人昂讀書好學不求仕進節度使符習高其行召

為臨淄令入朝以公事謁監軍楊彥朗贊者以彥朗家諱石

更其姓曰石昂昂責彥朗曰內侍柰何以私害公昂姓石非

右也彥朗大怒昂即解官去語其子曰吾本不欲仕亂世果

為刑人所辱

邊鳳 濱州人五世同居無異爨天子旌其門復其家 又王陶密州人

數世同居五代史孝友傳


王師範 青州人

歐陽子曰孟子謂春秋無義戰予謂五代無全臣其仕不二

代者以國繫仕非一代者作雜傳夫入于雜誠君子之所羞

而一代之臣未必皆可貴欵按五代名節李氏尚矣青州五

臣惟石昂有孝節稱疾辭祿及節度使王師範為可取其餘



皆不足貴也。史稱師範好學，以忠義自許，為治有勳績。朱溫圍鳳翔，師範見詔書，泣曰：「吾屬為帝室藩屏，豈得坐視天子困辱，雖力不足，當死生以之。」遂起兵討溫，求助於楊行密，斬朱友寧于青州。及淮南兵歸，力不能支，遂降溫。為其所族，嗚呼！師範欠敗兵一死耳，原其本心，非朝梁而暮晉者。故綱目特書曰：平盧節度使王師範發兵討朱全忠。又曰：王師範以淮南兵擊朱友寧，斬之。曰：討曰斬，則與之之意可見矣。況其處死不亂，又毅然丈夫哉！汨之雜傳，則其志亦可哀也已。故特表而出之。

南唐韓熙載 青社人。五代之亂，熙載投南唐，累官至中書侍

郎。多置妓妾，晝夜歌舞。謂僧德明曰：「吾為此行，正欲避國家入相之命。」僧問其故，熙載曰：「中原常虎視于此，一旦真主出，棄甲不暇，吾不能為千古笑端。」初，熙載之走江南也，李穀送別，各言所志。熙載曰：「江南果相我，當以長驅定中原。」穀曰：「中原若相我，下江南如探囊中物。」後相周世宗定江南，而熙載之言不驗。胡氏以為熙載文士高談，非穀沉毅有智畧之比。是故然已使世宗唐主易地而君，熙載豈無能為者？知時不可為而能沈晦，以免禍，其智亦足稱也。繁欽於劉表，數欲見

竒杜襲喻之而止李驥為劉崇所殺至有吾負經濟之才乃為愚人謀事死敵有甘心之歎然則熙載其賢乎

孫晟 密州人南唐宰相周世宗征淮南唐遣晟使周晟謂其副曰吾行必不免然終不負永陵一杯土後為世宗所殺正其衣冠南望拜曰臣以死報國乃就刑

宋傳霖 青州逸人乖崖稱曰傳先生天下士

王曾 益都人狀元丞相文正公弟皞字子融直集賢院初新舊五代史皆不與韓通立傳識者笑之皞著唐餘錄有紀志傳又博采諸家說仿裴松之三國志附註於下表韓通於忠

義傳冠以宋初褒贈之典新舊史皆所不及文正嘗言曾平生之志不在溫飽皞器識若此可謂難兄難弟矣

蔡齊 萊州人狀元參政文忠公

呂夷簡 萊州人丞相文靖公六世孫伯恭號東萊先生

宋會要濱

州有夷簡祠公通判濱州奏不稅農器王曾知其有相業

王從善 青州人太宗雍熙二年始踰冠九經及第見長編

李之才 青州人師穆伯長博陳希夷先天易嘗謂即康節曰

科舉之外有義理學義理之外有物理學物理之外有性命學康節曰願受教遂傳易學

麻希夢 前青州錄事參軍年九十餘居臨淄太宗以高年詔
至闕詢及人間利害敷對詳明訪以養生之理對曰臣無他
術惟寡情慾節穀色薄滋味詔以尚書工部郎中致仕賜金
紫子景孫興國中登進士甲科孫溫其溫舒祥符中相繼第
三人及第衣冠以為盛事天下稱麻氏教子有法

孫仲英幼有俊才七歲能詩以親三祿不及養不復肯仕退
居臨淄七里別墅博學高行鄉黨化服雖凶年盜不入其家
富韓文公潞公龐莊公相繼鎮青皆致書幣薦其行義詔以
為國子四門助教州學教授東方學者咸師之亦年九十餘

卒

賈先 臨淄人登進士真宗賜名同改字希德以扶道著書為
已任著山東野錄七篇頗類孟子奏疏言丁謂造作符瑞以
誣皇天以欺先帝今幸為姦發竄逐請明告天下還寇萊公
以明忠邪終以孤直不偶官止殿中丞卒門人謚曰存道先
生

王樵 字肩望淄川人性超逸深於老易善擊劍有槩世之志
廬梓桐山下不交塵俗山東賈同李冠皆尊仰之咸平中契
丹內寇舉族北俘累年乃歸刻木為親葬與山東立祠奉侍

終身太守劉通誥樵踰垣遁去其後高弁知州事范諷為通判
相與就見之李冠以詩寄之曰霜臺御史新為郡棘寺廷評
繼下車首謁梓桐王處士教風從此重詩書晚自號贅世翁
豫卜地壘石名薊室刻銘其上曰生前殺軀以虞不備沒後
寄魂以備不虞後感疾入薊室中自掩戶乃卒命以古劍狗
葬著遊邊集二卷安邊策說史十篇濟南李芝為贅世先生
傳治平中淄川詩僧文幼即其地起祠祠樵其為世景慕如
此

劉孟節

壽光人少師种放天姿絕俗篤古好學酷嗜山水青

之南有冶原歐冶子鑄劍之地山竒水清叢筠古木氣象幽
絕孟節欲隱其間富韓公為築室泉上詩以餞之曰先生已
歸隱山東人物空其後范文正公文潞公皆優禮之欲薦之
朝孟節懇辭少時嘗寓龍興僧舍徃徃凭欄獨立懷世事手
拍欄干吁唏太息有詩曰讀書誤我四十年幾回醉把欄干
拍見司馬溫公詩話

張荷

壽光人師事种放與吳道魏野楊朴宋澥為友性高潔

為文竒澁著過非九篇放謂隋唐以來綴文之士罕能及之
終以連蹇不遇卒有詩文三卷見澠水燕談

蘓丕 青州人。祖德祥。建隆四年狀元。丕有高行。少時一試禮部。不中。拂衣去。居泃水之濱。五十年不踐城市。歐陽文忠公鎮青。言於朝。賜號冲退處士。年八十餘卒。

周起 鄒平人。母感吉夢而生。父異之。謂必大。其門曰名曰起。

第進士。通判齊州。召直史館。真宗東封。群臣多獻文頌。起獨上言。書天下之勢。患於安逸。而忽於兢業。真宗佳之。拜諫議大夫。終樞密副使。

劉廷式 齊州人。蘓軾知密州。庭式為通判。初庭式未遇時。約取鄉人之女。及第後。女喪。明庭式卒。娶之。女死。喪之。踰年而

哀不衰。因不復娶。軾問曰。哀生愛。愛生色。君愛何從生。哀何從出。庭式曰。吾知喪吾妻而已。若綠色生愛。緣愛生哀。色衰愛弛。吾哀亦忘。則凡揚袂倚市。目挑而心招者。皆可以為妻。邦軾深感其言。庭式後監太平觀。老于廬山。絕粒不食。而面目奕奕。有光。步峻坂如飛。以壽終。

姜遵 淄川人。初舉進士。為蓬萊尉。以擊搏知名。天聖七年。拜樞密副使。卒。贈吏部侍郎。

明鎬 密州人。參知政事。與文彥博同時。

李常 字公擇。登州人。知齊州。齊多盜。常得黠盜。刺為兵。置麾下。

下詢知弭盜之術。姦無所容。嘗為富鄭公客。李師中榜其閤。曰遺直坊。東坡有詩。

燕肅 字穆之。青州人。童圖閣待制。知審刑院。請讞諸路冤獄。有不當者。擇其罪自是。全活者衆。肅有巧思。嘗造指南車。記里鼓。及欵器。蓮花漏。世服其精。

趙師民 字周翰。臨淄人。九歲能文。第進士官。至龍圖閣直學士。子彥若。哲宗時。翰林學士。紹聖初。章惇以彥若與脩神宗寔錄貶死。

李覺 字仲明。益都人。舉九經起家。知泗州。遷禮記博士。

賀元 琅琊人。真宗東封。謁於道左。曰晉水部員外郎賀元。再拜。東坡記詩云。舊聞父老晉。即官已作飛騰變化看。聞道蒙有居處。願供菽水。看燒丹。蓋仙人也。

雪竇禪 居琅琊山。身被布衫五十年。不易。向薊林。嘗為青州雪竇布衫倡云。趙州無義漢。雪竇老婆禪。一川風雨後。明月却當天。

周沆 字子真。益都人。累官至樞密直學士。安撫使。溫公銘其墓云。光普通判。并州事公於河東。銘曰。古之君子。德盛道尊。望之儼然。即之也溫。公正衣冠。嚴不可干。施之於政。乃仁乃

寬吏畏而悛民思弗諼款銘垂美以告後昆碑今在益都城
南駝山下

異人徐問真 維州人與歐陽文忠善一日求去甚力歐公留
之不可曰我友罪我與公卿遊公使人送之果有鉄冠丈夫
長八尺餘俟於道周以瓢覆酒於掌中以飲提筭童子遣回
不知所往童子徑發狂亦莫知所終嘗教歐公引氣愈其足
疾東坡試之亦驗

于燾 字彭年壽光人博學能文頗喜言兵慶曆中元昊數寇
邊北虜乘釁聚兵求闕南地丞相呂文靖公召彭年計之彭

年云宜治西北行宮若將親征者以壓其謀乃以大名府為
都二虜果請盟仁宗春秋高皇嗣未立登州峿嵎山數震彭
年上疏曰峿嵎極東方殆東朝未建人心搖動之象早宜定
儲以安天下齊宜為節度逮英宗入繼乃由齊邸人以先識
稱之

張蘊 淄川人咸平中契丹入寇淄川城壘不完刺史欲棄城
奔南山蘊時為郡兵馬監押按劔曰刺史若出吾當斬以徇
卒完城後為環州馬嶺鎮監押雖處第塞猶建孔子祠刻石
為記范文正公書其碑陰以美之其後子孫皆以文學才行

登侍從云

呂頤浩 齊州人南渡丞相忠穆公

內翰綦寔禮 高密人徙濰州北海故人稱北海先生崇禮隨

高宗南渡掌王言凡下詔旨讀者感動時議以為中興之功

非特將士宣力詔令亦有助焉如陸宣公之在奉天也見重

如此以忤秦檜位不進

翰林侍讀袁伯長云北海子孫見寓四明為衣冠名族

辛幼安 濟南人宋名臣言行錄黜稼軒不取朱文公稱曰稼

軒帥湖南賑濟榜祇用八字雖只鹿麕法便見他有才况其忠

英之氣見於辭翰者不一嘗言曰雖虜六十年後必滅虜滅

而宋之憂方大其識如此宋人既以倉荒遇之而不柄用中

原又止以詞人目之為可惜也故識之

宋寔錄載幼安贊韓侂胄用兵侂胄敗幼

安獲罪於士論非也稼軒豪傑之士枕戈待旦有志於中原

久矣宋人舉國聽之豈無所成侂胄之敗正陳同父所謂真

金劉迎 東萊人太子司經有文集號山林長語章宗紹因學

刊行

周馳 濟南人在太學以策論魁天下貞祐濟南破不肯降携

二孫赴井死

張行簡 莒州日照人詞賦第一人及第仕至翰林學士承旨

備於禮文之學典貢舉三十年門生遍天下弟行中亦進士
仕至參知政事言虎賊必反抗權臣高琪為士論所稱右四
人並

見中
州集

李國維 淄川人進士歷符離葉二縣令著清名蚤年鄰家有

窖銀者兵後無人國維掩而不發見楊素菴
事言補


楊弘道 字叔能淄川人金末補父廕不就與元遺山劉京叔

楊煥然輩皆以詩鳴大為趙閑閑諸公所稱避亂走襄漢宋

人辟為唐州司戶兼文學不久復棄去晚寓益都嘗一見李

壇議不合為用事者所嫉浮沈閭里以詩文自娛著小亨集

事言補等書行於世延祐三年贈文節



齊乘卷六終

